

廬山蓮宗寶鑑

東林禪寺蓮宗善法祖堂勸修淨業臣僧普度謹自編集



清刻龍藏佛說法變相圖

蓮宗寶鑑序

野四

禪淨二門分祖各幟幾同敵國矣慈覺贖禪
 師有營田開庫之喻各隨所好皆得如心此
 亦方便和會之談耳二物可會若本非二和
 會奚爲夫禪有野四如來禪祖師禪祖師禪且置
 佛語禪那華言靜慮所謂八禪八定也念佛
 三昧曰一心不亂都攝六根淨念相繼非靜
 定耶且念佛與唱佛不同唱者口也念者憶
 也母憶子子憶母口乎心乎所念之佛梅檀
 耶闍浮檀金耶毘首羯磨所作耶應身耶報
 身耶法身耶過去佛耶現未佛耶淨土在西
 方耶舉足下足即道場耶觀經金口所宣而
 曰是心作佛是心是佛故觀心即觀佛也觀
 佛即念佛也極而言之念本無念佛亦無佛
 能念空所念亦空如來禪即祖師禪也故大

勢至念佛無生觀世音反聞自性二菩薩各一圓通而同在安養左右彌陀接引東土明乎即淨即禪衆聖一揆而後來釋子分張門戶譬之祖宗房屋原只一間而子孫於中墻壁夾斷插籬種棘不相往來其爲執迷顛倒極矣或難言三聖接引則淨土在西方明矣得無與自性唯心之旨相矛盾乎余曰彌陀者衆生之彌陀也衆生者彌陀之衆生也極樂者彌陀之唯心也唯心者衆生之極樂也故識自性唯心之旨謂西方有彌陀可謂東土皆彌陀亦可謂法報身是佛可謂丈六劣應身與毘首羯磨所作是佛亦可謂念過去佛可謂念現來一切佛亦可而又何禪淨之分別爲耶蓮宗寶鑑一書乃廬山優曇和尚所集標真正謁尋香討根實淨土之指南

也因屬楞嚴白法師刻而傳之而僭爲之引

紫栢弟子錢士升書於放下菴之更雨堂

野四

二

廬山蓮宗寶鑑念佛正因卷第一

廬山東林禪寺蓮宗善法祖堂勸修淨業
僧普度謹自編集

蓮宗寶鑑一部發明佛祖念佛三昧已蒙
諸尊宿善知識題跋印證來詣大都禮
拜

屬賓國公班的荅師父主盟佛法得奉
法旨教般若室利長老賢耶那室利闍
羅羅司丞於至大元年十月十一日至
隆福宮

今上皇帝潛龍時分月海怯薛第一日親捧

蓮宗寶鑑啓奉

令旨教刊板印行者敬此即於大都明理

不花丞相施到

無量壽法王寺內鑲板已遂畢工所集

野四

三

洪因端為祝延

皇帝聖壽萬安

皇太后皇后齊年

太子諸王千秋文武官僚高增祿位

皇圖永固

佛日光輝 凡曰見聞同成佛道

皇慶壬子正月圓日優曇普度 謹識

按經中說西方世界國名極樂其土有佛

號阿彌陀巍巍蕩蕩超太古皇不令不

申自然而化瓊池金地不染一塵樹林

水鳥皆演苦空佛願力故攝彼群情一

念相應即登金臺雖下下品亦胎華蓮

鴈門尊者社結勝流策勲淨業是以念

佛之道唱行於世迨今千年謂之蓮

宗也去古已遠法流成弊邪道混淆微

肯曖昧由是優曇和尚乘宿願力痛嗟
正宗奮真實心探尋要旨編次本末剖
分偽真定為十門名曰寶鑑賫赴大都
咨扣

芻賔班的荅灌頂國師證無叢脞契合佛
經乃為聞奏欽遇

皇上金輪皇帝聖通佛慧道合天心至照無
私獎稱曰善教刊板印行載上書乞復
教

上可之頒降

聖旨遍行各省洗

佛日重光於

聖世起祖風載振於虎溪策精進而勿荒發
闡提而必信悟覺花開於心地顯佛性
存於本源咸知極樂之歸悉稟無為之

野四

化明教上

仁宗正宗論息闢佛之議於當時優曇獻
皇上寶鑑編復蓮宗之旨於今日雖年代相
遠蓋事實相符其名同芳而不萎其功
並垂而不朽矣延祐甲寅住大仰山大

圓佛鑑禪師傳法沙門 希陵 拜手

叙

夫心性役乎塵勞煩惱而不為塵勞煩惱
之所汨沒如蓮生淤泥而不因淤泥深
汚其質故直指之為蓮也心性通乎三

乘諸法而不為三乘諸法之所凌奪由
宗分支派而不因支派忘失其本故念
佛之為宗也心性虛空含育萬有譬海
中四珠出無盡藏故標之為寶也心性
明淨照了色象喻一鏡當臺能辨妍醜

故名之爲鑑也。優曇和尚浙之丹陽蔣氏家。世事佛。積善生而敏銳。弱冠則厭俗緣。投簪籜髮。初參龍華寶山慧禪師。一見器之。誠其歷叩諸老之門。琢磨淘汰。達心淨土。見性弥陀。深惜祖道湮微。

野四

五

述集念佛警要目之曰。蓮宗寶鑑言言破惑。井井有條。天童東岩圓應曰。禪師見而證之曰。善哉善哉。如是如是。繼之京都開法於法王禪寺。道合灌頂國師。捧寶鑑而上奏。

金輪興正宗而下頌

王旨忘軀爲法異世龜鑑。開導人天續佛慧命。實僧中寶。正本齊末。統衆歸宗。不捨悲願。融真混俗。示火中蓮。振復東林。遠公祖師已墜之風。于千古之下。所謂廬

廬山蓮宗寶鑑叙

山蓮宗寶鑑者。豈徒言哉。宿師名德。公大人跋讚品題。備于卷末。後之修淨業者。披閱是集。洞明佛祖旨趣。弘揚斯道。垂之無窮。其功詎可比量也。耶。延祐改元甲寅孟夏。前婺之明智崇勝禪寺比丘大中德合再拜爲之敘云。

夫真法界性。生佛平等。而無異無同妙覺。明心。染淨混融。而非一非二。然則塵塵淨土。他方此界。皆爲極樂之邦。念念弥陀。蠢動含靈。盡是法身之佛。蓋爲情生智隔。相變體殊。心隨生住異滅之變遷。境有坑坎堆阜之高下。所以淨刹穢方。苦樂有異。衆生諸佛。凡聖不同。是致六趣茫茫。匍匐九居之內。四生浩浩。升

沉三界之中從迷入迷由苦入苦動經塵劫無解脫期故我佛開方便門教以念佛三昧指有淨土爲歸向焉所謂念佛三昧者梵語佛陀此云覺者自覺覺他覺行圓滿故名曰佛如睡夢覺如蓮

野四

六

花開爲今有情返照回光淨念相繼久純熟惑盡障除一念不生前後際斷悟此覺性內無能念之心外無所念之境能所兩忘生佛無二故曰念佛梵語三昧此云正定謂思專想寂神智明妙

也經云若念佛者當知此人則是人中芬陀利華東晉遠公祖師因聽彌天法師講般若經豁然大悟入於無量甚深三昧遊止廬山與高僧朝士結緣修行故云諸教三昧其名甚衆功高易進念

佛爲先因以蓮宗名其社焉師乃著念佛三昧叙蓋發揚此理也天台智者判教謂觀無量壽經爲大乘終實之教以三觀澄心者蓋顯念佛之旨也法照尊者禮文殊而求指蓋指此法也省常禪

師結淨行緣宰相名卿皈嚮同修者蓋此道也長蘆曠禪師結蓮花勝會感普賢普慧二菩薩入會蓋證明此道也慈照宗主以本願力示現世間發廣度心引權就實隨機化導蓋欲令利根鈍根

野四

七

俱悟此道也集白蓮懺開四土圖以信行願爲資糧以戒定慧爲樞要蓋立此念佛正宗也宋高宗御書蓮社二字蓋崇此法門也欽惟

大元普天一統諸國來朝人心樂善廬山東

林禪寺東岩圓應日禪師欽奉

聖旨住持道場修營梵宇集諸賢傳乃追古而整宗綱架大法橋名宗遠而開祖道一十八載提唱宗乘之外常以念佛三昧開導人天至元壬辰秋赴慶元路育

王山廣利禪寺請而遜席于開先悅堂閻禪師相繼住持元貞元年正月述明居士燕覺道破衣和尚欽奉

聖旨勅明蓮宗善法堂護持教法元貞二年正月又欽奉

聖旨賜通慧大師蓮社正宗仍賜金欄袈裟於大德五年十月欽奉

聖朝頒降

御香金幡到寺自晉至今僅乎千載感斯恩耀遐方異域若賢若愚皆從化焉悉以

齊心念佛仰祝

皇帝聖壽萬安天下太平法輪常轉熙熙然舜日堯風即此世界為極樂世界也普度濫叨釋裔無補教門嘗見稱蓮宗者未諳念佛旨趣棄本逐末著相修行淨

業正因逮將沉沒皆是懷寶迷邦背真向偽從其事者紛如牛毛具止見者渺若鱗角致令上慢之徒輕忽吾佛之道悲夫去古時遙法久成弊正道湮微邪法增熾人多錯解蹉入邪途不思淨土

野四

八

一門乃出輪迴之捷徑其直如絃其朗如日與旨在於經懺之間不遇明師啓迪猶若群盲摸象各說異端從冥入冥永纏邪見可痛惜哉矧今恭遇佛心天子正法治世迺

君臣慶會之時政佛法流通之際得不以祖

師念佛三昧開示人天用作將來眼目
俾同悟入佛知見哉予乃翹心淨土探
賸先宗編集要言目曰寶鑑照明真偽
凡一十篇其首曰念佛正因謂入室必

由戶也次曰正教乃示念佛法門漸偏
頓圓使進修者隨根器而歸乎至道也
又其次曰正宗蓋示念佛三昧正心之
理俾修習者明其宗而達其本也又其
次曰正派蓋明佛祖暨諸宗師得道之

本末欲令後學知其自也又其次曰
正信正行正願俾信正法修正行發正
誓而求生西方也次曰往生正訣蓋示
臨終生淨土之路也次曰正報蓋明修
行所得淨土依正之功德莊嚴也次曰

野四

九

正論蓋引諸佛誠言破群邪異見欲令
改不善而從善也非敢有助於宗風為
益於未聞者也欲其枉者直之邪者正
之疑者決之迷者悟之盡大地人於一
念中同得念佛三昧共證菩提不亦偉
歟修淨業者無恡慈悲試一展卷見聞
隨喜讚輔流通其如佛祖未出世一句
子請高着眼肯大德九年乙巳弥陀示
相日江州廬山東林禪寺 蓮宗善法
堂主僧優曇普度齋沐謹題

廬山蓮宗寶鑑綱目

念佛寶鑑叙

念佛正因卷第一

念佛正教卷第二

念佛正宗卷第三

念佛正派卷第四

念佛正信卷第五

念佛正行卷第六

念佛正願卷第七

念佛往生正訣卷第八

念佛正報卷第九 念佛正論卷第十

目錄

第一卷 一十四章

念佛正因說 阿彌陀佛因地

弥陀釋迦本願因地

佛爲常提希聖后說淨業正因

孝養父母 奉事師長 皈依三寶

發菩提心 受持戒法 慈心不殺

修十善業 深信因果 讀誦大乘

勸進行者

第二卷 一十九章

念佛正教說 佛爲父王說念佛

善財參見德雲比丘說念佛門

智首菩薩說念佛 龍樹大士說念佛

野四

十

念佛功德有七種勝 修持法門

離相念佛三昧無住法門

天台念佛三昧三觀法門

空觀念佛三昧無念法門

日觀念佛三昧專想法門

參禪念佛三昧究竟法門

攝心念佛三昧調息法門

一相念佛三昧專念法門

六時念佛功德回向法門

懺罪念佛功德繫念法門

晨昏念佛功德信願法門

簡徑念佛功德十念法門

慈照宗主圓融四土

第三卷 八章

念佛正宗說 定明宗體

念佛叅禪求宗有說

淨土非鈍根權說

真歇了禪師淨土宗要

寂室大師示淨土實見

大智律師示念佛事理不二

野四

七

文法師淨行念佛宗要

第四卷 二十二章

念佛正派說 遠祖師事實

遠祖師歷朝謚號

明教大師題遠祖師影堂記

廬山十八大賢名氏

貫休禪師題十八賢影堂記

辯明遠祖師成道事

壁谷曇鸞大師 天台智者大師

京師善導和尚 金臺法照大師

睦州少康法師 省常大師

長蘆慈覺禪師 永明壽禪師

天竺慈雲懺主 文潞公傳

路府宗坦疏主 慈照宗主

無為子楊提刑 龍舒居士王虛中

儀真王侍郎

第五卷 六章

念佛正信說 斷疑生信 勸發信心

慈雲式懺主往生正信偈

智者大師淨土十疑論叙

楊提刑直指淨土決疑序

第六卷 一十四章

念佛正行說 修進工夫 資生助道

作福助緣 去惡取善 拔濟幽趣

放諸生命 六度萬行齊修

維摩大士示淨土六法

較明修行難易

天台示淨土忻厭二行門 淨業道場

自行化他 以事檢心

第七卷 七章

野四

念佛正願說 勸發大願

土

慈照宗主示念佛人發願偈并序

求生淨土要在發願

善導和尚修行發願儀

白侍郎發願求生淨土文

馮濟川施經發淨土願文

第八卷 一十二章

念佛往生正訣說

父母臨終往生淨土

臨終三疑 臨終四關

臨終決疑撮要 僧濟臨終注想西方

善導和尚臨終往生正念文

化佛來迎 賢首菩薩臨終讚念佛偈

情想多少論報高下

命終善惡感報優劣

臨終十事不尅念佛勸預修

第九卷 五章

念佛正報說 功德莊嚴

淨土增修聖果 淨土三十益

淨土成佛

野四

土

第十卷 二十五章

念佛正論說

西方弥陀說真如本性說

辨真妄身心 辨明三寶

辨見聞覺知 破妄說灾福

辨明空見 辨一合相 辨明雙修

辨明三車 辨明三關

辨明大小二乘 辨明不生不滅

辨明曹溪路 辨佛法隱蔽

辨明超日月光 辨明髻中珠

辨明無漏果 辨明趙州茶

辨明教外別傳

辨關閉諸惡趣門開示涅槃正路

辨明四生 破妄立十號 誓願流通

名德題跋 十一章

明州天童長老東岩和尚跋語

廬山白蓮宗主悅堂和尚跋語

西峯及菴和尚信公長老跋語

大慶壽寺都總統西雲和尚跋語

饒州薦福長老月礪和尚跋語

姑蘇幻住禪庵中峯和尚跋語

荆岑普賢接待院不會禪師跋語

天峯祐禪師跋語

翰林承旨張疇齋題跋

廬山無住道人竺源跋

廬山優曇普度題

廬山蓮宗寶鑑目錄終

廬山蓮宗寶鑑念佛正因卷第一 十四章

念佛正因說

蓋聞恒河沙數衆如來弥陀第一十方微塵

野四

古

諸佛刹極樂是歸至理本祇唯心初門必由
因地故知合抱之木發於毫芒千里之行始
於初步欲超生死以淨土為歸趣之方將證
涅槃故念佛乃正心之要深信極樂真解脫
之妙門諦想弥陀實衆生之慈父先明落處

故望果以修因漸履玄途是從因而至果故知集群賢而結社有其旨焉專念佛以勸人興其教也因該果海果徹因源形直無不影端聲和自然響順勢至示證圓通之要世尊說修淨業之因從聞思修登三摩地憑信行

願入法界門是以一念興而萬靈知信心生而諸佛現纔稱寶號已投種於蓮胎一發菩提即標名於金地有緣斯遇自悟自修淺信不持大愚大錯故云一乘極唱終歸獲至於樂邦萬行圓修最勝獨稱於寶號八十一劫之重罪廓爾烟消十萬億刹之遐方倏如羽化想念專注即觀心而見佛身心境交參即因門而成勝果十方淨穢卷舒同在於毫端一性包融浩博該羅於法界是則諸佛與衆生交徹淨土與穢土冥通彼此互收事理無

野四

五

礙若神珠之頓含衆寶猶帝網之交映千光我心既然生佛同爾是知遊神億刹實生乎自己心中孕質九蓮豈逃於剎那際內二乘賢輩回心即達於金池五逆凡夫十念便登於寶界嗟乎識昏障重信寡疑多貶淨業爲權乘嗤誦持爲龕行豈非耽溺火宅自甘永劫之沉迷悖悞慈親深痛一生之虛喪須信非憑他力截業惑以無由不遇此門脫生死而無路誓同諸佛敢效前修勸勉後賢深崇此道已發願今發願當發願事事而回向彌陀若已生若今生若當生念念而皆歸淨土欲取一生事辦便於這裏留心一切時中千車合轍四威儀內萬善同歸齊登極樂妙門速成念佛三昧最初一步要分明直至西方無異路

阿弥陀佛因地

鼓音王經云過去劫中有國名妙喜王名憍尸迦祖父清泰國王父月上轉輪王母殊勝妙顏生三子長曰月明次曰憍尸迦三曰帝衆時有一佛出世名曰世自在王憍尸迦心發道意棄捨國位投佛出家號曰法藏比丘又大弥陀經云法藏比丘於世自在王佛所發無上意一切世間無能及者時佛說二百一十億諸佛刹土應其心願法藏稽首禮佛廣說四十八願經云○本具載若不爾者誓不成佛是時大地震動天雨妙華空中同聲讚言決定成佛

弥陀釋迦本願因地

悲華經云往昔劫中有轉輪王名無諍念大臣寶海為善知識同於寶藏佛所發菩提心

野四

十六

無諍念發願云我修大乘取於淨土終不願於穢土成阿耨多羅三藐三菩提世界衆生無諸苦惱我不得如是佛刹乃不成正覺今既果滿號阿弥陀故現淨土寶海大臣願於穢土成熟有情今已果滿號釋迦牟尼於此濁惡世中成佛菩提

佛為常提希聖后說淨業正因

觀無量壽佛經云尔時常提希號泣向佛白言世尊惟願為我廣說無憂惱處我當往生不樂閻浮濁惡世也尔時世尊放眉間光徧照十方無量世界諸佛國土皆於中現時常提希見已白佛言是諸佛土雖復清淨皆有光明我今樂生極樂世界阿弥陀佛所惟願世尊教我思惟教我正受佛告常提希阿弥陀佛去此不遠汝當繫念諦觀彼國我今廣

為汝說亦令未來凡夫修淨業者得生西方
極樂國土欲生彼國者當修三福一者孝養
父母奉事師長慈心不殺修十善業二者受
持三歸具足眾戒不犯威儀三者發菩提心
深信因果讀誦大乘勸進行者如此三事名
為淨業正因佛告阿難及耆提希諦聽諦聽
善思念之

野四

七

孝養父母

念佛乃諸法之要孝養為百行之先孝心即
是佛心孝行無非佛行欲得道同諸佛先須
孝養二親故贖禪師云孝之一字眾妙之門
佛語以孝為宗佛經以孝為戒言中不昧口
出戒光直下分明頓開心地夫孝者有在家
之孝有出家之孝在家孝者父母愛之喜而
不忘父母惡之勞而不怨承順顏色以盡養

生出家孝者割愛辭親食微契本深入無為
之理上圓罔極之恩趣解脫之要途報慈親
之捷徑非但未來獲益亦於現世成功所以
如來子夜踰城道圓雪嶺盧能白金遺母法
繼黃梅然而以法斷恩應恩報德是以迦維
省父切利寧親至於貧乏無依理合躬親給
侍是故畢陵迦起盡心之戒忍大師有養母
之堂陳睦州織履供親朗法師荷擔遊學然
則出家者以法味為甘旨不忘返哺之心以
佛事為勤勞未遺世諦之禮非但一世父母
而多生父母皆報不惟一身父母而法界父
母皆度同登覺岸豈止周公之配天普示迷
津故逾考叔之純孝出家之孝其利溥哉如
或因緣未和父母不聽宜盡在家之孝勸修
出世之因若能即俗而真亦有成佛之路觀

反嬰兒之行無虧膝下之嚴報雙親顧復之勞致一乘圓滿之地遂使在家菩薩行解無疑出俗高人因斯可鑑其有局於事佛不能盡於事親觀茲有感于中可以克全其孝嗚呼光陰易往父母難忘有親在堂如佛在世

野四

十八

以此報親之德圓成念佛之功是知父母喜懽則諸佛喜懽此心清淨則佛土清淨可謂野色更無山隔斷月光直與水相通

奉事師長

古德云生我者父母成我者師友是知師者

迷途之明導暗室之慧燈苦海之舟航人天之眼目恩逾父母德重乾坤弟子所以事師不敢慢易也豈不見捨全身而求半偈斷一臂而扣真乘以身為座而奉師腰石負舂而續祖賣心肝而學般若投火聚以證菩提方

之古人深為慶幸奉師學道可不勉哉應知出世投師須求正見叅方請益莫附邪宗要明罪福之因由審辨正邪之利害正則成佛邪則成魔打頭不遇作家到老翻成骨董是以如來知師非而捨去夫子擇善者而從之

觀古聖之如斯何今人而不爾況當末運多有邪師凡欲修行切莫親近但存正念終值明師要了大緣慎勿容易是故弟子事師即同事佛也可謂四事供養敢辭勞萬兩黃金亦消得

野四

十九

皈依三寶

佛為三界大師法是群生眼目僧乃六和上士並為真淨福田背之則邪順之則正神功莫並聖力難思除苦如藥鼓落鏃脫難若霜劍突圍變苦為樂而剎那華凡成聖而頃刻

是以火車相現皈依而便獲清涼地獄將臨稱念而悉皆離苦普明與諸王免難空定功馬帝釋却頂生之威般若力也所以信心佛子皈依三寶真慈香花供養於佛僧讀誦流通於法寶集茲善利回向菩提普暨衆生同生淨土不見道頻伽鸚鵡稱念而得生西方諸天王欽敬而誓求聖道皆能上成佛果下脫苦輪可謂禪是大滿詩是朴大唐天子只三人

發菩提心

無上佛果名曰菩提若發此心決定成佛淨行法門曰凡修淨土須善發心若為自己厭五濁忻九品則違菩提心是聲聞行不應發也若為衆生起大悲心求往彼國希速成就道力神通徧歷十方救度一切令共成佛則

順菩提心是菩薩行應當發也今勸淨業高流凡欲利己利他須是發心立志應於三寶前虔奉香花志心發願云南無佛南無法南無僧弟子某從於今日發此大心不為自求人天福報緣覺聲聞乃至權乘諸位菩薩唯

依最上乘法發菩提心願與現生父母及多生父母法界衆生一切怨親同生淨土皆得不退轉於阿耨多羅三藐三菩提如是三說此心時時要發日日常然所以善財一生證果龍女八歲成佛地獄發心頓超十地沙彌

野四

千

發意已越二乘可謂一氣回元運恩沾萬物深

受持戒法

既發菩提心應修菩薩行初受三皈次持五戒漸修十種善法圓滿三聚律儀根熟則今

持根生則分受年有三善月有六齋如或五戒難行且除酒肉二味十重易犯且持不殺一門輕塵積微墜露添流一滴下崖終歸大海故涅槃經云佛在世日以佛為師佛滅度後以戒為師梵網經云戒如明日月亦如瓔

珞珠微塵菩薩衆由是成正覺所以龍無犯殺之心狼有持齋之意比丘苦節至於繫草護鷲居士病緣終不飲酒食肉是知諸善之本五戒為先王者履之以治國君子奉之以立身不可造次而離不可須臾而廢佛稱五德儒謂五常在天為五星在地為五嶽在人為五藏在處為五方廣而言之無所不統仰觀俯察莫能加焉故法苑珠林云世俗所尚仁義禮智信也貪識所資殺盜婬妄酒也道俗雖乖漸教通也正法內訓必始於因此則

野四

二十一

在乎實法指事直言不假飾辭託名現意如斯而修因不期果而果證從茲而入道不羨樂而樂彰今見持戒不殺不求仁而仁著守戒不盜不忻義而義敷不婬者不祈禮而禮立不妄者不慕信而信揚不飲者不行智而智明非但律已防非亦以助國揚化欲修成於淨行須嚴護於戒根可謂萬善和融同佛士熙熙長樂太平時

慈心不殺

卵胎濕化飛走蟲魚皆未來諸佛之流或過去多生父母至於顛顛怖死汲汲貪生避苦而樂其身此情一等求安而養其命斯理萬均何乃聲哀哀而牽上刀砧眼盼盼而驅就死地或張羅亘野布網連山火逐嶺以高低烟隨處而疎密疾雷之鷹爭舉追風之馬競

前猿覩箭以鳬飛鴈看弓而膽落解頭陷腦之酸難抵洞胃徹骨之痛奚禁況斯等共稟五行俱舍四象同沾佛性共有神明何乃陳此肉山樹茲炮烙充其口腹美彼心肝殊不知斷其命者是出佛身之血食其肉者寧非父母之身造殺害之深尤斷慈悲之種性生前福壽暗裏消磨死後沉淪刀山劍樹還作鷄猪魚兔次第填償至於宰割烹炮因果相似諦觀食肉可謂寒心縱售易於屠門亦難逃於重罪菩薩寧當破骨終不食敢衆生是以白兔焚身而仙人不顧也草尚不援肉豈容嘗遠彼庖厨有聞聲不忍之訓養他出賣同口殺心食之尤大聖垂慈所以制戒永斷殺生其德大也修淨土人故當持守可謂不貪香餌味始是碧潭龍

野四

三

修十善業

夫大乘玄要元不離於一心淨業正因必先修於十善斷身口七重之罪七行斯成滅意識三毒之根三學自備彌陀經內求淨土者之所當修華嚴經中離垢地者乃能親證人天至於有頂以十善為受生之緣聲聞以至佛乘由十善為入道之本弗遵佛制墮三塗之要門縱得人身獲二種之惡報不修乃十不善道奉持為十戒法門實乃淨土鎡基普勸常修此行是菩薩之法苑宜令安住其中可以至無畏大城可以登不退轉地功德詎可思量佛子所以當學

深信因果

擬步玄途洗心大道深信世間因果究明出世根源將窮其源必存其要要在用者其

於心法乎心也者彌綸於萬行會通於群數
蓋以心無常法乘善惡而迭用以罪福為影
響故因果不相違是知涉境而動謂之因動
而生識謂之緣緣起則有業相隨有業則果
報定矣是以善行惡行世間之因也三界六

對四

十三

道九有四生世間之果也念佛法門出世間
之因也九品化生淨土成佛出世間之果也
於上因果心中明了故不樂着世間之法於
出世間法心行不違念念不忘於淨土心心
不離於彌陀何以知其然如今是因臨終是

果應知因實果則不虛夫善惡二輪苦樂二
報皆三業所造四緣所生六因所成五果所
攝若一念心瞋恚邪淫即地獄業慳貪不實
即餓鬼業愚癡闇蔽即畜生業我慢貢高即
修羅業堅持五戒即人業精修十善即天業

證悟人空即聲聞業知緣性離即緣覺業六
度齊修即菩薩業真惡平等即佛業若心淨
則香臺寶樹淨刹化生心垢則丘陵坑坎穢
土受形皆是等倫之果能感增上之緣是以
離自心源更無別體維摩經云欲得淨土但

淨其心故知一切歸心萬法由我欲成淨果
但行淨因又當知聞提邪見定應墮千劫泥
犁誹謗撥無即此是邪魔眷屬觀報應之若
是如影如形信因果之歷然可驚可懼所謂
苦瓠連根苦甜瓜徹蒂甜

讀誦大乘

既慕西方當求了義暗中有寶無燈照終不
自知古鏡埋塵不揩磨豈能光顯調和三業
體究一心恭奉真文研味聖意深入法源之
底洞探諸佛之機理路豁通心花發現不見

道倚松之葛上聳千尋附托勝因方能廣益
譬夫桂生高嶺雲露方得滋其華蓮出綠波
飛塵不能汚其葉雖蓮性自潔而桂質本貞
良由所附者高則微物不能累所憑者淨濁
類不能沾夫以卉木無知尚猶資善而成至

野四

三四

善人倫有識得不因心而證佛心豈不聞智
者誦法華見靈山之未散圭峰讀圓覺忽心
地以開通達本情忘普庵契華嚴之旨應無
所住六祖悟般若之宗觀先德而可遵豈今
人而不學可謂渡河須用筏到岸不須船

勸進行者

夫學佛初門大悲是菩薩正轍利他要行勸
進乃淨業勝因晉社群賢願祈生於安養十
方海衆忻出離於娑婆痛嗟生死之難逃堪
嘆無常之期速可不景行前哲導彼後昆哉

勸一人二人以至多人是佛門之法施念一
佛二佛以至萬佛趣樂土之玄猷日課千聲
佛名積月至年則有三十六萬聲佛積而不
追亦幾於佛地乎日行小善一事積月至年
則有三百六十善事積而不追亦幾於君子

乎爲愚爲小人而不通懺悔同禽獸者良由
不學亦無勸進之人也經言若人以四天下
七寶供養佛及菩薩緣覺聲聞得福甚多不
如勸人念佛一聲其福勝彼此世尊之勸進
也語云已欲立而立人已欲達而達人此仲

野四

三十五

尼之勸進也勉爾同盟熏陶淨行或正月五
月九月爲一集或半年一年三年爲一期深
植善根普皆回向常爲道侶更互相資一人
退惰則協力提携一人捨凡則遞相照顧雖
不能弘教利物亦可以溫故知新豈不見施

人一錢人稱受惠益人一語彼豈無知財施
則濟一世之貧食施則濟一日之命法施則
令人出世其功德詎可比倫財施如燈止明
一室法施如日徧照大千恪法而不勸修累
劫沉於黑獄推已而行化導現生則是阿彌
敢冀運慈通相勸發以斯悲願結此淨緣拔
滯溺之沉流出輪迴之捷徑齊登樂土圖報
佛恩可謂未度者令度矣

廬山蓮宗寶鑑念佛正因卷第一

音釋

脍

倉果切細碎
無大略也

閤

魚巾切中正
負又和敬也

洄

胡犬切
一洄也

廬山蓮宗寶鑑念佛正教卷第二

野五

東林禪寺蓮宗善法祖堂勸修淨業臣僧普度謹自編集

念佛正教說

法界本無衆生衆生緣乎妄見如來本無言教言教為乎有情妄見者衆生之病言教者

野五

衆生之藥以藥治病則病無不治以言覺妄則妄無不覺凡夫日用而不知如來之道鮮矣故我能仁大覺愍群機之未悟也於是仰推大慈俯垂妙範華嚴頓示聲聞尚若盲聾阿含委說菩薩未蒙獲益方等贊大般若蕩

空涅槃殊途同歸法華普皆受記於是群經森列偏贊西方蓋以阿彌陀佛願廣緣強法尊理備而然尔其教也指佛國為歸趣華池寶地勝妙莊嚴令忻彼而厭此也其理也示彌陀即自性念念圓明心心實相如大海之

混百川也其行也開示十六觀門攝心妙境了性相空如明鏡之見面像也其果也九品次第化生普攝利鈍登不退階至無上之菩提道也是故九界衆生以無所得心而修佛國妙行不亦宜乎如來出世之懷於斯盡矣

偏贊之辭有其旨焉真百千三昧之要門乃一實境界之直道論事儀則懺六根雪三業究宗旨則空萬法了一心是謂超苦海之捷舟救急病之良藥信斯道者開本覺心出五濁苦達真淨土了性弥陀若明月之當空似

蓮花之出水故蓮宗之教以是名焉楊無為云蓮者出乎淤泥不捨衆生界也處空無染顯露清淨體也華而有實非魔境也華實同時因果一如也華開蓮現示權顯實也華落蓮成廢權立實也一蓮生無量華建立一切

法也十方同一華藏示佛境無異也蓮教之義得非是歟所以興慈運悲者遊戲於常光之界戒珠義海者涵泳於解脫之淵是以天龍護持王臣致敬古今不墜其化士民仰慕其風非夫大悲願力撫哀末習其孰能臻此

野五

二

哉是故龍樹論證之晉賢社修之天台判釋之慈恩通贊之慈照集而懺之宗坦疏而解之宿衲名儒奉之者寶珠有集高賢達士修之者簡編有題於戲大法下衰去聖逾遠事佛者衆謀道者稀競聲利為己能視流通為

兒戲遂令法門凋瘵教綱傾頽實賴後賢克荷斯道普冀止軀為法潔已依師欲達真乘須親教典稟教乃能明理明理然後修行行願無虧道果可證故知耳聞目見當依四法以思修口誦心違縱解千章而何益是乃心

以教照佛以念持非以戒防罪以懺雪道以實踐動以禮行近則期於立身揚名遠則希於革凡成聖發揮佛祖之道捨我輩而誰歟堅秉慧刀裂開魔網飲正法之甘露伐邪見之稠林避惡友如避虎狼事良朋如事父母

謹守志節毋退大心正覺可遵非道莫履有過務速改有善勿矜誇自然與禍斯遠與福斯會現居塵世則人敬之天祐之他日淨方則聖可期道可至豈在乎相形問命諂求榮達之時又何必望影瞻光卜度終歸之日此

野五

三

匪道人之見識實乃凡庸之妄情莫徇他求但依本分在當仁而不讓宜見賢以思齊名利不足動於懷死生不足勞其慮欲功成而志遂必自適而涉遐當驗果以推因信有作而有報智足以照惑明足以燭幽言斯可法

行斯可樂德義可尊進退可度辯偽識真若
試金之美石除昏鑒物猶照世之真燈是大
導師作不請友擲出龍宮之寶均施群生撒
開祖門之關普容來者蠲滌邪病指歸妙源
俾昏鏡以重磨若垢衣而再淨使真風復振
福及大千觀慧日增明輝騰萬古可謂法王
之真子可謂大丈夫焉以此而奉西方大聖
人之教者復何愧歟

佛為父王說念佛

寶積經云世尊父王頂禮佛足一心合掌而
白佛言云何修行當得諸佛之道佛言一切
衆生皆即是佛汝今當念西方世界阿彌陀
佛常勤精進當得佛道王言一切衆生云何
是佛佛言一切法無生無動搖無取捨無相
貌無自性可於此佛法中安住其心勿信於

他爾時父王與七萬釋種聞說是法信解歡
喜悟無生忍佛現微笑而說偈曰

釋種決定智 是故於佛法

決信心安住 人中命終已

得生安樂國 面奉阿彌陀

無畏成菩提

善財五十三參首見德雲比丘說

念佛門

華嚴經入法界品云德雲比丘告善財言善

男子我得自在決定解力信眼清淨智光照
野王

耀普觀境界離一切障具清淨行往詣十方

供養諸佛常念一切諸佛如來總持一切諸

佛正法常見一切諸佛隨諸衆生種種心樂

示現種種成正覺門於大衆中而師子吼善

男子我唯得此憶念一切諸佛境界智慧光

明普見法門所謂

智光普照念佛門	令一切衆生念佛門
令安住力念佛門	令安住法念佛門
照耀諸方念佛門	入不可見處念佛門
住於諸劫念佛門	住一切時念佛門
住一切刹念佛門	住一切世念佛門
住一切境念佛門	
住寂滅念佛門	住遠離念佛門
住廣大念佛門	住微細念佛門
住莊嚴念佛門	住能事念佛門
住自在心念佛門	住自業念佛門
住神變念佛門	住虛空念佛門

智首菩薩說念佛

華嚴經云一切威儀中常念佛功德晝夜無
暫斷如是業應作

野五

五

龍樹大士勸念佛

野五

五

大智度論云佛是無上法王諸大菩薩爲法
臣諸臣所尊重者唯佛法王是故菩薩應當
念佛又云有諸菩薩自念往昔謗般若墮惡
道經無量劫雖修餘行未能得出後遇善知
識教行念佛三昧即得併遣罪障方得解脫
又偈云若人願作佛心念阿彌陀即時爲現
身故我歸命禮

念佛功德有七種勝

甘露疏云一詞少易行勝唯稱一句南無阿
彌陀佛一切人可念故二念緣佛境勝一心
緣念佛身相好淨國爲境故三離難獲安勝
諸佛菩薩加護念佛者無諸患難安慶吉祥
四稱名滅罪勝念佛一聲滅八十億劫生死
重罪五持念獲福勝稱佛一聲勝四天下七

寶供佛及阿羅漢六果感見佛勝衆生念佛
必定見佛七親迎往生勝化佛菩薩放光迎
接行者往生佛土

修持法門

夫無爲境界過絕名言有漏色心要憑修證
真如具含衆德方便而有多門上自離相平
等下至十念稱名總括不離三乘往生冥符
九品有念終歸於無念有生直至於無生可
謂一句彌陀羣機普應矣

離相念佛三昧無住法門

慈照宗主云離相念佛三昧者上根智人悟
此深理常運虛空平等心無我人衆生壽者
相經云離一切諸相即名諸佛論曰我以計
內人以計外衆生以續前爲能壽者以續後
爲義既無內外前後執心則一切諸相悉皆

野五


六

空寂故經云知無我人誰受輪轉亦無身心
受彼生死是名離相念佛三昧此則見一切
衆生本性皆同彌陀既不執有相無相二邊
亦無有斷見常見之說由是念念彌陀出世
處處極樂現前如此念者無念之念念則真
如無生之生生則實相故知無念即離念實
相乃無相無相則無住無住則入佛境界此
乃無上正真大菩提道若到此地無修無證
無生死可脫無涅槃可求性相俱空聖凡齊
等無佛道可成無衆生可度無已靈可得一
念無爲十方坐斷無一法本有無一法始成
自他互收事理無礙塵塵具足剎剎全彰法
本如然思議莫及可謂

十方薄伽梵 一路涅槃門

天台念佛三昧三觀法門

三觀大一總相之圖



捏不成團 撥不開看 來看去轉 成默 野五七 人人若到 默田地三 觀元來是 禍胎

智者大師云諸佛教理既明非觀行無以復性乃依一心三諦之理示三止三觀一一觀心心念念不可得先空次假後中離二邊而觀一心如雲外之月者此乃別教之行相也又云破一切惑莫盛乎空建一切法莫盛乎假

究竟一切性莫大乎中故一中一切中無假無空無不中空假亦爾即圓教之行相也如西天伊字三點首羅天之三目非縱非橫並列故三觀圓成法身不素即免同窮子也龍樹菩薩偈云因緣所生法我說即是空亦名爲假名亦名中道義斯與楞嚴圓覺經說奢摩陀三摩鉢提禪那三觀名目雖殊其致一也亦曰三諦天然之性德也中諦者統一切法真諦者泯一切法俗諦者立一切法舉一即三非前後也含生本具非造作之所得也

秘藏不顯蓋三惑之所覆也無明翳乎法性塵沙障乎化導見思阻乎空寂然茲三惑乃體上之虛妄也由是立乎三光破乎三惑證乎三智成乎三德空觀者破見思惑證一切智成般若德假觀者破塵沙惑證道種智成

解脫德中觀者破無明惑證一切種智成法身德非各別也非異時也天然之理具諸法故然茲三諦性之自爾窮理盡性故與禪宗異而非異也行者念佛之時意根爲因白毫圓光爲緣所起之念即所生法諦觀念佛心

野五

起即是假名體之即空洞鑒此心有如來藏離邊顯中若根若塵並是法界諸佛衆生一念普應即邊而中無佛無念此乃大乘圓修三觀念佛也可謂無相無空無不空即是如來真實相

空觀念佛三昧無念法門

空觀念佛三昧者即祖師序云思專想寂志一不撓氣虛神朗無幽不徹入斯定者昧然忘知塵累頓消滯情融朗非天下至妙孰能與於此哉智者大師以空觀而蕩一切法故

云一空一切空無假無中而不空入此觀者是審實真諦也今欲令行人反妄歸真故謂之從假入空觀蓋假者是入空之詮先觀一切法是假乃至四大五蘊六根六塵六識盡十方世界山河大地皆無一物了知虛妄而

得會真故名二諦觀修此者先要攝心靜坐將世間一切虛妄不實境界盡情掃蕩俱不住着惟觀於空故般若經云內空外空內外空空空空亦不可得如是頓入如來寶明空海性覺真空即如來藏空性圓明靈光遍照

野五

九

法界性故如摩尼珠隨意出生如大溟海深廣含攝平等性智名佛知見可謂諸行無常一切空即是如來大圓覺

日觀念佛三昧專想法門

觀無量壽佛經云佛告希汝及衆生應

當專心繫念一處想於西方凡作想者一切衆生自非生盲有目之徒皆見日沒當起想念正坐西向諦觀於日令心堅住專想不移日欲沒時狀如懸鼓既見日已開目閉目皆令明了是為日想名曰初觀行人入此觀者

須於靜處屏絕外緣正坐攝心諦觀日輪現在目前注心一境凝然寂靜如對明鏡自觀面像心若馳散制之令還心息住定即得三昧可謂海底金烏天上日眼中瞳子面前人

叅禪念佛三昧究竟法門

遠祖師禪經序云禪非智無以窮其寂智非禪無以深其照禪智者照寂之謂其相濟也照不離寂寂不離照感則俱遊應則同趣慈照云寂而常照照而常寂常寂常照名常寂光念佛之人欲叅禪見性但依此法要於靜

室正身端坐掃除緣累截斷情塵瞠開眼睛外不着境內不住定回光一照內外俱寂然後密密舉念南無阿彌陀佛三五聲回光自看云見性則成佛畢竟那箇是我本性阿彌陀却又照觀看只今舉底這一念從何處起

觀破這一念復又觀破這觀底是誰○叅良久又舉念南無阿彌陀佛又如是觀如是叅急切做工夫勿令間斷惺惺不昧如鷄抱卵不拘四威儀中亦如是舉如是看如是叅忽於行住坐卧處聞聲見色時豁然明悟親見

野五

十

本性弥陀内外身心一時透脫盡乾坤大地是箇西方萬象森羅無非自己靜無遺照動不離寂然後興慈運悲接引未悟悲智圓融入無功用行得生上品名實報莊嚴土得一切種智可謂萬古碧潭空界月再三撈漉始

應知

攝心念佛三昧調息法門

大集經賢護品云求無上菩提者應修念佛
禪三昧偈云若人專念弥陀佛號曰無上深
妙禪至心想像見佛時即是不生不滅法坐

禪三昧經云菩薩坐禪不念一切惟念一佛
即得三昧初機修習未免昏散二病須假對
治人天寶鑑云凡修禪定即入靜室正身端
坐數出入息從一數至十從十數至百百數
至千萬此身兀然此心寂然與虛空等不煩
禁止如是久之息自住不出不入時覺此
息從毛孔中八萬四千雲蒸霧起無始已來
諸病自除諸障自滅自然明悟譬如盲人忽
然有眼爾時見徹不用尋人指路也今此攝
心念佛欲得速成三昧對治昏散之法數息

野五

十一

取要凡欲坐時先想己身在圓光中默觀鼻
端想出入息每一息默念南無阿弥陀佛一
聲方便調息不緩不急心息相依隨其出入
行住坐卧皆可行之勿令間斷常自密密行
持乃至深入禪定息念兩忘即此身心與虛
空等久久純熟心眼開通三昧忽尔現前即
是唯心淨土

一相念佛三昧專念法門

大般若經云曼殊室利白佛言菩薩修行何
法疾證無上菩提佛言菩薩能正修行一相
莊嚴三昧疾證菩提修此行者應離喧雜不
思衆相專心繫念於一如來審取名字善想
容儀即爲普觀三世一切諸佛即得諸佛一
切智慧天台十疑論云一切諸佛悉皆平等
但衆生根鈍濁亂者多若不專心繫念一佛

則心散漫三昧難成故專令念阿彌陀佛即是一相三昧寶王論云修持一相念佛三昧者當於行住坐卧繫念不忘縱令昏寐亦繫念而寢覺即續之不以餘業間斷不以貪嗔等間隔隨犯隨懺悔不隔念不異念不隔日不隔時念念常不離佛念念清淨圓明即是得一相三昧也可謂是若了一萬事畢

六時念佛功德回向法門

遠公祖師東林結社僧俗同修大智上賢深入禪觀得念佛三昧中流之士六時修禮淨土回向西方唐有詩云遠公獨刻蓮花漏猶向山中禮六時凡修此法先於淨室安置佛像香花燈燭隨分供養澡浴塵垢着清淨衣每日於日初時日中時日沒時夜初時夜半時夜終時對三寶端身合掌信禮西方每

野五

十二

一時目觀慈容稱念南無阿彌陀佛聖號一千遍禮佛四十八拜念西方文發願回向每日晝三夜三六時行道精專不倦志意修持堅固行願淨業圓成他日必得中品中生矣

懺罪念佛功德繫念法門

大彌陀經云我作佛時十方無央數世界諸天人民聞我名號燒香散花燃燈懸繒飯食沙門起立塔寺齋戒清淨益作諸善一心繫念於我雖止於一晝夜不絕亦必生我刹不得是願終不作佛又云我作佛時十方無央數世界諸天人民以至蜎飛蠕動之類前世作惡聞我名號即懺悔為善奉持經戒願生我刹壽終皆不經三惡道徑遂往生一切所欲無不如意不得是願終不作佛凡修持者先當嚴淨壇場燒香然燈廣設供養請一比

丘及諸上善人同壇尊證白佛陳意絕慮去憂勿預家事勿近內人齋戒修持繫念彼佛名號一晝一夜每佛一千聲誦彌陀經一卷如是三次志心懺悔回向云我今自憶有生以來造諸惡業願此念佛功德得入如來大

野五

十三

誓海中承佛慈力眾罪消滅冤尤釋除三業所生一切諸善莊嚴淨願福智現前願得臨命終時自知時至身無病苦心不顛倒如入禪定於一念頃徑生西方極樂國土見佛接引於七寶池中蓮花臺上蒙佛授記得聞經

法頻開佛慧廣度眾生滿菩提願可謂水句石邊流出冷風從花裏過來香

晨昏念佛功德信願法門

在家菩薩奉佛持戒逐日營辦家緣未能一心修行者須是早起焚香恭承三寶隨意念

佛每日黃昏亦如是禮念以為常課如或有幹失時次日當自對佛懺既此之法門要且不妨本業為士者不妨修讀為農者不妨耕種為工者不妨作務為商者不妨買賣晨叅夕禮之外更能二六時中偷那工夫持念佛號百聲千聲志誠為功期生淨土回向云弟子某禮念功德願命終時徑生淨土蓮花池畔親見弥陀寶樹行中相逢善友普為父母師長法界眾生同滿此願可謂積塵成巨嶽滴水漸成河

簡徑念佛功德十念法門

慈雲式懺主云在俗人塵務忙冗每日清晨服飾已面西合掌念南無阿弥陀佛盡一口氣為一念如是十念但隨氣短長氣極為度其念佛聲不高不低調停得中如此十念連

續不斷意在令心不散專精為功顯是藉氣
束心也回向云某一心皈命西方阿彌陀佛
願以淨光攝我我今稱如來名經十念頃求
生西方佛昔本誓若有衆生欲生我刹十念
我名若不生我國者我誓不成佛今以十念
功德願命終時心不顛倒於一念頃生極樂
國聞佛妙法速證菩提可謂信心如不退決
定禮金僊

野五

十四

慈照宗主圓融四土選佛圖序

夫寂光同居一智無殊情生彼此見有親疎
覲面了色空性如如本無二路自見妙麗吾
不如是一體毘盧先須識本免被茶糊行有
行相智有智模顚有願力進有程途惺惺寂
寂如淨明珠照徹心體九聖同途四土合敵
三身一如頭頭淨土處處阿彌且山僧因見

四土混託無綸智轉行融致使利鈍不分因
果俱失只言淨土不知淨土高低只說唯心
不知心之深淺故見諸家相毀各執一邊誰
知自破宗風非魔能壞今則略開一線述出
四圖削去迷情頓明心地然後河沙法界該

收一紙之中無量法門出乎方寸之內耳

圓融四土總相之圖



自性彌陀佛
唯心淨土機
悟來唯一念
迷後歷三祇
野五十五
折攝二門設
聖凡一路歸
世情看冷勝
人面逐高低

三光具足

如摩序出身



九聖同居土

凡聖情差智有殊
須憑修證契昆盧
恐人易一行疲倦
權指西方住半途
橫出三界少人知
易修易往勿狐疑
塵垢未除求解脫
一心信願念阿彌
臨終正念分明去
三朝七日預知時
既生淨土常聞法
何愁不得悟心機

願三宗勝	情具	十橫	須陀洹	八九
不德用劣	未見	成就	及其人	尺聖
退迷體應	除未	生就	天所見	身之居

此土但有信願念佛不斷煩惱不捨家緣不修禪定臨命終時彌陀接引皆得往生淨土便獲神通得不退轉直至菩提凡聖同居土者乃自他受用三光是總攝四土九品化生緣理後三土皆在其中不別出而稱引下下品者蓋祖師明其易修易往也其餘品位高低各隨行願脩證而成也

如星之光



方便勝居士

如邊功出身

斷除煩惱絕蹤由
滅智灰心罷便休
實所不能前進步
如來方便故相留
豎出三界聲聞性
煩惱塵勞急斷除
入定四禪頻觀鍊
永超凡世不還歸

行解	體勝	一破	豎八	四果	六丈
不脫	用應	切見	出關	聞弟子	金漢
德宗	身智	思等	三界	等所見	身居

此土皆是定性小乘根性怕怖三界如虎鬼龍蛇破見思惑終貪嗔癡斷如來種如猿獨跳不顧後群偏執真沉空滯寂方便乘說大乘調伏

實報莊嚴土

如月之光



如科選出身

心法微微猶未遣
應知情盡始除根
貼肉汗衫既未脫
纖塵猶礙大乾坤
非橫非豎埋偏宜
三觀澄心進莫疑
一力未能超彼岸
依然還落聖賢機

智般	用圓	道破	塵三	橫非	八生
不若	宗滿	沙惑	心非	萬四	補薩
退德	身報	分破	備克	豎千	及諸
	智種	明破	生三	好相	所見
				居	

此皆是大乘圓修三觀十住十行十向十地等覺法身大士如塵若沙各各破無明分身十方相成道度脫衆生皆未究竟云云首教委明

如常寂光淨土

境智如絕證修

衡開透頂不思議但於當念絕

更無悶滯心頭
情真除息斷

思惟唯心淨唯心淨直下承當
第機智開惑破無煩惱這本
還源獨自知無心身滿塵

光之曰


如灌頂王子出身
一輪明月掛中秋

沙界任運攝將諸子歸

位	法	宗	清	一	破	一	衝	無	諸	法	果
退	身	體	淨	切	三	念	閑	上	佛	界	人
德	用	身	法	智	惑	不	透	正	所	身	居
				盡	生		真	見	身		


此土是最上乘境界惑盡情忘諸法不生般
若不生不生不生名大涅槃究竟居涅槃山
頂端居常寂光土名清淨法身毘盧遮那佛
名到彼岸亦名空劫以前自己也

東方




四土非方域
情生礙不通
悟迷分大小
淨穢隔西東
萬有形雖別
千機理自同
野五十七
昏風具一弗

西方



春風俱一拂
何處不花紅
大見始終無改
小見九品差殊
上智祇在一心
下智東西隔礙

北方



別求常寂光清知毘盧遮那徧切處善觀心者切萬法唯心本具耳

莫謂西方遠
西方在目前
雖云越十萬
曾不離三千
念佛繞開口
花池已種蓮
信心如不退
決定禮金僊
西方是取相欣
厭二門修若人
從此入得一切
處皆淨土


觀心四土




欲識天真佛
從來絕證修
不須外尋覓
但向自心求
悟後三身合
迷時四不周
莫生分別見
直下息心休

天終自覺光而常寂者矣也欲寂光而極寂光者菩薩也具足寂光而住持寂光者如來也常寂淨真離相等觀地見切處皆常寂光


西方四土




一心四土




圓融四土




恒沙四土




目前四土




三諦四土




迷悟四土




人人四土



相即四土



絕待四土



教是佛眼禪是佛心心若無眼心無所依眼若無心眼無所見心眼和合方辨東西禪教和融善知通塞當知機有利鈍法有開遮若定作一路收機都成謗法四門入郭都至府前四土修心各登彼岸聽教之士不可偏邪參禪之流應如是會權實方便運用在人惟宜事理融通不可執法而成病○聞思修三

憲戒定慧三學各要反本還源盡欲革凡成
聖今人不了各執一邊只說教不通禪禪不
通教本為去執反屬偏情平等修心却生分
別禪云黃花翠竹總是真如教云一色一香
無非中道勢至菩薩因念佛故自得心開智

野五

九

者大師誦法華經得見真法是處各存妙道
豈在喧爭今要凡心與身土和融念佛與禪
教一道入門雖別到底是同休起愛憎莫分
彼此各須究本勿競枝條不可執實而謗權
執權而謗實也

清涼國師云

塵勞業海 結識堅執 情盡見除 不勞收拾

夫法報應之三身寂光同居四土各要歸源
咸迴一路一身三身四土一土非後非前無
來無去情見有差非佛隱覆祇許心傳不通

言句周徧圓融無盡無窮一真無礙重更重
重帝珠莫喻梵網難同撥轉機關八達四通
不在伶俐唯假惺惺毘盧得道許汝便成永
絕生死即放光明若不擬議海晏河清

五分四土 主各三身 身土無有盡 情見恰如星

架無碍力 似在天輪 州皆見月 處處有光明

後頌

大道通天下 明眼幾盲州 州各道路 路合春秋

迷後三身別 悟來一也休 這般無彼此 莫把結總離

念佛提綱

本自無蹤無跡 方便與君拈出

有人問我何為 南無阿彌陀佛

念佛心開

因修三昧念彌陀 忽覩彌陀心上過

始覺行行皆寶所 方知土土悉交羅

禪教相成

天台賢首慈恩教
法門頭數無窮盡

達磨南山意不殊
不離毫端絕妙處

三身體同

三德秘藏及三身

舒卷臨機分不分

野五

二十

處處融通無罣碍

勿教一向作三人

三寶不異

佛法僧寶最為真
舉一即三三是一

豈異而今一點靈
莫教錯認定盤星

身土不二

毘盧即是寂光土
身土本來無二相

梵光即是大毘盧
皇城元是大京都

心佛無殊

此心即是彌陀佛
皆道蟾光有虧減

彌陀即是自心源
誰信從來日日圓

絕跡無相

一念圓明法界周
若也此中明了得

免向三祇着劫修
點微塵也不留

情盡宛然

毘盧海藏金無迹

寂光妙土亦無踪

劫火洞然毫末盡

青依舊白雲中

頭頭見道

寂光金寶及泥沙
了得箇中玄妙意

到處無心便是家
優曇花是白蓮花

處處逢源

心心念念彌陀佛
微塵刹海如星布

頭頭處處古毘盧
撮在山僧一畫圖

野五

三十一

廬山蓮宗寶鑑念佛正教卷第二

廬山蓮宗寶鑑念佛正宗卷第三

野六

東林禪寺蓮宗善法祖堂勸修淨業臣僧普度謹自編集

念佛正宗說

明教大師曰能仁之垂教也必以禪為宗而佛為祖祖者乃其教之大範宗者乃其教之

野六

大統大統不明則天下不得一其所詣大範不正則天下不得質其所證夫古今之學佛輩競以其所學相勝者蓋由宗不明祖不正而為患然非其祖宗素不明不正也後世學者不能盡考經論而校正之乃有束教者不

知佛之微旨妙在乎言外諸禪者不諒佛之所詮槩見乎教內紛然自相是非古今何嘗稍息予嘗探大藏或經或傳校驗其所謂禪宗者佛祖之心也佛說一大藏教未嘗不以心為宗也嗟乎衆生之根器異也又安得以

一法而明之我佛平等設化於是對其病而投其藥耳且夫淨土一宗念佛之法有實有權有頓有漸皆以顯如來所證之實理廓衆生自性之本源以念佛三昧攝一切人明心見性入於佛慧或問之曰念佛其可明心見性入佛慧乎予謂之曰心為萬法之宗操之在我則何道不成大勢至菩薩以念佛證無生忍究其因地純於念佛上用功念念無間打成一片所以道都攝六根淨念相繼得三摩地斯為第一蓋佛者心也念佛念心心心不二心既不二佛佛皆然一念貫通無前後際三際俱斷是真道場塵塵顯示刹刹全彰是謂入於如來正徧知海具足如來一切種智念佛之旨大畧如斯遠公祖師得是三昧而以此三昧示一百二十三人同修同證思

專想寂以至究竟吾祖於是深存遠圖大援群生且以晉地新經未來禪法甘露國所未聞實相宗本人有異說乃命弟子踰越葱嶺遠迎禪師究尋經本故明教大師定祖圖云秦僧智嚴於罽賓國懇請跋陀羅偕來諸夏

野六

二

傳授禪法初至長安後至廬山遂出禪經與遠公同譯譯成遠公為之序跋陀羅嘗謂遠公曰西土傳法祖師自大迦葉直下相承凡有二十七祖其二十六祖近世滅度名不如密多者所以繼世弟子曰般若多羅方在南天竺國行化以此慧燈次第相傳達磨多羅後為二十八祖我今如其所聞而說是義遠公聞跋陀羅言故序云達磨多羅西域之雋禪訓之宗寶林傳所謂跋陀羅嘗與遠公言其傳法諸祖世數固驗於禪經矣故張野序

遠公塔銘云心禪諸經出自廬山師每謂禪法精微非才莫授功高易進者惟念佛一門導之以止觀專之以淨業此儼修以凝神積習以移性入於如來無盡法門實由斯矣故此淨土之教至於天台智者大師乃示三觀

野六

三

證乎一心總綰三乘之要行普收五性之機宜直付觀行之真財悟入如來之知見故知念佛之要者由觀經為標指也斯經以佛國淨境為宗以觀智妙行為趣以實相彌陀為體以滅惡生善為用是知無量功德共莊嚴之種種勝行而歸趣之言說問答而詮辨之譬眾星之拱北辰如萬流之朝東海也是故韋提不經地位頓證無生五逆十念稱名便登極樂即圓頓教之所攝也此之念佛三昧法門權實頓漸折攝悟迷圓攝一切會歸真

宗猶車之有輪如鳥之有翼入道之由可謂至矣可謂盡矣是以集夫正受之方示彼修行宗要開明心目直指根源庶使念佛進修之士明其宗而不昧其祖也若夫一句當機淨土唯心顯矣

定明宗體

慈恩通贊云此方先德總判經論有其四宗一立性宗二破性宗三破相宗四顯實宗涅槃華嚴法華等是顯於真實中道義故捨化城而歸寶所等故彌陀經乃第四宗也依文判教教但有三以類准宗宗有其八一我法俱有宗二有法無我宗三法無去來宗四現通修實宗五俗妄真實宗六諸法但名宗七勝義皆空宗八應理圓實宗故華嚴及弥陀經是八宗收

李長者華嚴合論十種淨土權實宗體

夫滔滔智海茫茫莫究其涯淼淼真源蕩蕩罕尋其際遮那法界體相總括於塵沙方廣靈門淨穢互叅於無極但隨現修業用見境不同致使聖境乖違依根不定或權分淨土於它國指穢境於娑婆或此處為化儀示上方為實報文殊居東國金色世界而來觀音處西方安樂妙土而至如是權儀各別啓蒙的信無依今以略會諸門令使創修有托約申十種以定指南

野六

四

第一阿弥陀經淨土此為一分取相凡夫未信法空實理以專憶念念想不移以專誠故其心分淨得生淨土是權未實

第二無量壽觀經淨土此為一分未信法空實理衆生樂妙色相者令使心想彼色像

想成就故而生佛土此權非實

第三維摩經淨土佛以足指按地加其神力暫現還無是實報土未具陳廣狹是實未廣第四梵網經淨土雖說一大花王而有千葉一一葉上有百億化佛教化百億四天下衆

生然彼千葉及彼華王為三乘菩薩見未廣故分示報境未成圓滿是權未實

第五摩醯首羅天淨土如來於彼坐蓮花座成等正覺以為實報此閻浮提摩竭提國菩提場中成等正覺者是化此為三乘權教菩

薩染淨未亡者說此閻浮提及六天等是欲界有漏彼上界摩醯首羅天是無漏故心存染淨彼此未忘此為權教未為實說

第六涅槃經所指淨土如來有實報淨土在西方過二十二恒河沙佛土者為三乘權教

野

五

一分染淨未亡者言此三千大千世界總是穢土權惟如來報境淨土在西方此權非實第七法華經三變淨土此為三乘權教菩薩染淨未亡者言移諸天人置於他土是權非實

第八靈山會所指淨土此引三乘中權教菩薩染淨未亡者令知此土即穢即淨諸衆信可未能自見是實非權

第九唯心淨土自證自心當體無心性惟真智不念淨穢稱真任性心無罣碍無貪無癡

任大悲智安樂衆生是實淨土以自淨故令他亦淨是故維摩經云隨其心淨即佛土淨欲得淨土當淨其心是實淨土

第十毗盧遮那所居淨土即居十佛刹蓮花佛國土淨穢總含無穢無淨無有高下彼此

自他之相一一佛土皆充法界無相障隔畧言十佛塵刹國土為知無盡佛國不出一塵為無大小故不立限量故以法為界不限邊際相海純雜色像重重此實淨土非是權收

念佛參禪求宗旨說

慈覺贖禪師云念佛不礙參禪參禪不碍念佛法雖二門理同一致上智之人凡所運為不着二諦下智之人各立一邊故不和合多起紛爭故參禪人破念佛念佛人破參禪皆因執實謗權執權謗實二皆道果未成地獄先辦須知根器深淺各得所宜譬如管田人豈能開庫開庫人安可管田若教管田人開庫如跛足者登山若教開庫人管田似壓良人為賤終無所合也不若管田者且自管田開庫者且自開庫各隨所好皆得如心是故

野六

六

念佛參禪各求宗旨溪山雖異雲月是同可謂處處綠楊堪繫馬家家門首透長安

淨土非鈍根權說

天台思梵講主久居臨平山鮮行明峻深造教觀性相淵源每與士大夫往復隨有所問荅釋粲然一日有通判鄭公問曰教中所明念阿彌陀佛願生淨土此專為鈍根方便權說上根頓悟一超直入佛地豈假他佛淨土耶師云吾宗先達呵此說云佛在世文殊普賢佛滅後馬鳴龍樹此土智者大師智覺禪師皆願往生淨土應是鈍根乎若以此為權教將何為實耶昔孫莘老亦疑於此因會楊次公王劭中辯論遂息此疑信此淨土非聖人之權設是圓實之真宗也注念彼佛必生淨土斯乃稱性實言非權教也

真歇了禪師淨土宗要

弥陀不離衆生心是三無別極樂遍在一切處舉一全收如帝釋殿上千珠寶網千珠光影咸入一珠一珠光影徧入千珠雖珠珠互徧此珠不可為彼珠彼珠不可為此珠叅而

野天

七

不雜離而不分一一徧彰亦無方所弥陀淨土即千珠之一十萬佛國即一佛國各千珠之一聖人善巧方便示人專念弥陀佛乃十珠直指一珠見一佛即見十方諸佛亦見九界衆生微塵刹海十際古今一印頓圓了無餘法矣

寂室大師示淨土實見

不修淨業者云游心禪定悟性真宗或聞說淨土必曰淨土唯我心既淨則國土淨何用別求生處寂室曰且維摩經中云如來以

足指按地見娑婆國土悉皆嚴淨而衆會不見惟螺髻梵王得知今之說悟性者能如梵王所見淨土不況汝居卑室漏屋必羨之以大厦高堂脫粟藜羹者必羨之以珍羞上味弊袍短褐者必羨之以綾羅輕縠若云心淨土淨則不消如是分別也況當老病死苦世間違情之時顏色與未悟者同是則口唱心淨土淨之言身被穢土苦惱之縛其自欺之甚也不然應須信教仰理於淨土從而修之

大智律師示念佛事理不二

師嘗為慈慧文法師作淨土集序其畧曰古今學佛多惑事理謂理則纖塵不立言事則萬象森羅疑心住寂則為理動用操修則為事遂引古云實際理地不受一塵佛事門中不捨一法斯廼理事敵立空有並馳予嘗變

其語曰實際理地不少一塵佛事門中不存一法何則由實際理具一切法豈少一塵乎由佛事門離一切相豈存一法乎如此方見理事一如空有不二矣

文法師淨行序念佛宗要

野六

八

夫達無心之有心識有念之無念有無不住能所胡存是則念念圓明心心虛寂苟昧斯旨則法法成疣的契其宗則門門通妙今可無乖實際而示圓修俾負重致遠者獲遂於息肩流浪迷津者速登於彼岸求生西方無先念佛觀門者也予輒為修淨業者薄採經論大綱述成西方淨行法門示彼所修令得其趣有觀茲文而復不能起信修行者類乎狂熱投圍唯露一髮欲垂拯救未如之何

廬山蓮宗寶鑑念佛正宗卷第三

音釋

雋

徂充切
肥肉也

廬山蓮宗寶鑑念佛正派卷第四章_{二十} 野七

念佛正派說

佛由心造道在人弘弘道之要無先乎念佛念佛則是正心正心故能合道道之宗極曰佛也佛者覺也一切衆生有此本覺之性因

野七

一念有差所以不覺裴相國云終日圓覺而未嘗圓覺者衆生也具足圓覺而住持圓覺者如來也是故薄伽梵成道摩竭陀說有談空觀根逗教於諸法之外別開念佛一門截衆苦之根源入聖流之要路故經云從是西

方過十萬億佛土有世界名曰極樂其土有佛號阿彌陀國中無三毒八難有七寶衆妙莊嚴以法爲身群聖爲友苟能誠信發願歸心彼土者即得往生出乎三界九有之表證諸佛無上妙道其言無所欺也粵自大教東

流至佛圖澄而盛由澄而得道安安之門有遠公戒珠義海龍姿鳳章於是教門綱紀從茲大備師著念佛三昧詠親勸于時晉賢慕師之德爭趨正覺之場同究斯道名動帝王道尊一代彌天推爲高弟羅什結爲勝友識量廣大獨出於古今矣至夫抗言爲道爲萬世宗師垂裕於人天者遠公也隋有智者魏有曇鸞唐有善導大振宗風宋有坦公疏詮甘露省常結社慈覺勸修壽禪師融萬善以同歸元宗主撮諸經而成懺廣施方便曲盡慈悲故我祖師欲令大地衆生見本性彌陀達唯心淨土普皆覺悟菩提之妙道乃立普覺妙道四字爲定名之宗觀夫四字一鏡洞照無邊同一體用何以知其然總而言之喻如人之一身而有頭目手足爲其用也未嘗

有一而可分也自非願廣悲深而孰能取信於天下後世哉竊嘗論之曰等衆生界名曰普智達斯理名曰覺德用無邊名曰妙千聖履踐名曰道又普者即自心周徧十方之體也覺者即自心智照不迷之用也妙者即自

野七

二

心利物應機之行也道者即自心通達中正之理也恒沙諸佛所證者此道也歷代祖師所得者此道也十方生淨土者已學此道也未來修行者當學此道也又況諸佛菩薩示現世間作大導師各有悲願不捨衆生或爲

王臣將相居士宰官出俗在家逆行順化莫不以斯道而覺斯民也三界群生輪轉飄末至於今日往來六道如蟻璇磨無有出期大覺垂慈故設方便以誘導之俾夫趣吾之所趣吾之所趣者非六道非三乘乃如來正覺

之趣得吾所趣之道者亦以此道化乎未趣趣此所趣譬如一燈燃百千燈續焰分輝騰今耀古此念佛之宗正心之法正夫群生歸夫正道者矣彼彼相傳於無盡故名無盡燈也普覺妙道之說豈徒言哉蓋謂人人皆可

作佛不以僧俗之聞不以利鈍之分無彼此無高下等一性而已得之爲悟失之爲迷同一理而已迷而爲凡悟而爲聖迷者事隔理不隔也失者自失性不失也是知修念佛三昧者則是正其心也此心正則性順理也得

野七

三

性順理則六塵不能染萬境不能移動用於一虛之中寂寥於萬化之域不動本處而周遊十方超乎極樂之地升乎寂光之堂居乎涅槃山頂朝乎無上法王普覺妙道正心之義其至矣乎不知此義者功何所施智何所

發譬彼無目之人昧於日月之光履於重險之處墮坑落塹可勝紀乎噫去聖時遙人多謬解雖其正道悉陷邪宗庸昏之徒含識而已致使群邪詭惑諸黨並熾是非蜂起空有云云夾截虛空互相排毀有著於事相不肯捨者有順於應緣不自覺者有守枯木而言定者有恃聰明而稱慧者有奔走非道而言能者有假於鬼神而言通者有身心放曠而言無礙者有口耳潛傳而言秘訣者有執我宗普字覺字者有言彼宗妙字道字者是皆私偷此鏡入彼邪域致爲塵垢蔽蒙不明宗體雖得此鏡之名而不得其用也殊不知慈照立此四字深有意焉昧者不知執之失度况又有言在家爲彌陀教出家爲釋迦教者自尊爲祖執法爲宗存彼此之執心觸途成

滯局偏邪之劣解是已非他使我曹爲佛祖後裔而不能破其執遺其惑則何以揭慧日於昏衢哉痛心佛祖慧命懸危甚於割身肉也念報佛祖深恩寢食不遑安處也念諸方佛子錯路修行不啻倒懸也雖未能盡古人之萬一然此心不欺也予嘗切切於是謹按高僧傳記遍求前哲真踪究其源摘其實理之所當事之所存者集而出爲虧者補之冗者削之隱者明之斷者引之庶千載之下修淨業者因言思道飲水知源識古聖之遺風

野七

四

體先宗之標格紹隆佛種光闡徽猷壽慧命於無窮傳真燈而有永前不云四字一鏡洞照無邊乎體斯道者慎勿忽諸

遠祖師事實

師諱慧遠鴈門樓煩人今河東代州姓賈氏

生於石趙延熙甲午歲爲晉成帝咸和九年師十二歲從舅氏令狐遊學許洛博通六經尤通周易莊老之書二十一歲欲渡江與范宣子俱隱值中原兵戈塞路聞道安法師居太行山遂與弟慧持俱投之聽講般若經豁然大悟嘆曰儒道九流皆糠粃耳與弟投簪落髮常以大法爲己任安嘆曰使道流中國其在遠乎孝武帝太元九年至廬山以杖卓地曰有泉當住忽泉迸出乃誅茅爲庵講涅槃經感得山神獻靈資助材木雷雨闢地江

州太守驚其神異奏立東林寺名其殿曰神運太元十一年寺成師以東南經律未備禪法無聞乃於寺內別置禪室請一禪師率衆習禪令弟子逾越沙漠求禪經庶江表四輩咸皆得以修習願使大乘之化自北而南每

野七

五

謂禪法深微非木莫授入道要門功高易進者念佛爲先師徒衆往來三千真信之士一百二十三人乃與劉遺民等十八賢爲上首於無量壽佛像前建齋立誓同修西方淨土結白蓮社遺民者發願文師自製念佛三昧

叙謝靈運恃才傲物一見師肅然心服鑿池種蓮求入社師以心雜止之山多蛇有行者不知何許人嘗侍於師善驅蛇至今號辟蛇聖者師所居流泉寺寺下入虎溪每送客以溪爲界時陶淵明陸修靜師嘗送之語道契合不覺過溪相與大笑後世因傳三笑圖馬時羅什法師通書稱師爲東方護法菩薩外國衆僧咸稱漢地有大乘道士每燒香禮拜東向稽首獻心廬嶽姚主欽承道德信向連接晉安帝隆安元年桓玄勸帝沙汰僧尼謂

廬山爲道德所居不在搜簡師以書抵玄得
並免元興元年玄又申庾冰之議欲沙門盡
敬王者復以書辯論其事遂免安帝自江陵
旋京輔國何無忌勸師候迎稱疾不起帝遣
使勞問師表以聞帝優詔荅之義熙乙卯十

一月初一日師入定至十七日出定見阿彌
陀佛紫磨黃金身徧滿空界龍舒淨土文載
遠公三觀聖相沉厚不言師三十年影不出
山跡不入俗丙辰八月初一日示疾至六日
困篤大德耆舊請飲豉酒不許又請以蜜水
乃命律師檢藏未見而集諸徒遺戒曰吾自
知命之年托業此山自審有畢盡之期乃絕
跡外緣以求其志不覺形與運類已八十三
矣時至欲厝骨于松林之下即領爲墳與土
木同狀此古人之禮汝等勿違苟使神理不

野七

六

昧庶達其誠大哀世尊亦當祐之以道言訖
而逝門人與潯陽太守及官屬奉全軀葬于
西嶺壘石而塔焉安帝謚廬山尊者鴻臚大
卿白蓮社主凝寂之塔謝靈運立碑以銘其
德張野序之有匡山集十卷行于世

遠祖師歷朝謚號

晉安帝義熙年謚廬山尊者鴻臚大卿白蓮

社主

唐大中戊辰年謚辯覺大師

南唐昇元三年謚正覺大師

宋太平興國三年謚圓悟大師

宋乾道二年謚等徧正覺圓悟大法師

明教大師題遠祖師影堂記

遠公事蹟學者雖見而解能盡之使世不昭
昭見先賢之德亦後學之過也予讀高僧德

蓮社錄及九江新舊錄取愛遠公六事謂可以勸乃引而釋之列之其影堂以示來者陸修靜異教學者而送過虎溪是不以人而弃言也陶淵明耽酒于酒而與之交者蓋簡小節而取其達也跋陀高僧以顯異被擯而延

野七

七

且譽之蓋重有識而矯嫉賢也謝靈運以心雜不取而果殂於刑蓋識其器而慎其終也盧循欲叛而執手求舊蓋自信道也桓玄震威而抗對不屈蓋有大節也大凡古今人情莫不畏威而苟免忘義而避疑好名而昧實

黨勢而忍孤飾行而畏累自是而非人孰有道尊一代爲賢者師肯以片言而從人乎孰有宿稟勝德爲行耿絜肯交醉鄉而高其達乎孰有屈人師之尊禮斥逐之客而伸其賢乎孰有拒盛名之士不與於教而克全終乎

孰有義不避禍敦睦故舊而信道乎孰有臨將帥之威在殺罰暴虐之際守道不撓而存其節乎此故遠公識量廣大獨出於古今若夫荷負至教廣大聖道垂裕於天人非蒙乃能盡之其聖歟賢耶偉乎大塊噫氣六合風

清遠公之名聞也四海秋色神山中聳遠公之清高也人龍僧鳳長揖巢許遠公之風軌也白雲丹壑玉樹瑤草遠公之棲處也蒙後公而生雖慕且恨也瞻其遺像稽首作禮願以弊文書于屋壁

廬山十八大賢名氏

遠公祖師

諱慧遠姓賈氏廬門樓煩人

永法師

諱慧永姓繁河內人

持法師

諱慧持遠公弟也與兄俱事道安法師

生法師

諱道生出魏氏鉅野人客居彭城世承冠

佛陀耶舍尊者

此云覺明劉賓國婆羅門種

佛陀跋陀羅尊者

此云覺賢甘露瓶王之裔

叡法師

諱慧叡冀州人

順法師

諱曇順黃龍人

敬法師

諱道敬琅琊王氏隨祖疑之守江州

野七

恒法師

諱曇恒河東人童子出家不知姓氏

曷法師

諱道曷潁川陳氏

詵法師

諱曇詵廣陵人不知姓氏

劉遺民

諱程之字仲思彭城聚里人漢楚元王之後

散騎常侍雷公

諱次宗字仲倫南昌人

太子舍人宗公

諱炳字少文南陽人

治中張公

諱野字萊民

散騎常侍張公

諱詮字秀頌萊民族也

通隱處士周公

諱續之字道祖廬門廣武人

貫休禪師題十八賢影堂詩

白藕池邊舊影堂劉雷風骨盡龍章共輕天子諸侯貴惟愛吾師一法長陶令醉多招不得謝公心亂入無方何人到此思高躅風點苔痕過短牆

辯遠祖成道事

禮記曰先祖無美而稱之者是誣也有善而弗知者是不明也知而不傳者是不仁也此三者君子之所耻也噫在吾學佛之徒豈不然耶吾祖遠公行位昭昭功德廣大愚忝與其教爲末流之裔不肖孤陋學賤才疎未能

野七

九

紹襲先宗實乃有孤慈廕嘗讀明教記不亦甚慙乎又嘗觀石室琇禪師通論云去孔子百年而有孟軻是時孔子之道幾衰焉軻於是力行其道而振起之伏自佛教東流凡三百年而有遠公是時沙門寢盛然未有特立

猥行憲章懿範爲天下宗師如遠公者佛道由之始振蓋嘗謂遠公有大功於釋氏猶孔門之孟子焉與高僧朝士同修淨杜道勳帝王法流天下後之所習念佛者不知吾祖之本末失其源流多見世之薄福闡提革偽撰

廬山成道記裝飾虛辭盡是無根之語誑惑善信遍傳在人耳目逮今不能改革予乃叅考大藏弘明集高僧傳察其詳要略舉七事以破群惑識者鑒之遠公禮太行山道安法師出家妄傳師梅檀尊者一誑也妄以道安

爲遠公孫者二誑也遠公三十年影不出山足不入俗妄謂白莊劫擄者三誑也晉帝三召遠公稱疾不赴妄謂賣身與崔相公爲奴者四誑也道安臂有肉釧妄爲遠公者五誑也臨終遺命露骸松下全身在西嶺見在凝

寂塔可證妄謂遠公乘彩船升兜率者六誑也道生法師虎丘講經指石爲誓石乃點頭妄謂遠公者七誑也悲夫世之姦佞不知祖師實德道聽途說妄裝點許多不遜之事播醜於後世取笑於四方謗瀆聖德識者見之

不察其所由得不輕侮於吾祖師耶豈非出佛身血五逆罪乎嘗觀宋元嘉中僧才觀惠嚴謝靈運翻涅槃經增損其辭因夢神人訶之曰敢以凡情輕瀆聖典觀等懼而止又惠琳以才學幸帝時號黑衣宰相自著白馬論

野七

十

毀佛教即感惡疾膚肉糜爛而死夫如是則妄造祖師傳記三途地獄可不懼乎凡吾同志群審遠公實跡從本至末痛告諸方光楊祖道庶先聖之屈於斯雪矣

壁谷釋曇鸞大師

臺鸞大師少遊五臺識其靈異遂乃出俗三
乘頓漸具開定慧嘗稱疾行至汾州俄見雲
陰陡盡天門洞開六欲階位上下重複鸞方
瞬目疾乃隨愈鸞於是切用心佛道常如不
及開蒙誘俗無間遠通初鸞好爲術學聞陶

隱居得長生法涉遠就之陶以仙經十卷授
鸞鸞躍然自得以爲神仙之術其必然也後
還洛下遇菩提留支意頗得之問支曰佛道
有長生乎其能却老爲不死乎支笑而對曰
長生不死吾佛道也即以觀無量壽經授之

曰汝可誦此則三界無復生六道無復往盈
虛消息吉凶成敗無得而生其爲壽也有劫
石焉有河沙焉沙石之數有極壽量之數無
期此吾金僊氏長生也鸞承其語驟起深信
遂焚所學仙經而專觀經焉每於觀經得其

野七

十二

義理修三福業想像九品雖云寒暑之變疾
病之來不懈于始念魏主憐其志尚又嘉其
自行化他道業弘廣號爲神鸞勅住并州大
嚴寺未幾移住汾州玄中寺一夕鸞正持誦
一梵僧軒昂而來入其室曰吾龍樹也所居

淨土以汝有淨土之心故來見汝鸞曰何以
教我樹曰已去不可及未來未可追現在今
何在白駒難與回言訖而失鸞以所見勝異
必知死生之期屆矣即集弟子數百人盛東
教誠言其四生役役其止無日地獄諸苦不
可以不懼九品淨業不可以不修因令弟子
齊聲高唱阿彌陀佛鸞乃西向瞑目頓顙而
示滅是時道俗同聞管絃絲竹之聲由西而
來良久乃寂

天台智者大師

師諱智顗字德安姓陳氏潁川人母徐氏夢香烟五彩繞身有孕誕生之日神光煥室目有重瞳眉分八彩孩幼見像即禮逢僧必拜十八歲投湘州果願寺出家誦法華經兼通律藏性樂習禪遂往大蘇山禮慧思禪師北

面事焉思師一見乃曰昔日靈山同聽法華宿緣所追今復來矣因授與法華三昧三七日誦經至於藥王本事品是真精進是名真法供養至此句時身心豁然寂而入定照了法華若曦和臨於萬象達諸法相如清風遊

於太虛將證白師師曰非汝不證非吾莫識汝所證者是法華三昧前方便得旋陀羅尼汝於說法人中寂爲第一後弘法鄴都屈伏時匠晚入天台降魔進行化緣既息於新昌大石像前示疾告滅弟子請問生方乃曰吾

諸師友皆從觀音而來迎我及夜侍人見有佛至倍大石像臨終說諸法門令唱無量壽經及觀經題目乃顧大衆合掌讚曰四十八願莊嚴淨土華池寶樹易往無人火車相現一念改悔尚得往生況戒定熏修聖行道力

實不唐捐言訖稱三寶名奄然而滅後有僧求知生處乃夢觀音金容數丈智者從後而語僧曰汝疑決不再驗智者生西方矣

京師善導和尚

釋善導唐貞觀中周遊寰宇求訪道津見西河綽禪師行方等懺及淨土九品道場講觀經導大喜曰此真入佛之津要修餘行業迂僻難成唯此觀門速超生死吾得之矣於是篤勤精苦若捋頭然續至京師擊發四部弟子無問貴賤俾屠沽輩亦激悟焉導每入佛

室合掌胡跪一心念佛非力竭不休乃至寒冷亦須流汗此相狀表於至誠出即爲人說淨土法化諸道俗令發道心修淨土行無有暫時不爲利益二十餘年無別寢處不暫睡眠除洗浴外未嘗脫衣般舟行道禮佛方等

野七

十三

專爲已任護戒持品纖毫不犯未嘗舉目視女人絕意名利遠諸戲笑所行之處淨身供養飲食衣服四事饒益皆不自享並將迴施好食送大廚供養徒衆唯食麤惡以自支身乳酪醍醐皆不飲取諸有襯施將寫阿彌陀

經十萬餘卷所畫淨土變相三百餘壁所至見壞伽藍及故磚塔寺皆悉營造燃燈續明歲不絕三衣瓶鉢不使人持洗始終無改化諸有緣每自獨行不共衆去恐與人行談論世事妨修行業其有暫申禮謁聞說少法或

得同預道場親承教訓或曾不見聞披尋教義或展轉授淨土法門者京華諸州僧尼士女至有投身高嶺或委命深泉或自墮高枝焚身供養略聞遠近百餘人諸修梵行棄捨妻子誦阿彌陀經十萬至三十萬遍者念阿彌陀佛日得一萬五千至十萬遍者及得念佛三昧往生淨土者不可知數或問導曰念佛之善生淨土耶對曰如汝所念遂汝所願於是導乃自念阿彌陀佛如是一聲則有一道光明從其口出十聲至千百聲光亦如之導謂人曰此身可厭諸苦逼迫情僞變易無暫休息乃登所居寺前柳樹西向願曰願佛威神驟以接我觀音勢至亦來助我令我此心不失正念不起驚怖不於彌陀法中少生退墮願畢於其樹上端身立化時京師士大

夫傾誠歸信咸收其骨以葬高宗皇帝知其念佛口出光明又知捨報之時精至如此賜寺額爲光明焉天竺式懺主畧傳云阿彌陀佛化身自至長安聞涯水聲和尚乃曰可教念佛遂立五會教廣行勸化人有至信者見

野七

十四

和尚念佛佛從口出三年後滿長安城內皆受化念佛事見別傳後有法照大師即善導後身也德宗時於井州行五會教化人念佛帝於長安常聞東北方有念佛聲遣使尋覓至大康果見照師勸人念佛遂迎入內用劉

球繩牀教宮人五會念佛事彰本傳矣

金臺法照大師

師諱照唐大曆二年棲于衡州雲峯寺慈忍戒定爲時所歸一旦於僧堂食鉢中覩五色雲雲中有寺寺之東北有大山山有澗澗北

有石門門去可五里復有一寺金榜題曰大聖竹林寺照雖目覩而其心內尚懷隕穫他日食時復於鉢中見五色雲雲現數寺無有山林穢惡純金色界池臺樓觀衆寶間錯萬菩薩衆而處其中中有諸佛嚴淨國土種種

勝相照欣所見因訪問之有嘉延曇暉二僧曰聖神變化不可以凡情測若論山川面勢乃五臺尔四年夏照於衡州湖東寺啓五會念佛道場其年六月二日五色祥雲彌覆其寺雲中亦有樓閣閣上有數梵僧身可丈餘

野七

十五

執錫行道又見阿彌陀佛與二菩薩其身高大等虛空界日既暮矣照於道場之外遇老人曰汝先發願於金色界禮覲大聖今何輒止照曰時艱路難不止如何老人曰但能亟去則去之何其艱也照未暇對老人失馬照

以所見勝異重發願曰願以此身奉覲大聖雖復火聚冰河終無退惰其年八月十三日與同志數人由南嶽前去果無艱險五年四月五日至五臺縣遙見寺南有數道光六日達佛光寺一如鉢中所見畧無差脫是夜四

更復有異光北來射照照不知所裁乃問曰此何祥也吉凶焉在僧云此大聖不思議光攝汝身心何乃問也照聞之即具威儀前詣一寺寺之東北可五里果有山山有澗澗北有石門門傍有二童子一稱善財一稱難陀

引照入門北行幾五里見一金門門上有樓其樓之側復有一寺寺門有大金榜題曰大聖竹林寺寺之方圓可二十里一百餘院院院皆有寶塔黃金爲地華臺玉樹充滿其中照入寺之講堂見文殊在西普賢在東皆距

師子高座照於二菩薩前作禮問曰末代凡夫智識淺劣佛性心地無由顯現未審修行於何法門最爲其要惟願大聖斷我疑網文殊曰汝所請問今正是時諸修行門無如念佛我於過去劫中因念佛故得於一切種智

是故一切諸法般若波羅蜜多甚深禪定乃至諸佛正徧知海皆從念佛而生照曰當云何念文殊曰此世界西有阿彌陀佛彼佛願力不可思議汝當繼念令無間斷命終之後決定往生說是語時二大菩薩舒金色臂以

野七

六

摩照頂與授記曰汝以念佛不思議故畢竟證無上覺若善男女願疾出離應當念佛時二菩薩互說伽陀照得聞曰益加踊躍文殊又曰汝可往詣諸菩薩院巡禮以承教授照如其言歷請教授次至七寶華園從其園出

於大聖前作禮辭退且見向者善財難陀二童子送至門外照復作禮舉頭俱失至十三日照與五十餘僧往金剛窟無著見大聖處忽見其地廣博嚴淨琉璃衆寶以成宮殿文殊普賢可萬菩薩佛陀波利亦在其中照得見已隨衆歸寺其夜三更於華嚴院之西樓又見寺東岩壑之畔有五枝燈大方尺餘照曰願分百燈以歸一面燈分如願重願分爲千炬炬亦如之行行相當光光相涉光中殊異徧於山野照又前詣金剛窟願見大聖殆

其三更見一梵僧自稱佛陀波利引之入寺至十二月朔日於華嚴院入念佛道場中載念文殊普賢二菩薩謂我畢竟證無上覺又復記我念阿彌陀佛決定往生於是一心念佛正念佛時倏見前來梵僧入道場云汝之

野七

十七

淨土華臺現矣後三年華開汝當往矣然汝所見竹林諸寺何爲不使群生共知照聞之憶念昔時所見因得命匠刻石兼於所見竹林寺處特建一寺號竹林馬寺之云畢照曰吾事畢矣吾豈久滯於此不累日而卒焉

睦州少康法師

師縉雲仙都人母羅氏游鼎湖峯得玉如捧青蓮華授之且曰此華吉祥授之於汝當生貴子及生康日青光滿室香似芙蕖年十有五誦法華楞嚴等經五部尋往越學究毗尼及聽華嚴瑜珈諸論貞元初至洛下白馬寺見殿內文字累放光明康不能測即探而取之乃善導昔爲西方化導文也康曰若於淨土有緣當使此文光明再發此願未已果重閃爍康曰劫石可移而我之願無易也遂之

長安善導影堂大陳薦獻倏見善導現於空中謂康曰汝依吾教利樂有情則汝之功當生安養康聞如有所證南適江陵果願寺路逢一僧曰汝欲化人念佛當往新定言訖而隱泊到睦州人未從化康乃乞錢誘引小兒

四能念阿彌陀佛一聲與汝一錢小兒務得其錢念佛者衆師曰念佛十聲乃與一錢如是一年大小貴賤凡見康者則曰阿彌陀佛於是念佛之人盈溢道路貞元十年康於烏龍山建淨土道場築壇三級聚人午夜行道

入道場時康自陞座令男女弟子面西高聲念阿彌陀佛衆見師念佛一聲佛從口出連念十聲若聯珠狀康曰汝等見佛不如見佛者決生淨土其禮佛人亦有不見佛者貞元二十一年十月三日囑累道俗當於安養起

野七

十八

增進心於閻浮提生厭離想此時見佛真我弟子言訖放異光數道奄然而逝塔於臺子岩天台德韶禪師重新之後之人多指其塔爲善導焉

省常大師

師諱省常字造微顏子氏錢塘人十七歲出家受具戒行謹嚴通大乘起信習天台止觀法門續廬山遠公遺風宋淳化中住杭州西湖昭慶寺專修淨業結淨行社相國向公王文正公旦爲社首士大夫預會皆投詩頌自稱淨行弟子師乃自刺指血和墨書華嚴經淨行品每書一字三拜三圍達三稱佛名刊板印成千卷分施千人又以栴檀香雕造毗盧遮那佛像或而跪地合掌發誓願云我與一千大衆八十比丘始從今日發菩提心窮

未來際行菩薩行願盡此報身以生安養國翰林承旨宋白撰碑翰林學士蘇易簡作淨行品序狀元孫何題杜客於碑陰孤山圓法師作師行業記中引蘇公序曰予當布髮以承其足剗身以請其法猶無嗔恨况陋文淺

野七

十九

學而有恪惜哉宋公碑曰師慕遠公啓廬山之淨社易蓮花爲淨行之名遠公當衰季之時所結者半隱淪之士上人屬昇平之世所交者多有德之賢方前則名士且多垂裕則津梁曷已因二公之言想當時之盛亦可槩

見矣天禧四年正月十二日示寂壽六十二

長蘆慈覺禪師

師諱宗曠號慈覺襄陽人也父早亡母陳氏鞠養於舅氏少習儒業志節高邁學問宏博二十九歲禮真州長蘆秀禪師出家叅通玄

理明悟如來正法眼藏元祐中住長蘆寺迎母於方丈東室勸母剪髮甘旨之外勉進持念阿彌陀佛日以勤志始終七載母臨終際果念佛無疾吉祥而逝師自謂報親之心盡矣乃製勸孝文列一百二十位撰葦江集坐

禪箴以遵廬山之規建蓮花勝會普勸僧俗同修念佛導以觀想其次立法預會日念阿彌陀佛自百聲至千聲千聲至萬聲回向發願期生淨土各於日下以十字計之以辨功課師一夕夢一人烏巾白衣風貌清美可三

十許揖謂師曰欲入蓮花會告書一名師乃取會錄問曰何姓名荅曰普慧書已白衣又云家兄亦告上一名師曰令兄何名荅曰普賢言訖遂隱師覺已謂諸耆宿曰華嚴經離世間品有普賢普慧二菩薩助揚佛法吾今

建會共期西方感二大士幽贊乃以二大士
爲會首云於是遠近皆嚮化焉

永明壽禪師

師名延壽字冲玄號抱一子丹陽人父王氏
生而卓異父母有諍即從高榻奮身于地二

野七

三

親息諍長爲儒十六歲獻吳越王齊天賦衆
推間世之才欲出家父母不聽遂刺心血濡
毫斷葷終期副心三十四歲依龍冊寺永明
大師落髮受具朝供衆夜習禪因覺智度論
云佛世一老人求出家舍利弗不許佛觀此

人曩劫採樵爲虎所逼上樹失聲念南無佛
有此微善遇佛得度獲羅漢果師念世間業
繫衆生不能解脫惟念佛可以誘化乃印彌
陀塔四十萬本勸人禮念一日懺堂遶旋次
忽普賢像前蓮華在手因思宿願進退未決

遂作二紙闡一曰一心禪定一曰萬善生淨
土中夜冥心自期曰於此二途功行成者須
七度拈起並得萬善生淨土闡一無間隔於
是每日誦經禮佛念佛說戒施食放生日行
利益事一百八件未嘗暫怠越五初淨慈寺

命住持賜智覺禪師號會三宗師德製宗鏡
錄一百卷萬善同歸集神棲安養賦等九十
七卷並行于世師志誠殷重專以念佛勸人
同生淨土世稱宗門之標準淨業之白眉臨
終預知時至殊勝甚多荼毘舍利鱗砌于身

野七

三

嘗有僧死于冥見閻主殿左供養畫僧一幀
禮拜勤致云是永明壽禪師此人生西方上
品故禮敬之

天竺慈雲懺主

師諱遵式字知白姓葉台州臨海縣人也號

慈雲懺主其母乞靈於古觀音遂生法師初
往東掖山師義全十八祝髮先於禪林寺習
律繼入國清普賢像前燃指誓習台教學高
行苦名冠二浙博習教觀專志安養嘗要期
般舟三昧九十日素苦學嘔血處道場兩足

皮裂所以死自誓忽一日恍若夢寐見白衣
觀音垂手指口中引出數虫又指間出甘露
注其口身心清涼自此宿疾頓愈出懺頂相
高寸餘雙手下垂過膝聲如鳴鐘皆與舊異
衆皆歎仰之師建下天竺寺數百間三經賊
難每焚而火自滅乃願力堅固所致師當化
之日山中人見大星殞於靈鷲峯度弟子百
人學徒千數臨終即炷香瞻像而祝之曰十
方諸佛同住實際願住此實際受我一炷之
香諸佛證明往生安養或問其所歸者以淨

土寂光對之至其夕坐終當天聖年間也壽
六十九臘五十著往生淨土決疑行願二門
及淨土懺法金光明觀音諸本懺儀行於世
天台風教益盛於吳越者實資夫天竺慈雲
之德也觀決疑行願二門經曰十方諦求更

無餘乘唯一佛乘斯之謂歟懺主悟本性之
常寂光履唯心之佛土淨自利利他事理無
礙著述數百篇每發言皆以淨土爲歸向之
宗大闡諸經教理普化一切自懺文傳流于
世往生淨土者不知其幾千萬人繼天台之

道贊淨土之化世未有也

文潞公傳

公姓文諱彥博守洛陽嘗致齋往龍安寺瞻
禮聖像忽見像壞墮地畧不加敬但瞻眎而
出傍有僧曰何不作禮公曰像既壞吾將何

對七

千三

禮僧曰先德道譬如官路土人掘以爲像智者知路土凡人謂像生後時官欲行還將像填路像本不生滅路亦無新故公聞之有省由是慕道甚力專念阿彌陀佛期生淨土晨香夜坐未嘗少廢每發願曰願我常精進勤修一切善願我了心宗廣度諸含識每見一切人則勸以念佛誓結十萬人緣同生淨土如如居士有頌贊曰知公瞻氣大如天願結西方十萬緣不爲一身求活計大家齊上度頭結

潞府宗坦疏文

師俗姓申氏本貫潞州黎城人也自幼年於本州延祥院出家禮僧道恭爲師年十六落髮授具少通義學爲時所稱長而徧訪名師廣弘知見自爾講林德譽垂五十年以大藏

爲遊息以圓頓作門庭先講圓覺等經後集圓覺十六觀經等疏老年多於唐鄧汝穎之間講淨土觀經兼勸人念佛求生安養是時聽者如雲皆稟淨業後於唐州青臺鎮誓求安養念佛觀想以爲常住三業四儀未嘗暫忘大宋政和四年四月二十七日忽於夢中見彌陀化佛告曰汝說法只有六日在後當生淨土也師覺白衆曰吾修求安養似得因緣相應適來化佛告我得生淨土敢不信乎次日雖覺不豫講唱不輟於當年五月初四日丑時自知時至乃鳴鐘集衆告曰因緣聚散固當有時淨土勝緣唯憑時刻幸望大衆念佛助往又告曰享年七十六四大分離處淨土禮彌陀永超三界苦言訖坐滅滿空雷鳴白雲覆地從西而來三日方歇師先有瑪

璫念珠一串臨終盤於指上衆人竟不能取
感應事繁如別處說

慈照宗主

師諱子元號萬事休平江崑山茅氏子母柴氏夜夢佛一尊入門次日遂生因名佛來父母早亡投本州延祥寺志通出家習誦法華經十九歲落髮習止觀禪法一日正定中聞鴉聲悟道乃有頌曰二十餘年紙上尋尋來尋去轉沉吟忽然聽得慈鴉叫始信從前錯用心於是利他心切發廣度願乃慕廬山遠

公蓮社遺風勸人皈依三寶受持五戒一不殺二不盜三不婬四不妄五不酒念阿彌陀佛五聲以證五戒普結淨緣欲令世人淨五根得五力出五濁也乃撮集大藏要言編成蓮宗晨朝懺儀代爲法界衆生禮佛懺悔祈

卷七

三十四

生安養後往潞山湖初立蓮宗懺堂同修淨業述圓融四土三觀選佛圖開示蓮宗眼目四十六歲障臨江州逆順境中未嘗動念隨方勸化即成頌文目曰西行集乾道二年壽聖高宗詔至德壽殿演說淨土法門特賜勸

修淨業蓮宗導師慈照宗主就錢塘西湖昭慶寺祝聖謝恩佛事畢回平江嘗發誓言願大地人普覺妙道每以四字爲定名之宗示導教人專念彌陀同生淨土從此宗風大振師集彌陀節要法華百心證道歌風月集行

於世三月二十三日於鐸城倪普建宅告諸徒曰吾化緣已畢時當行矣言訖合掌辭衆奄然示寂二十七日茶毘舍利無數塔於松江力及市五港吾覺昌宅勅謚最勝之塔

宋朝無爲子楊提刑

公諱傑字次公無爲郡人道號無爲子雄才俊邁年少登科官至尚書主客郎提點兩浙刑獄事而又尊崇佛法明悟禪宗江西臨濟下棒喝之輩猶謂常流復闡揚彌陀教觀接誘方來括其所談乃謂衆生根有利鈍其近

野七

王五

而易知簡而易行者唯西方淨土也但能一心觀念總攝散心伏彌陀願力直超安養更無他趣決取成功矣龍樹所謂易行之道依他力故也公作天台十疑論序王古直指淨土決疑集序法寶僧監彌陀寶閣記安樂國

三十讚滿至西方要津誠爲萬世往生龜鑑矣公有輔導集專記佛乘東坡作序其畧曰無爲子宿稟靈機徧叅知識凡所謂具爍羅眼者次公目擊而道存焉公晚年作監司邵守乃畫丈六彌陀尊像隨行觀念至壽終時

感佛來迎端坐而化辭世頌曰生亦無可戀死亦無可捨太虛空中之乎者也將錯就錯西方極樂宣和中有荆王夫人神遊淨土見公坐蓮華上則往生必矣然則本朝士大夫洪贊淨方入正定要者唯公洎王敏仲侍郎二人而已豈非天欲久其道世必生其人者歟

龍舒居士王虛中

國學進士王曰休字虛中君自行之智化他之悲已見張于湖序文茲不再述公龍舒人有淨土文因以爲號其文盛行天下修淨業者莫不覽之乾道中廬陵李彥弼染時疾垂革棺槨已備忽夢一人神清貌古以手按摩肢體弼驚問荅曰予龍舒居士也弼因以疾告公曰汝起食白粥即差矣又曰汝遠記闕

仲雅教汝捷徑不彌曰每日念佛不輟彌覺因索白粥食之病果愈後見公畫像儼如夢睹彌敬重公稱生死骨肉遂遣子姪遠從其學一日忽迴曰居士於某夜講書罷如常禮念至三鼓忽厲聲稱阿彌陀佛數聲唱言佛

野七

王六

來接我屹然立化邦人此夜有夢二青衣引公西行者又三日前徧別道友勉修淨業有不復相見之語噫自非了唯心本性之道達生死變化之數不臻于是或疑李之夢因想以成彌曰其指白粥愈病又安可欺哉時丞

相益國公周公必大睹君奇跡製爲之贊曰皇皇然而無求惕惕然而無憂閔頽風之將墜攬衆善以同流導之以仁義之源誘之以寂滅之樂世知有作而莫識其無爲故中道奄然而示人以真覺李君謹愿無以報德遂刊

公像并事跡以傳遠自是廬陵家家供事之

儀真王侍郎

王侍郎諱古字敏仲東都人也曾任尚書禮部侍郎因作發運使遂居儀真稟性至仁寬慈愛物大弘佛教開闡化原曩遇京師乃尊

宿叢林之淵藪霽與之論道及游江南黃龍翠岩與晦堂揚岐輩同爲禪侶深契宗旨又悟彌陀淨土法門之勝博考諸經深究往生貫穿經文發明佛意乃作直指淨土決疑集三卷楊次公提刑作叙載之本傳佛即纂集

野七

王七

大彌陀經四十八願十六觀經九品往生馬鳴菩薩大乘起信論忠國師對肅宗隨意往生念佛三昧寶王論及諸經論備陳往生淨土要門該羅具錄如稱念南無三十六萬億一十一萬九千五百同名同號阿彌陀佛亦

於藏經中節出至於諸菩薩論淨土法門之要皆悉徧集侍郎平日修行觀念之心未嘗間歇數珠持念常不去手行住坐卧悉以西方淨觀爲佛事有僧神遊淨土見侍郎與葛繁大夫同在淨土而作佛事乃往生安養之

證驗他弘通淨土開示要津助阿彌陀普化一切自廬山十八賢之後繼此道以助佛揚化者獨次公敏仲著名於當時流傳數百世之下弘通彌陀大教廣度攝化之盛無有窮盡則晉代朝士之高致唯二公獨得之乃能光顯前賢克繼其遺風也

已上諸祖得道宗師並係大藏高僧傳往生傳寶珠集中錄出如慈照宗主道化盛行于世王臣僧俗悉皆從向念佛得道者甚衆及觀諸傳錄中都不備載無文可考

今搜訪慈照宗主事蹟已入集其餘應有一切在家出家念佛得道名行之士專候高賢用心尋究實錄廣爲發揚即當補入刊行庶免埋沒前修之德抑亦法門之光幸也

廬山蓮宗寶鑑念佛正派卷第四

音釋

愴

猶孟切開張盡緒也

闕

口濫切視也望也臨也

睹

東魯見也

野七

三十八

廬山蓮宗寶鑑念佛正信卷第五

第六章 野八

念佛正信說

夫唯心樂國普徧十方自性彌陀圓融一智妙應於色聲之境流光於心目之間就中反妄歸真直下背塵合覺昔我法藏發弘誓啓

野八

極樂之玄途故佛世尊指西方示韋提之妙域是乃廣長舌覆而同贊諸餘經盡而獨留蓋以利生之喜捨心增應化之慈悲量大教分九品乃別開方便之門觀明一心實徑直還源之路聖凡際會如久客歸於家鄉感應道交似稚子投於慈母昧斯至理觸類皆迷信此圓談事無不達况復慈光願攝佛力難思順水乘船不勞自力推門落日豈有他哉有願必迎無機不被舟石可濟獄火頓消菩薩聲聞生彼者無量無數前賢後聖得道者

可檢可尋鸚鵡頻伽尚有法音演唱蛸飛螻動悉蒙教化恩慈聖境非虛佛言不妄何乃愛河浪底沉溺而不憂火宅焰中焚燒而不懼密織癡網淺智之乃莫能揮深種疑根汎信之力焉能拔遂即甘心伏意幸禍樂灾却誹清淨之邦貪戀煩惱之世焦蛾爛蠶自處餘殃籠鳥鼎魚翻稱快樂皆由善力微而業力勝信根少而罪根多是以三界茫茫四生擾擾盡貪生而兀兀熟解知歸悉逐業以悠悠不求出要過去生死劫石難窮未來輪迴芥城何盡匪夙生之有幸豈得遇於斯因擊鼓開囹圄之門宜應速出逢舟濟沉淪之難詎可遲疑敬順金文善隨佛學不聞不解者可痛可傷焉矧茲五濁惡世四面火焚惟佛一人力能救援既聞妙法宜直淨緣一念信

誠萬德因種思齊先哲希悟真常普皆如說
奉行盡心頂禮信受

斷疑生信

經云得爲人難六根完具難生中國難值佛
道難興信心難蓋嘗論信之難興者緣有其

野八

二

疑也不斷其疑何由生信故金剛經云正信
希有法華經云以信得入王龍舒云佛爲大
醫王能救一切病不能救命盡者佛能度一
切人不能度不信者蓋信者一念之真誠也
若人心念要去身則隨去心念欲住身則隨

住是知此身隨心念動有念欲去而身被牽
擊者色身壞時惟一念而已一念到處則無
處不到所以一念信心念佛求生淨土則必
到淨土況吾佛世尊諸大菩薩又有本誓願
力接引往生乎或問之曰今有一生持戒念

佛臨終不得生淨土者何也答曰此蓋信力
不深行願之有虧也兼不曾發菩提之大心
又不曾斷十惡之邪行雖曰修行未嘗言行
相應雖曰念佛未嘗淨念相繼既無真實之
功焉得淨土之報也淨名經云隨其心淨則

佛土淨六祖壇經云心中若無不善西方去
此不遙若懷不善之心念佛求生難到不斷
十惡之心何佛而來迎請大師故見世人不
務淨心只是口念佛名於其心外求佛妄想
執著而不自淨其心心造諸惡是謂自喪其

野八

三

佛又何更別求佛哉所以道迷即衆生悟即
佛也圓通法門云憶佛念佛現在當來必定
見佛蓋憶念者是心念也信心清淨信行願
俱備也楞嚴云一根既返源六根成解脫十
惡化爲十善六識化六神通所以正信心中

憶念佛名淨念相繼自性彌陀現前此惑彼應臨命終時安得不見佛而生淨土乎凡修淨業者當信佛之言而行佛之行心口既不相違因果決然不昧耳若也聞而不信信而不行由畫餅之不充饑也心既無信則生疑謗既興疑謗則自昧其心自昧其心則淨土遠之遠矣故香山周居士述慈照蓮宗懺序云導師者化物有方誨人存理以深信爲能入破諸闡提專念佛爲行門令心不亂加菩提願心爲根本度脫衆生備此三者乃極樂淨土上上品之可登毗盧果海流流而易到也又云此事人人本具箇箇圓成無信行願三字因茲淪墜嗚呼凡爲人者不在福德不在尊貴不在聰明不在相貌但具信行願者乃生淨土之資糧也四料揀云從是西方過

十萬億佛土有世界名曰極樂是約遠也若一念信心念佛即到西方是約近也故云亦近而亦遠在人信願信不隔絲毫疑而生死轉又云從是西方過迢迢十萬程資糧若具足何愁去不成是也所以道信爲萬善之

首信爲百行之宗華嚴以十信爲成佛之始法華以正信爲入道之門五根以信根爲先五力以信力爲最是故三世諸佛諸大菩薩歷代祖師修諸功行具大願力入佛境界成就善是未有不從這箇信字而入也鸞法師

野人

四

遇留支觀經即焚仙經而修淨業豈不是這信字也白侍郎行也弥陀坐也弥陀不出這信字也蘇學士佩帶弥陀畫像行坐隨身言是西方公據者蓋亦不出這信字也張善和一生殺牛臨終自見地獄相現遇僧教令念

阿彌陀佛念未十聲見佛接引往生淨土即脫地獄豈不是信得及而致然耶華嚴經云信爲道元功德母信能長養諸善根信能超出衆魔路信能得入三摩地信能解脫生死海信能成就佛菩提嗟乎今時齋人信持戒而不信念佛信奉佛不信往生淨土是皆自失其大利也諒哉人天路上以福爲先生死海中念佛第一今有欲快樂人天而不修福欲出離生死而不念佛是猶鳥無翼而欲飛木無根而欲茂奚何得哉凡我同盟切須深信諸佛所說真實非虛脫苦良方無如念佛專修淨業期出輪迴時不待人慎勿疑悔可謂此身不向今生度更向何生度此身

勸發信心

夫阿彌陀佛者諸佛中尊四生之父歸信者

滅罪河沙稱念者得福無量凡欲念佛要起信心若無信心空無所獲是故肇法師云是事如是者信之相也是事不如是者不信之相也夫信爲入道之初宗智爲究竟之玄術諸經首稱如是者信也後曰奉行者智也故彌陀經云若有信者應當發願生彼國土此是釋迦本師勸信處又云汝等當信是稱讚不可思議功德此是六方諸佛勸信處又云若人種善根疑則花不開信心清淨者花開即見佛此是往生論勸信處又云信者順之詞信則所言之理順順則師資之道成經無豐約非信不傳此是肇法師勸信處又云念佛法門不問道俗不論男女不拘貴賤修此法者唯要信心此是大行和尚勸信處問曰既言信者未知信何法門答曰信意者信憑

經中佛說念佛定生淨土信念佛定滅諸罪
信念佛定得佛護信念佛定得佛證信念佛
臨終定得佛來迎接信念佛不問衆生同信
之人皆得往生信念佛往生定得不退地信
念佛生淨土定不墮三惡道所以勸信念佛

受此法持此念則往生淨土必矣故大行和
尚遣念佛人心唯信佛佛則知之他心通故
口惟稱佛佛則聞之天耳通故身惟禮佛佛
則見之天眼通故是以大行和尚以此念佛
法勸人生信心也又喻云信心者猶如深栽

果樹根深故風吹不動後着果實濟人饑渴
念佛之人亦復如是要由深信得到西方若
無信心空無所獲是故經言十住菩薩一起
信心念佛之後縱遇惡緣寧捨身命不退信
故維摩云深信堅固猶如金剛法珍普照如

野八
六
雨甘露念佛三昧從深信生君看淨土恒沙
佛盡是當年正信人

天竺慈雲式懺主往生正信偈

稽首西方安樂刹 彌陀世主大慈尊
我依種種修多羅 成就往生決定信

住大乘者清淨心 十念念彼無量壽
臨終夢佛定往生 大寶積經如是說
五逆地獄衆火現 值善知識發猛心
十念稱佛即往生 十六觀經如是說
若有歡喜愛樂心 下至十念即往生

若不爾者不成佛 四十八願如是說
諸有聞名生至心 一念回向即往生
唯除五逆謗正法 無量壽經如是說
臨終不能觀及念 但作生意知有佛
此人氣絕即往生 大法鼓經如是說

一日一夜懸繒蓋 專念往生心不斷
卧中夢佛即往生 無量壽經如是說
晝夜一日稱佛名 慇懃精進不斷絕
展轉相勸同往生 大悲經中如是說
一日二日至七日 執持名號心不亂

野八

七

佛現其前即往生 阿彌陀經如是說
若人聞彼阿彌陀 一日二日若過等
繫念現前即往生 般舟經中如是說
一日一夜六時中 五體禮佛念不斷
現見彼佛即往生 鼓音王經如是說

十日十夜持齋戒 懸繒幡蓋然香燈
繫念不斷得往生 大彌陀經如是說
若人專念一方佛 或行或坐七七日
現身見佛即往生 大集經中如是說
若人自誓常經行 九十日中不坐卧

三昧中見阿彌陀 佛立經中如是說
若人端坐正西向 九十日中常念佛
能成三昧生佛前 文殊般若如是說
我於衆經頌少分 如是說者無窮盡
願同聞者生正信 佛語真實不欺誑

佛既顯言易往生 幸各正信無疑惑

天台智者大師淨土十疑論叙

夫四果之明不能測如來之奧十地之聖不能窮極果之妙矧茲凡夫生無慧目陷三界有必固之妄指淨土謬難轉之疑疑之於身知五蘊之未滅疑之於心知萬惑之未遣疑之於行知六度之未濟由漂沉未濟之行期濟於已濟之域在於其已猶惑之況他人哉此物情難信爲道俗所共疑也隋智者大師心與物冥智將神會乘時翼教異跡由著因

其所異考其所證不知其三賢之人乎十聖之人乎其爲應正等覺妙神化于難思乎蓋亦思之不能知也但大師念定總持昭晰行業期生淨土間無容髮發大師之所有存者其十疑之文乎然其文遠取諸經近取諸論

野八

八

去就其意以取諸傳無離經以備事無飾辭以增巧審辭達意能極九品之所生乃見大師之用心也見大師之心者其於淨土之有疑所謂高天無雲群星列彩經紀之所相殊躔次之所相異粲然無一而隱者也予得

其文載念能仁所稱淨土者累焉諸佛證而成之者或舌相以覆大千或潮音而演梵說余雖陋學不得以相輝映焉可無言哉故於論首畧陳一二以罄予所懷雖辭膚理淺不足起大師之化在其先佛證成之義且有歸

矣

無爲楊提刑直指淨土決疑序

大願聖人從淨土來來實無來深信凡夫往淨土去去實無去彼不來此此不往彼而其聖凡會遇兩得交際者何也彌陀光明如大

圓月徧照十方水澄而清則月現全體月非趣水而遽來水動而濁則月無定光月非捨水而遽去在水則有清濁動靜在月則無取捨去來故華嚴解脫長者云知一切佛猶如影像自心如水彼諸如來不來至此我亦不

野八

九

徃彼我若欲見安樂世界阿彌陀佛隨意即見是知衆生注念定見阿彌陀佛此乃稱性實言非權教也淨土無欲非欲界也其國地居非色界也生有形像非無色界也一切衆生未寤正覺處太夢中六道升沉未嘗休止

諸天雖樂報盡相衰修羅方嗔戰爭互勝旁
生飛走敗食相殘鬼神幽陰饑渴困逼地獄
長夜痛楚號呼得生人趣固已爲幸然而生
老病死衆苦縈纏惟是淨邦更無諸苦蓮苞
託質無生苦也寒暑不遷無老苦也身無分
段無病苦也壽命無量無死苦也無父母妻
子無愛別離苦也上善人聚無怨憎會苦也
花緘香食珍寶受用無求不得苦也觀照空
寂無蘊苦也悲濟有情欲生則生不住寂滅
非二乘也智照生死得不退轉非凡夫也三

界蕩然譬如四裔丘陵坑坎腐穢所積溪壑
阻絕孰爲津梁迺有狂人迷路於此惡獸魑
魅惱害雜居刀兵水火或時傷暴風霜霹靂
凌厲摧懾罔知城域可以庇覆飲食衣服未
或充足甘受是苦不求安樂有佛釋迦是大

導師指清淨土是安樂國無量壽佛是淨土
師爾諸衆生若生彼土則無諸惱不聞知者
固可哀憐亦有善士發三種心不求生者尤
可嗟惜一曰吾當超佛越祖淨土不足生也
二曰處處皆淨土西方不必生也三曰極樂
聖域我輩凡夫不能生也夫行海無量普賢
願見彌陀佛國雖空維摩常修淨土十方如
來有廣舌之讚十方菩薩有同往之心試自
忖量孰與諸聖謂不足生者何其自欺哉至
如龍猛祖師也楞伽經有預記之文天親教

野人

十

宗也無量論有求生之偈慈恩通讚首稱十
勝智者析理明辯十疑彼皆上哲精進往生
謂不必生者何其自慢哉火車可滅舟石不
沉現華報者莫甚於張馱十念而超勝處入
地獄者莫速於雄俊再甦而證妙因世人愆

尤未必若此謂不能生者何其自棄哉般舟
三昧經云跋陀和菩薩問佛未來衆生云何
得見十方諸佛佛教令念阿彌陀佛即見十
方諸佛寶積經云他方衆生聞無量壽如來
名廼至能發一念淨信懽喜愛樂所有善根
回向願生彼國者隨願皆生得不退轉此皆
佛言也不信佛言何言可信不生淨土何土
可生自欺自慢自棄已靈流入輪迴是誰之
咎四十八願悉爲度生一十六觀同歸繫念
一念既信已投種於寶池衆善相資定化生

於金地母輒悔情誤認疑城即時蓮開得解
脫道唯心淨土自性彌陀大光明中決無魔
事決疑集者王敏仲侍郎之編也開釋疑情
徑超信地其載要旨最爲詳審蓋安養國之
鄉導也若登彼岸舟固可忘來者

問津斯
言毋忽

野八

十一

廬山蓮宗寶鑑念佛正行卷第六十四章

念佛正行說

夫常光界本無色象有應則形菩提道既闢要途非行不至維摩經云五百長者子寶積

白佛言我已發阿耨多羅三藐三菩提心願聞得佛國土清淨願說菩薩淨土之行佛言寶積衆生是菩薩淨土肇法師云至人空洞無象應物故形形無常體况國土之有常乎蓋群生萬端行業不同殊化異彼致令報應

不一是以淨者應之以寶玉穢者應之以砂礫美惡自彼於我無定無定之土乃曰真土然則土之淨穢繫乎衆生故曰衆生之類是菩薩淨土也夫如來淨土者以無方為體故雜行衆生同視異見異見故淨穢所以生焉

無方故真土所以形焉若夫取其淨穢者衆生之報也本其無方者佛土之真也豈曰殊域異處凡聖二土然後辨其淨穢哉道生法師曰淨土行者行致淨土非造之也若欲造於土者衆生類矣容以濫造不得不先明造

本以表致義然後說行羅什法師曰寶積問淨土之相世尊答言衆生是菩薩淨土者蓋說果上之因也清涼國師云諸佛心內衆生新新作佛衆生心中淨土念念證真經云菩薩隨所化衆生取於淨國土為饒益諸衆生故譬如有人欲於空地造立官室隨意無礙若於虛空終不能成菩薩如是為成就衆生故願取佛國非於空也當知直心深心大乘心是菩薩淨土肇法師曰土之淨者必由衆生衆生之淨必因衆行行淨則衆生淨衆生

淨則佛土淨此必然之理不可差也土無沍曲乃出於直心故曰直心是菩薩淨土直心謂質直無諂此心乃萬行之本生法師曰樹心種德深固難拔深心也乘八萬行兼載天下不遺一大乘心也此之三心始學之行

也欲弘大道要先直心心既真直然後入行能深入行既深則廣運無涯此三心為之次序也備此三心次脩六度以至萬行什法師曰直心者誠實心也發心之始在於誠實道識彌明名為深心正趣佛慧名大乘心經云

布施持戒忍辱精進禪定智慧是菩薩淨土四無量心四攝法是菩薩淨土方便是菩薩淨土三十七品是菩薩淨土迴向是菩薩淨土十善是菩薩淨土如是寶積菩薩隨其直心則能發行隨其發行則得深心隨其深心

則意調伏隨意調伏則如說行隨如說行則能回向隨其回向則有方便隨其方便則成就衆生隨成就衆生則佛土淨隨佛土淨則說法淨隨說法淨則智慧淨隨智慧淨則其心淨隨其心淨則一切功德淨什法師曰直

野八

十三

心以誠心而信佛法也信心既立則能發行衆善衆善既積其心轉深深心堅固則不隨衆惡棄惡從善名調伏心心既調伏則遇善斯行遇善斯行則難行能行難行能行則萬善兼具萬善兼具故能回向佛道向而彌進方便力也方便之要有三一善於自行而不取相二不取證三善化衆生具此三者則得淨土土既清淨則衆生純淨衆生純淨則與化主同德故曰皆淨也諸經雖廣說淨國之行未明行之階漸今此詮明至極深廣不可

頓超宜尋之有途履之有序故說發行之迹
始于直心直心即是真心此心者群生誰不
有之蓋自迷而不知不覺也故六祖大師云
一念平直即是彌陀一念邪險即是衆生蓋
以人居濁世現行無明口說直心行多諂曲
溺於苦海而不能出是故佛慈愍彼示之以
方便導之以念佛伏彼亂心令捨邪險而歸
乎正真即衆生而生淨土所以寶王論云清
珠下於濁水濁水不得不清佛想投於亂心
亂心不得不佛是以因念佛而顯直心因直
心而行衆善行衆善而得佛淨土豈非佛祖
之方便智力乎肇法師云積德者故淨心心
淨則無德不淨生法師曰功行即淨土之殊
勝因也功德即淨土之殊妙果也淨土因果
蓋是心之影響故云欲得淨土必淨其心所

謂聲和響順形直影端者矣

修進工夫

淨土唯心之說既已明矣人皆知有必須親
到而後已欲證此道當以正信為入門以脩
心為正行正行者即所施之功所行之行也

野八

十四

此之功行名為淨業即往生西方之資糧也
此之行業隨人所修蓋一切人力量有大小
機智有淺深所以行業不等上上根智人直
下自悟識自本心見自本性即是彌陀此則
是如來無住無依寂上乘境界萬中無一也

其未能頓悟之人須是諦信淨土一心念佛
漸次進修仗阿彌陀佛願力攝持自己一念
真實下土正如抱橋柱澡洗萬無失一也雖
云念佛一門其實意含無盡是故祖師立教
利鈍俱收有實有權有深有淺有頓有漸皆

可修持上根者叅究坐禪中根者觀想持念六時修禮日夜精專下至十念成功總在一心履踐各有行相次第階梯隨力行持皆可進趣此之行門乃成就佛果菩提之道路也須是自信自行自修自度要在立大志發大

願自辦工夫努力向前莫作容易譬如百二十斤檐子到臨時及節自家檐荷得去方爲了事決定不在會說會道廣化人緣上決定不在有傳有授扭捏做作上決定不在廣設道場多點香蠟上蓋由著事相而迷昧正理

對八

主

順聲色而違背真宗數他寶而自無半錢貨良藥而自疾不救是故遠祖師云得其趣者若暗室之燃燈失其意者同滯指之迷月殊不悟無心乃正動念皆邪慧日旋隱乎昏雲客塵轉翳乎心鏡遂乃念慮交馳情欲紛競

調伏不息止制猶繁落無記者徒滯於兀然希有得者便同諸邪命指置無從難言正定無期入於法界永久處於塵籠凡修淨土之人灼然是要敵他生死不是說了便休當念無常迅速時不待人須是把做一件事始得

若也半進半退似信似疑到了濟得甚麼邊事如何出離輪迴若是信得及便從今日去發大勇猛發大精進莫問會與不會見性不見性但只執持一句南無阿彌陀佛如靠著一座須弥山相似搖撼不動專其心一其意

或叅念觀念憶念十念或默念專念繫念禮念念茲在茲常憶常念朝也念暮也念行也念坐也念心念不空過念佛不離心日日時時不要放捨綿綿密密如鷄抱卵常教煖氣相接即是淨念相繼更加智照則知淨土即

是自心此乃上智人修進工夫如此把得定
做得主靠得穩縱遇苦樂逆順境界現前只
是念阿彌陀佛無一念變異心無一念退惰
心無一念雜想心直至盡生永無別念決定
要生西方極樂世界果能如是用功則歷劫

無明生死業障自然消殞塵勞習漏自然淨
盡無餘親見彌陀不離本念功成行滿願力
相資臨命終時定生上品其或力量未充應
須隨力修習未能專一辦功亦要朝昏禮念
縱使家緣繁冗無忘寸念稱名日日用心猛

野八

去

着精彩積功積行發願發心誓畢此生同登
淨域可謂水須朝海去雲定入山歸

資生助道

在家菩薩念佛高流日赴檀信之齋坐享人
天之供皆非常道不若治生有意修行豈妨

作務或田疇播種或市井經營或富有家資
或日求升合應思勤則不惰儉則有餘以此
修身方爲佛子若也奢華懶惰生事蕭條雖
欲修行不可得也信知治世資生皆順正法
工巧伎藝饒益群生欲修淨業正因當以資
生助道所以潭州黃老常打鐵以修行居士
龐公賣簾籬而養道喻彌陀畫像爲業戴佛
庵發燭資身可謂一日不作一日不食矣

作福助緣

有淨業弟子問蓮宗慈照導師云弟子專修
念佛三昧可得用布施持戒供養作福不師
答曰汝能專念彌陀若不持戒則有毀犯罪
若不布施則長慳貪業若不供養三寶則有
我慢業若不恭敬一切則有輕人罪是故毀
犯即墮地獄慳貪即墮餓鬼我慢則常在惡

野八

十七

野

七

道輕人則世世貧賤似此惡業障蔽欲生淨土其可得乎如此念佛之人譬如旱田栽穀欲望收成不可得也故肇法師云有爲雖偽弃之則佛道難成無爲雖真執之則慧性不明汝今欲修念佛三昧得生淨土速成佛果菩提者須是專以念佛爲正行更以福德爲兼修晨夕常勤供養三寶禮拜懺悔布施持戒潔白三業增助淨緣諸惡莫作衆善奉行所修一切善根悉皆回向淨土成就念佛功德速證菩提可謂順水行船更加勳棹矣

去惡取善

淨土十門教誡云修淨土人須是去惡取善方得成就功德若人雖念彌陀嫉妬心盛名聞尖刀臨終風力解身百骸疼痛或言我能持戒他不能行傲慢師僧輕毀一切現生折

福短壽勞病吐血而亡也若念佛之人塵垢未淨惡念起時須自檢點或有慳貪心嗔恨心癡愛心蛆妬心欺誑心吾我心貢高心諛曲心邪見心輕慢心能所心及諸逆順境界隨染所生一切不善之心設或起時急須高聲念佛斂念歸正勿令惡心相續直下打併淨盡永不復生所有深信心志誠心發願回向心慈悲心謙下心平等心方便心忍辱心持戒心喜捨心禪定心精進心菩提心及一切善心常當守護更要離非梵行斷惡律儀

野

七

明月照天心

拔濟幽趣

釋子沙門在家菩薩既修西方淨業當運廣大慈悲如法進修善隨佛教明因識果鑒是別非集出世間福智資糧圓大丈夫等妙功

德是故釋尊再四教誡我諸弟子隨所住處當施法食濟諸法界一切有情除彼飢渴極苦化令同趣菩提若不施食無慈悲心非吾弟子是惡徒衆經有明文詳觀一切衆生不了自性慳貪嫉妬瞋恨愚癡於人天鬼畜之

中地獄修羅之內飢渴焦熬愁憂苦惱冥冥長夜求出無期以理推之無非宿生父母如佛所說皆是累劫怨親是以運觀音之慈悲修普賢之行願誓同拔濟悉脫沉淪有力者修齋設供無力者咒食施生施食殊功廣大

無量具足妙利言莫能窮畧舉數端普告賢者施心一發妙行全彰具足三檀圓修六度利他自利自覺覺他善集出世福智永作淨土資糧廣植磁基圓成體用乃至埋藏枯骨掩瘞暴屍普爲幽寬代伸懺悔橋梁義井通

野八

十九

濟往來飲食錢財隨力惠施每見貧窮凍餒痛切悲憐至於孤老癯殘倍加慈念常存利濟曲盡真慈凡修一切善根盡願衆生成佛以茲勝利回向西方普冀有情同登覺岸是以蕭梁武帝修水陸之儀三藏不空有濟孤之法可謂一雨周沙界群心永夜蘇

放諸生命

欲趣菩提慈心爲本凡修淨業濟物爲先觀夫飛禽走獸水族遊鱗或挂網羅或拘籠檻穿腮反翼繫足倒懸將臨湯火之間欲赴刀

砧之上憂悲恐懼變憎憊惶望雲漢以魂消
憶林泉而膽碎雖知萬死猶冀一生顧眄哀
鳴以求救援所以弟子悲憐抽財贖命開籠
釋檻斷縛解懸施水焚香合掌呪願法施事
畢安詳放之或縱陂池或賁林野皆由佛道

展演悲心乃至上及人倫下溷蝼蟻但能救
死無不放生既乃放生自然長命因茲勝利
回向西方普願衆生同成佛道所以長者活
魚沙弥救蟻鄭昌圖焚燒罟網顓禪師建立
生池楊寶之療病雀敏仲之投鰕蜆元祖師
有頌戒殺滿禪師說戒放生可謂慈愍為解
丁香結放出枝頭自在春

六度萬行齊修

六度者布施持戒忍辱精進禪定智慧六波
羅密也若念佛人專修三昧學出世間須達

乎至善要知六度萬行不出一心於一心中
一切法俱備如浴大海已用諸河水也如萬
種香為丸若燒一丸具足衆味如人取寶獲
如意珠王一切衆寶出生無盡也何以知其
然執持一句阿彌陀佛故得三昧一念之中

野八

二十

與理相應諸法現前六度萬行皆悉具足布
施則心無染著持戒則不起妄緣忍辱則能
所俱忘精進則心無間斷禪定則動靜俱寂
智慧則不立絲毫乃一度之中出無量度度
度之內如帝網羅但知一心本空自然萬行
具足是故八萬四千法門八萬四千智慧八
萬四千功德皆從一念念佛心中出生也華
嚴經賢首菩薩言佛子於一切時中善用其
心則獲一切勝妙功德可謂一性圓通一切
性一法徧含一切法

維摩大士示淨土八法

維摩詰經云衆香世界菩薩問曰菩薩成就幾法於此世界行無瘡疣生于淨土維摩詰言菩薩成就八法於此世界行無瘡疣生于淨土何等為八曉益衆生而不望報代一切

衆生受諸苦惱所作功德盡以施之等心衆生謙下無閼於諸菩薩視之如佛所未聞經聞之不疑不與聲聞而相違背不嫉彼供不高已利而於其中調伏其心常省已過不訟彼短恒以一心求諸功德是為八法行無瘡

疣生于淨土

野八

三

敕明修行難易

娑婆濁境衆苦集而求道難成淨土樂邦諸善聚而位登不退稱名號者諸佛護念而往生發菩提者弥陀光照而增進菩薩羅漢與

其同儔水鳥樹林悉皆念佛耳畔常聞妙法心中頓絕貪嗔快樂無窮壽量何極一生彼土便獲阿惟豈比人天道中觸目多諸違順權乘路上善根希有周圓地前三賢尚未見道而失念舍利六住猶遇惡緣而退心所以法華會上退席者五千寶積經中失道者猶衆觀佛世尚尔何今時不然華嚴合論問曰如涅槃經云聞常住二字尚七劫不墮地獄華嚴經云設聞如來名及與所說法不生信解亦能成種何故第六住心及地前菩薩猶言有退答曰從凡入道勝解未成未得謂得便生憍慢不近勝友不敬賢良為怠慢故處人天隨違順緣惡念一起即成地獄若一信不慢常求勝友即無此失何以故權教中第六住心地前三賢總未見道所修行業皆

是有為凡有無明皆是折伏有力即不退失
至八地中始入無功用行是知三乘之士歷
僧祇劫而功行無成念佛之門於彈指頃而
位階不退是以生淨土者唯善無惡故位無
有退者決定成佛故弥陀經云極樂國土衆

生生者皆是阿鞞跋致是也嗟乎初心信淺
非他力難以進修我佛願深但有緣悉皆攝
受須信餘門學道如蟻子上於高山淨土往
生似風帆行於順水弥陀接引直趣菩提衆
聖提携高超三界上品即登佛果下生猶勝

天宮普信勿疑同修不退

野八

三

天台示淨土忻厭二行門

十疑論云欲生淨土須具厭忻二行一者厭
離行常觀此身膿血屎尿惡露臭穢不淨初
觀世人從情欲貪愛生是種子不淨二觀父

母赤白和合是受生不淨三住母胎藏即是
住處不淨四在母胎時唯食母血即是食噉
不淨五十月滿足從產門出即是初生不淨
六內身膿血即是舉體不淨七死後降脹爛
壞即是究竟不淨觀身既爾觀人亦然次觀
娑婆穢境衆苦共集生老病死怨憎會苦愛
別離苦憂悲煩惱三塗八難六趣輪迴地水
火風無常敗壞貪嗔癡慢遇境生心應當厭
離纔生厭離淨土必成二者忻樂行求生淨
土為欲救拔一切衆生苦故是故希心起想

樂綵西方淨國百寶莊嚴金地瓊林花池光
彩神通自在任意他方永絕死生更無煩惱
阿彌陀佛相好光明法門自悟衣食自然諸
快樂門故須忻樂

淨業道場

野八

三

夫淨業者無相無為之妙行不染不滯之玄
宗道場者三世諸佛之住持菩提正覺之閭
域豈名相數量之可測非智識能所之迷乎
得其旨也以誠敬為莊嚴以行願為軌則所
以維摩詰經中示道場之衆相遠祖師法社
有節度之敘文是以解斯義者入於實相境
與智合事與理井然五分之法身香炳千光
之智慧燭絕思絕慮謂之清淨齊修曰敬曰
嚴謂之平等供養行住坐卧不離道場舉動
施為無非佛事念念弥陀出世心心菩薩放
光行行盡是西方步步皆登寶所無一法而
非正法舉一音而皆圓音發一念則天龍護
持行一令則魔王喪膽此則靈山一會儼然
未散是名真法供養如來論功德則無量無
邊論果報則難思難議以此祈福則何福不

臻以此度生則有生皆度是名真實功德是
名淨業道場今嗟末代有等癡人不究自心
不知佛理執著外境為實一向著相修行這
邊做幾會道場那裏點幾斤香燭某處化多
少人懺戒幾時點若干箇化緣我是張導師
傳宗他是李師長徒弟彼是普字號伊是覺
字宗不思根本自何來各競枝條無是處更
又胡言漢語動輒是此非他妄解佛經密傳
偽教打口鼓子弄葛藤頭爭我爭人論高論
下漏逗不少出醜甚多不知羞耻故如斯豈
識慙惶胡恁麼將淨土一實之道變雜劇場
把弥陀萬德之名做山歌唱失却祖師正眼
鈍置蓮宗教門達人暗地悲傷識者觀時驚
愕更有敲鐃打鈸念真言攬僧門之應副咒
水書符談禍福狀師巫之所為差遣諸天追

亡攝崇喝罵三寶救病驅邪百樣蹊蹺萬般
姍異脚波波與他人作奴僕忙急急不顧命
趨門徒讀誦時十錯九訛禮念時七羅八哏
展開經打瞌睡收起經說家私聚頭磕腦弄
精魂作隊成群乾打閑不思因果不顧罪愆

借佛祖廣大法門受人天禮拜供養美則固
美善則未善若是持佛戒在佛門當學如來
之道誦佛經行佛行方盡祖師之心未能入
聖超凡唯恐無德應供如抹卓布不無穢污
於自身似磨刀石未免消磨於本體若能覺

悟只好回頭當初投佛持齋畢竟為甚麼事
既不能救於生死爭如自退省修持專念彌
陀勤求懺悔近智人參尋佛理向靜處體究
心王頓令業海息波濤顯出驪珠照天地圓
成自己利益他人若遇應供道場慎勿放逸

輕慢依節度以無違遵齋經而奉法現前即
得念佛三昧祇此是箇安樂法門上可以報
答四恩下可以援濟三有實不枉為佛子亦
免辜負已靈信願相資行解均備如斯行履
即現在之彌陀自此修持真人天之眼目是

野八

大緣也豈小補哉會麼青山高處見天濶白
藕開時聞水香

自行化他

佛言自未得度先欲度人者菩薩發心自覺
已圓復覺他者如來應世故我蓮宗祖師勸
立念佛一門行解相應自利利人化物有方
誨人存理稱曰導師專以念佛三昧示導於
人普令超出世間也是故教傳天下人皆仰
焉今之為師者不達其道局于名相多集徒
眾不修實行空有人師之名無法可師於人

欲人恭敬尊重無德受人恭敬誠可耻也經云凡欲度人者先須求自度維摩云自疾不能救云何救他疾又地獄報應經云自不清淨教人清淨無有是處智度論云譬如二人各有親屬為水所溺一人情急直入水救為

無方便彼此俱沒一人有其方便往取船棧乘之救接悉皆度脫水溺之難是故為人師者有度人之心無度人之智弗得端然拱手空腹高心不肯親近明師唯知倨傲受人禮拜恭敬供養因貪虛譽實種禍基譬如凡夫

妄號帝王自取誅滅即前之所謂無方便而救人也豈可妄為哉大凡為人之師欲度弟子要當觀照從上佛祖修行之因地得道之源流傳宗之正印念佛之法門一一攷究明白自信自行一一修持一一成就既自利已

然後利人是乘彌陀之大願力船救接苦海中之沉溺也彼此利濟不亦宜乎是謂以先覺覺後覺也自信此法門亦教人信此法門自行此道亦教人行此道自願往生淨土亦教人發願往生淨土自見本性彌陀亦教人

野八

三六

見本性彌陀如此用心豈不是行菩薩之行也師徒弟子各稟正因同行正道展轉化度盡未來際一切衆生俱悟佛乘同出生死其功德力豈易量哉以此為人之師亦何慊焉其或不然迷悟兩途正邪異報可謂金毛窟

裏生獅子野狐岩下出狐狸

以事檢心

永明壽禪師自行錄云欽惟古聖罔伐已能緬想前賢靡彰自德然釋典有先自行化他之教儒宗標內舉不避親之文師常示徒云

因觀弘明集中先德有檢覆三業門云夫尅責之情猶昧審的之旨未彰故以事檢校心凡所修習既知不及彌增悚慙何謂檢校檢我此身從旦至中從中至暮從暮至夜從夜至曉乃至一時一刻一念一項有幾心幾行幾善幾惡幾心欲摧伏煩惱幾心欲降伏魔怨幾心念三寶四諦幾心悟苦空無常幾心念報父母恩慈幾心願代衆生受苦幾心發念菩薩道業幾心欲布施持戒幾心欲忍辱精進幾心欲禪定顯慧幾心欲慈濟五道幾

野人

三七

心欲勸勵行所難行幾心欲超求辦所難辦幾心欲忍苦建立佛法幾心欲作佛化度群生上已檢心次復檢口如上時刻從旦已來已得演說幾句深義已得披讀幾許經典已得理誦幾許文字已得幾迴歎佛功德已得

幾迴迴向發願次復檢身如上時刻已得幾迴屈身禮佛幾拜已得幾迴屈身禮法禮僧已得幾迴執勞掃塔塗地已得幾迴燒香散花然燈已得幾迴掃除塵垢正列供具已得幾迴懸幡表刹合掌供養已得幾迴遶佛恭

敬十百千市如是檢察會理甚少違道極多白淨之業纔不足言煩惱重障森然滿目闇礙轉積解脫何由如上檢察自救無功何有時閑議人善惡故須三業自相訓責知我所作幾善幾惡是以若不自先檢責何以化導

群機故菩薩爲度衆生故先自修行所以淨名經云資財無量攝諸貧民奉戒清淨攝諸毀禁以忍調行攝諸恚怒以大精進攝諸懈怠一心禪定攝諸亂意以決定慧攝諸無智又經云自持戒勸他持戒自坐禪勸他坐禪

大智度論云本師釋迦牟尼佛不捨穿針之
福祖師龍樹菩薩釋云如百歲翁作舞何以
故爲教兒孫故况未居究竟位全是自利門
從十信初心歷十住十行十迴向十地直至
等覺佛前普賢位猶是自利利他門者登妙

覺位至佛後普賢方是利他之行因師自說
編紀二三既對治之行可觀則攝化之門弗
墜乘戒兼急權實雙行體用相收理事無礙
今引萬善同歸集後偈以顯圓修頌曰

菩提無發而發

佛道無求故求

野八

二六

妙用無行而行 真智無作而作
興悲悟其同體 行慈深入無緣
無所捨而行檀 無所持而具戒
修進了無所起 習忍達無所傷
般若悟境無生 禪定知心無住

鑒無身而具相 證無說而談詮
建立水月道場 莊嚴性空世界
羅列幻化供具 供養心王如來
懺悔罪性本空 勸請法身常住
迴向了無所得 隨喜福等真如

讚歎彼我虛玄 發願能所平等
禮拜影現法會 行道步躡真空
焚香妙達無爲 誦念深通實相
散花顯諸無着 彈指以表去塵
施爲谷響度門 修習空花萬行

深入緣生法性 常遊如幻法門
誓斷無染塵勞 願生唯心淨土
履踐實際理地 出入無礙觀門
降伏鏡像魔軍 大作夢中佛事
廣度如化含識 同證寂滅菩提

野八

二九

廬山蓮宗寶鑑念佛正行卷第六

音釋

漕

側銀切水出鄭國

晰

之逝切之列切明也

蜺

戶干胡典二切小黑蟲也

軟

音陳古文

廬山蓮宗寶鑑念佛正願卷第七章 野九

念佛正願說

理由智導行由願興行願得均理智兼備理智兼備則心心念念總是彌陀刹刹塵塵皆爲淨土自非大願行力曷能臻此哉欲人人

野九

證此三昧者要在信願深其根本也夫願者樂也欲也欲生西方淨土樂見阿彌陀佛故發此願是以憑大願力直要到彼也所以慈照云時時發願樂慕往生日日禱祈勿令退失如無願心則善根沉沒華嚴經云不發大

願是爲魔事所以普賢廣無邊願海彌陀有六八願門是知十方諸佛上古先賢皆因願力而得成就菩提不興願樂之心不成願樂之行故云法門廣大無願不成是以佛隨人之心滿人之願何況專修念佛願生淨土安

得不遂心滿願哉懺云願我不退菩提心願我決定生安養願我速見彌陀佛願我盡生無別念唯心淨土獨相隨又阿彌陀經云若有信者應當發願願生彼國又懺云衆生無邊誓願度煩惱無盡誓願斷法門無量誓願

學佛道無上誓願成此則謂之四弘誓願故我慈照集懺恐人著事迷理乃云自性衆生誓願度自性煩惱誓願斷自性法門誓願學自性佛道誓願成此四句直明真理欲令一切人於自性中度了一切妄念衆生所謂邪

迷雜想貪癡嫉妬嗔怒惡毒等心故令發大誓願自性自度也又於自性中斷除一切煩惱所謂塵勞業識邪思惡念猶如浮雲障覆自性光明不現故令發大誓願自斷除之永不令起又於自性中修學一切法門所謂念

佛三昧悲智行願無量法門故令發大誓願
自悟自修常無退失直至菩提不以得少爲
足又於自性中自信有佛發大誓願常自觀
照自願成佛菩提此乃慈照老婆心切明明
與後人開了一箇門戶只要你諸人自信自

野九

二

肯從這裏入頭悟自性彌陀達唯心淨土入
諸佛境界成就無上菩提嗟乎世之善人不
知此意向外別求何異持神珠而巡乞也可
不惑乎普願見聞迤相勸策同興正念早上
玄途覺前前非明後後位立大志氣奮大勇
猛發大誓願誓度無邊衆生誓斷無盡煩惱
誓學無量法門誓願往生西方極樂世界見
阿彌陀佛誓同一切善人圓成無上佛道可
謂不得春風花不開花榮須感春風力

勸發大願

慈照云有行無願其行必孤有願無行其願
必虛無行無願空住閻浮有行有願直入無
爲此乃佛祖修淨業之根本也備觀今時信
人皈投佛會或爲病苦而發心或爲報親而
舉意或爲保扶家宅或爲怖罪持齋雖有信

心而無行願雖云念佛不達本根凡修善緣
皆爲了還心願罕有爲自己生死發願念佛
求生淨土者往往香燭道場祝願回向之辭
皆是表獻神明消災延壽而已故與經懺本
意相違不合諸佛本願縱使一生修誦不明

野九

三

理趣錯用工夫是謂終日數他寶自無半錢
分也臨終所以不得往生淨土者蓋無行願
故也又有一等癡人投佛受戒乃於三寶前
焚香誓願云我若破戒甘當惡病纏身永墮
地獄或言左眼出血右眼出膿自肯自甘類

官司之執結多見有口無心破齋犯戒自願受報痛苦奚堪甘心墮落之門自取喪身之兆殊不知佛祖興慈運悲何嘗教人如此皆是邪師過謬錯將罰咒以爲發願耳何惑之甚哉予嘗憫念勸令同發正願求生淨土願

同作佛彼則曰我是凡夫豈敢望生淨土要作佛耶我有此心又成妄想予應之曰不然善知識佛是覺也淨土是心也此心誰不有之覺即佛也迷則衆生也世人背覺合塵輪迴三界四生六道善惡業緣受報好醜皆因

妄認四大爲我身六塵爲實有隨入幻境日夜流轉未嘗暫省回光從生至老惟憂家緣不辦財不稱心愈多愈求愈貪不足雖曰積善奉佛禮拜作福燒香只願富貴榮華長生不死纔做此小好事便有伏願數般要保穀

米盈倉蠶絲倍萬子孫光顯牛馬孳生纔有一不如意便怨佛不保全日日財喜增添始道天龍感應如此貪謀正是妄想自不知覺却言念佛求生淨土之說作妄想者豈不大顛倒乎凡曰作福盡屬有爲蓋世間有漏之

因非出世無爲之道修行佛子宜善思惟今日有緣得逢佛法當須究本莫競枝條一念回光修出世法願捨娑婆願生淨土亦如久客在於它鄉思欲歸于故里也此願生淨土願作佛之心豈可比同凡夫妄想哉豈不見

野九

四

懺中云願我臨欲命終時盡除一切諸障礙面見彼佛阿彌陀即得往生安樂刹者是也可謂一朝踏着來時路始覺從前錯用心

慈照宗主示念佛人發願偈并序

彌陀節要云念佛之人最急一事不善相應

何以故雖云持戒念佛不會發心願生淨土皆是埋頭過日自失善利大凡念佛先要發心欲超生死往生淨土須以大願自爲主意常須念佛早晚專心禮拜彌陀如朝帝主兩不失時日近日親心口與佛相應去佛不遠

口念心想心願見佛發深重願決信無疑日久歲深工夫純熟自然三昧成就臨命終時彌陀接引淨土現前更願現生之內常遇善知識不值邪見師無惑我心不生懈怠若也如此念佛深信發願是信行願三不虧也臨

終見佛即非外來盡是唯心顯現猶如種子在地逢春發生豈是外來皆從地出也今之修行亦尔念佛信願納在八識心地臨終發現淨土彌陀即非外來皆從自心出也偈云

萬法從心生

萬法從心滅

野九

五

野九

五

我佛大沙門
持戒無信願
唯得人大福
展轉難脫離
不識佛深意

常作如是說
不得生淨土
福盡受輪迴
看經無慧眼
後世得聰明

亂心難出離
現世無名利
則是阿彌陀
回向生樂國
千中不失一

不如念佛好
行坐不多羅
發願持戒力
正是合行持
釋迦金口說

彌陀親攝受
諸天善護持
與佛不相遠
轉于大法輪
譬如貧家女

諸佛皆護念
見此念佛人
應當坐道場
普度無邊衆
腹孕轉輪王

諸天常愛護
腹中有貴子
其意亦如是
不久當成佛
其人自不知

貧女自不知
今此念佛人
憶佛常念佛
諸佛善護持
我當生淨土

却要來後世
譬如貧人家
藏神常守護
貧人自不知
逐日趁客作

再得生人中
地內有伏藏
不令其有失
家內有寶藏
求衣食自濟

今此念佛人
不知念佛人
自說我無分
譬如病人家
不知妙藥性

其意亦如是
具足如來藏
返要生人中
自有真妙藥
不能自治病

野九

六

每日床枕邊
今此念佛人
不知念佛心
能爲大醫王
利濟一切人

痛苦受無量
其意亦如是
能滅貪瞋病
能爲大寶藏
能爲大法王

覆護一切衆
不得生淨土
後世願爲人
方可生彼國
常作如是說

將爲是凡夫
且自持齋戒
展轉更修行
多見修行人
不稱彌陀願

不合淨土經
畢竟難出離
皆是自障心
一蹉是百蹉
信我如來說

邪見障覆心
非是他人障
今世不得生
勸汝修行人
佛無不實語

野九

六

豈是虛誑言

但當自精勤

一心求淨土

因風吹於火

用力不消多

幸有念佛心

回願超三界

逢寶不取寶

遇食受饑寒

咄哉大丈夫

野九

不見真實意

我今畧勸讚

展轉傳與人

代我廣流通

作於如來使

真是諸佛子

真名報佛恩

普願如說行

同生極樂國

求生淨土要在發願

智度論第八卷問曰諸菩薩行業清淨自得勝報何必要立誓願然後得之且如田家得穀豈復待願耶答曰作福無願無所標立願爲導御能有所成如佛所說若人修少福少

戒不知解脫正因聞說人天之樂心常願樂命終之後各生其中此皆願力所致菩薩求生淨土在乎志願堅強然後得之以此故知因彼願力得受勝果古德云佛果叟絕登之則有階法雲峻極屆之則有漸大心初發立

德照於來生弘誓纔興妙願徧於空界一念興志即塵劫之瑞華半刻虔躬乃大千之甘露大莊嚴論云佛國大事獨行功德不能成就要須願力資助引而成之以願力故福德增長不失不壞當生佛土隨願見佛華嚴經

云是人臨命終時最後剎那一切諸根悉皆散壞一切親屬悉皆捨離一切威勢悉皆退失乃至象馬車乘珍寶伏藏如是一切無復相隨唯此願王不相捨離於一切時引導其前一剎那中即得往生極樂世界

善導和尚修行發願儀

修淨土入觀及睡時應發此願若坐若立一心合掌正面向西向十聲阿彌陀佛觀世音大勢至清淨大海衆菩薩竟發願云弟子現是生死凡夫罪障深重輪迴六道苦不可言今

野九

八

遇知識得聞彌陀名號本願功德一心稱念求願往生願佛慈悲不捨哀憐攝受弟子某甲不識佛身相好光明願佛示現今我得見及見觀音勢至諸菩薩等彼世界中清淨莊嚴光明妙相等令我得了得見發此願已一

心正念即隨意入觀或臨卧發願而睡或有正發願時即得見之或睡時得見但辦專志自然圓滿所願

白侍郎發願求生淨土文

記曰我本師釋迦如來說言從是西方過十

萬億佛土有世界號極樂以無八苦四惡道故也其國號淨土以無三毒五濁故也其佛號阿彌陀以壽無量願無量功德相好光明無量故也諦觀此娑婆世界衆生無賢愚無貴賤無幼艾有起心歸佛者舉手合掌必向

西方有怖厄苦惱開口發聲必先念阿彌陀佛又範金合土刻石綉紋乃至印水聚沙童子戲者莫不率以阿彌陀爲上首不知其然而然由是而觀是彼如來有大誓願於此衆生衆生有大因緣於彼國土明矣不然則南

野九

九

北東西過去現在未來佛甚多矣何獨如是哉何獨如是哉唐中大夫太子少傅白居易當衰暮之歲中風痺之疾乃捨俸錢命工人杜敬宗按阿彌陀無量壽二經畫西方世界一部高九尺廣丈有三尺阿彌陀佛坐中央

觀音勢至二大士侍左右人天瞻仰眷屬圍
遶樓臺伎樂水樹花鳥七寶嚴飾五彩彰施
爛爛煌煌功德成就弟子居易焚香稽首跪
於佛前起慈悲心發弘誓願願此功德回施
一切衆生一切衆生有如我老者如我病者

願離苦得樂斷惡修善不越南部便覩西方
白毫大光應念來感青蓮上品隨願往生從
現在身盡未來際常得親近而供養也欲重
宣此義而說讚曰極樂世界清淨土無諸惡
道及衆苦願如我身老病者同生無量壽佛

所

馮濟川施經發淨土願文

其畧曰予之施經一事而具二施何故以財
贖經是謂財施以經傳法是謂法施按佛所
說財施後世當得天上人間福德之報法施

當得世智辯聰蓋世之報當知此二報者皆
是輪迴之因苦報之本我今發願願回此二
報臨命終時莊嚴往生西方極樂世界蓮華
爲胎托質於中見佛聞法悟無生忍登不退
階入菩薩位還來十方界內五濁世中普見

其身而作佛事以今日財法二施之因如觀
世音菩薩具大慈悲遊歷五道隨類化形說
諸妙法開發未悟永離苦道今得智慧普與
衆生悉得成佛乃予施經之願也右出捨經
碑馮察院施經不求人天路上富貴聰明而

野九

十

以此功德悉回向淨土願見彌陀可謂智識
高明深達佛理大乘人也嗟見蓮社人終日
念佛而求後世福報豈不謬哉予願一切人
同生淨土故舉馮察院施經發願文與諸人
作樣子凡有修福念佛乃至一毫之善悉皆

發願回向西方有所歸趣臨終定生淨土也
廬山蓮宗寶鑑念佛往生正訣卷第八

十一
二章

念佛往生正訣說

淨土之道往生一門具載群經明如日實
修行者入道之方乃念佛人格神之所無念
之念念即念於阿彌無生之生生則生於淨
土是故深行菩薩歷代師模名鄉巨儒庶民
氏女篤信斯道結誓進脩者不可勝計其意
何哉必欲生淨土見阿彌而後已須知佛本
無身亦無其土皆衆生心淨所由致感也經
不云乎是心作佛是心是佛諸佛正徧知海
從心想生故天台大師釋之曰佛本是無心
淨故有良以衆生心淨則法體現前衆生心
染則苦道流轉此乃理之常也又何疑乎以
圓實教所談唯心本具者若比若彼若染若

野九

十一

淨皆不越吾心之一念也夫心者造罪之源
成佛之本所謂介爾有心三千具足然而三
千諸法既具十界十如三種世間互具而顯
則安養國土捨此何求非但淨土唯心蓋地
獄亦唯心矣又云阿鼻依正全趣極聖之自
心身土毘廬不逾下凡之一念纔起悟迷之
見便入邪流不分染淨之殊方歸正道刀山
劍樹總是空華寶渚金蓮皆成夢事如斯受
用始了真修脫或未然宜依權漸而加修進
深信阿彌陀佛即我本性貴在禮誦懺念之
間行住坐卧之處照於三觀契乎一心全智
發境全境是心故知佛正佛依皆是心具心
造信哉淨土彌陀昭昭然影現于心目之間
譬如磨銅成鏡必假施功直使塵垢淨盡無
餘則本體圓明自然顯現一切色像俱無隱

焉當知鏡中之像若謂是有不可承而攬之若謂是無則色像歷然可見所謂有不定有無不定無有無雙遣任運是中矣哉不思議境唯心妙觀之道也欲證斯道必明于因當知因該果海果徹因源原自始要不離一

念從因至果只在初心苟能於此善修如是之因至於臨終必獲如是之果是知專心念佛爲因往生淨土爲果始從聞信信以修持積淨業之工夫得功緣之成滿時節既至大理昭然視死如歸豈不慶快故茲直示往生正訣明指到家路頭此時自信不疑他日出門不誤如此則安養國土何患不生自性彌陀決然可見與夫列聖群賢同成淨行歷位至極者實惟斯道矣

父母臨終往生淨土

野九

十三

諦信淨土發心念佛者蓮池下種時也一心念佛衆善莊嚴者蓮華出水時也念佛功成淨土緣熟華開見佛時也佛子事佛固先事親拳拳孝念不捨須臾順父母之情懷察父母之顏色纔秉攝養力爲調和又當念風燭

不停須防往生時至預以父母平生所修一切善緣好事及衆人助修功德聚爲一疏時時對父母讀之要令父母心生歡喜又當勸令坐卧西向不忘淨土又當東向設彌陀像勸令一心念佛焚香鳴磬躬率衆人同聲和之常使佛聲相續不絕無以世情悲戀恐失正念臨捨報時猶當用意自然諸聖來迎往生淨土寶蓮花中決定成佛孝子侍養父母正在此時不宜懈怠此孝子事親臨終之大事也以此爲孝其孝至矣又况從古以來念

佛往生西方者非一畧舉數條以爲念佛者
鑑所以烏長國主觀衆神以來迎隋文皇后
乘異香而西邁姚行婆請佛相待宋世子侍
母同歸可謂一超直入如來地矣

臨終三疑

野九

十三

慈照宗主淨土十門告誡云念佛人臨終三
疑不生淨土一者疑我生來作業極重修
日淺恐不得生二者疑我欠人債負或有
心願未了及貪嗔癡未息恐不得生三者
疑我雖念彌陀臨命終時恐佛不來迎接
有此三

疑因疑成障失其正念不得往生故念佛之
人切要諦信佛經明旨勿生疑心經云念
阿彌陀佛一聲滅八十億劫生死重罪上
至一心不亂下至十念成功接向九蓮令
辭五濁苟能心心不昧念念無差則疑情
永斷決定

往生可謂十萬億程彈指到絲毫擬議隔千
山

臨終四關

四關者慈照宗主淨土十門告誡云凡夫雖
有信心念佛緣爲宿業障重合墮地獄乘佛
力故於床枕間將輕換重若也因病苦故悔
悟身心當生淨土也無智之人不了此事却
言我今念佛又有病苦反謗彌陀因此一念
惡心徑入地獄此是一關也二者雖則持戒
念佛緣爲口談淨土意戀娑婆不求出世善

根爲愛家緣長旺以致臨終遭病怕死貪生
信受童兒呼神喚鬼燒錢化馬殺戮衆生緣
此心邪無佛攝護因茲流浪墮落三塗是二
關也三者或因服藥須用酒腥或被親情逆
相逼勸此人無決定信喪失善根臨終追赴

王前任王判斷是爲第三關也四者臨終之際思惟活業繫綴資財愛戀眷屬心放不下失却正念故於家舍隨鬼趣中已爲禍祟或爲慳犬或作蛇身守護家庭宛如在日是爲四關也是以楊提刑言愛不重不生婆婆念

野九

十四

不一不生淨土誠哉是言凡修淨土者要當酌實蠲浮思專想寂念念彌陀全身放下但能堅此一念便可碎彼四關則淨土蓮臺的非遙矣可謂一句彌陀無別念不勞彈指到西方

臨終決疑撮要

凡修念佛之人欲生淨土每念世間一切無常成必有壞生必有死若不親聞佛法則捨身受身輪轉三界四生六道無解脫期我今有緣得聞正法得修淨業唯佛爲念捨此報

身當生淨土入彼蓮胎受諸快樂永脫生死不退菩提此乃大丈夫平生之能事也纔有疾病正要向前坦蕩身心莫生疑慮直須西向正坐專想阿彌陀佛與觀世音大勢至菩薩及無數化佛現在其前一心稱念南無阿

彌陀佛聲聲不絕於諸世間一切事務不得思念不得貪戀若或心念起來但要急稱佛號於念念中除滅罪障若病人昏困不能自念則看病人當方便警策勸而諭之如此用心助令命盡只此一念決定往生淨土命若

野九

十五

未盡自得安寧慎勿妄起留戀世間之心當存自存當死須死但辦往生何須疑慮若解此理如脫弊服以着上衣一捨凡身便登佛地奇哉偉哉至矣盡矣或聞天樂異香或見金蓮寶座此乃聖境現前慎勿疑爲魔事經

云修淨業者托佛願力觀佛寶相爲境故如人近附帝王誰敢干犯此阿彌陀佛有大慈悲力有大誓願力有大智慧力有大三昧力有大威神力有大摧邪力有大降魔力有天眼遠見力有天耳遙聞力有他心徹鑑力有光明遍照攝取衆生力有如是等不可思議無量最勝功德之力豈不能護持修行念佛之人至臨終時令無魔障生淨土哉可謂粉骨碎身未足酬一句了然超百億

僧濟臨終注想西方

廬山尊者弟子僧濟臨終之際尊者遺燭一枝曰汝可運想西方濟執燭注想金容攝心無亂復請僧衆誦十六觀經五更濟以燭授同袍遂假寤及寤曰吾夢見阿彌陀佛垂手接引吾當去矣言訖右脇而逝此非戒定慧

之所重修而豈能溫容輒語於生死岸頭耶可謂得路便行無罣礙等閑抹過死生關

善導和尚臨終往生正念文

知歸子問曰世事之大莫越生死一息不來便屬後世一念差錯便墮輪迴小子累蒙開誨念佛往生之法其理甚明又恐病來死至之時心識散亂仍慮他人感動正念忘失淨因伏望重示歸徑之方俾脫沉輪之苦師曰善哉問也凡一切人命終欲生淨土須是不得怕死常念此身多苦不淨惡業種種交纏

野九

六

若得捨此穢身超生淨土受無量快樂解脫生死苦趣乃是稱意之事如脫弊衣得換珍服但當放下身心莫生戀着凡遇有病之時便念無常一心待死叮囑家人及看病人往來問候人凡來我前爲我念佛不得說眼前

閑雜之話家中長短之事亦不須軟語安慰
祝願安樂此皆虛花無益之語若病重將終
之際親屬不得垂淚哭泣及發嗟嘆懊惱之
聲惑亂心神失其正念但一時同聲念佛待
氣盡了方可哀泣纔有絲毫戀世間心便成

呈礙不得解脫若得明曉淨土之人頻來策
勵極爲大幸若依此者決定超生即無疑也
又問曰求醫服藥還可用不荅曰求醫服藥
初不相妨然藥者只能醫病不能醫命命若
盡時藥豈奈何若殺物命爲藥以求身安此
則不可余多見世人因病持齋方獲小愈復
爲醫者以酒食血肉佐藥其病復作信知佛
力可救酒肉無益也又問曰求神祈福如何
荅曰人命長短生時已定何假鬼神延之耶
若迷惑信邪殺害衆生祭祀神鬼但增罪業

野九

十七

友損壽矣大命若盡小鬼奈何空自惶惶俱
無所濟切宜謹之當以此文帖向目前時時
見之免致臨危忘失又問曰平生未曾念佛
人還用得荅曰此法僧人俗人未念佛人
用之皆得往生決無疑也余多見世人於平

常念佛禮讚發願求生西方甚是勤拳及至
臨病却又怕死都不說着往生解脫之事直
待氣消命盡識投真界方始十念鳴鐘恰如
賊去關門濟何事也死門事大須是自家着
力始得若一念差錯歷劫受苦誰人相代思
之思之若無事時當以此法精進受持是爲
臨終大事可謂一條蕩蕩西方路徑且歸家
莫問津

化佛來迎

宗鏡錄或問曰心外無佛見佛是心云何教

中說有化佛來迎生諸淨土答曰法身真佛本無生滅從真起化接引迷根以化即真真應一際即不來不去隨應物心又化體即真說無來去從真流化現有往還即不來相而來不見相而見也不來而來似水月之頓呈不見而見猶行雲之忽現問如上所說真體即湛然不動化相即不來而來正是心外有他佛來迎云何證自心是佛答曰此乃是如來本願功德力故令彼有緣衆生專心想念能令自心見佛來迎不是諸佛實遣化身而來迎接但是有緣時機正合能令自心見佛來迎則佛身湛然常寂無去無來衆生識心託佛本願力一念變化有去有來如鏡面像似夢施爲鏡中之形非內非外夢中之事不有不無但是心生非關佛化真信修行之士

野九

大

端的是要生西方極樂世界專一意念持一句阿彌陀佛只此一念是我本師只此一念即是化佛只此一念是破地獄之猛將只此一念是斬群邪之寶劍只此一念是開黑暗之明燈只此一念是度苦海之大船只此一念是脫生死之良方只此一念是出三界之徑路只此一念是本性彌陀只此一念達唯心淨土但只要記得這一句阿彌陀佛在念莫教失落念念常現前念念不離心無事也如是念有事也如是念安樂也如是念痛苦也如是念生也如是念死也如是念如是一念分明不昧又何必問人覓歸程乎可謂行船盡在把稍人達者同遊涅槃路

賢首菩薩臨終讚念佛偈

又放光明名見佛 此光覺悟將終者

令隨意念見如來 命終得生其淨國
見有臨終勸念佛 及示尊像令瞻仰
俾於佛所深歸信 是故得成此光明
天竺慈雲式懺王云前四句讚佛放光見其
光者名爲見佛能令臨命終時淨土往生後

野九

十九

四句讚佛修此光明之因其因者祇是勸臨
終人念佛并示其佛像令彼見已生信故成
佛時得此光明令以偈普勸信受凡遇眷屬
及一切人臨命終時先於床前安置此像令
彼眼見及勸令念佛若痛苦所逼或先無信
心不肯念者亦須種種方便勸令稱佛下至
十念得滅重罪生佛淨土此一利益不可思
議若勸得一人生淨土縱自不修行亦合得
生淨土况當來成佛能放光明照一切衆生
臨終見佛也多見世人爲恩愛故聚頭哭泣

不思救度是名惡知識也苦哉苦哉恩愛所
牽墮落惡道無解脫期雖慈親孝子亦不奈
何以此思之可不勉哉可謂普願沉溺諸衆
生速往無量光佛刹

情想多少論報高下

首楞嚴經云佛告阿難一切世間生死相續
生從順習死從變流臨命終時未捨煖觸一
生善惡俱時頓現純想即飛必生天上若飛
心中兼福兼慧及與淨願自然心開見十方
佛一切淨土隨願往生情少想多輕舉非遠
即爲飛仙情想均等不飛不墜生於人間想
明斯聰情幽斯鈍情多想少流入橫生重爲
毛群輕爲羽族七情三想沉下水輪生於火
際受氣猛火身爲餓鬼常被焚燒水能害已
無食無飲經百千劫九情一想下洞火輪輕

生有間重生無間二種地獄純情即沉入阿鼻獄若沉心中有謗大乘毀佛禁戒誑妄說法虛貪信施濫膺恭敬五逆十重更生十方阿鼻地獄

命終善惡感報優劣

野九

二十

守護國界主經云佛言若人命終之時預知時至正念分明洗浴着衣吉祥而逝光明照身見佛相好衆善俱現定知此人決定往生淨土若人念佛持戒無精進心命終亦無善相亦無惡相地府不收安養不攝如睡眠去

此人疑情未斷生於疑城五百歲受樂再修信願方歸淨土若人起憐憫心正念現前於財寶妻子心無愛戀眼色清淨仰面含笑想念天宮當來迎我耳聞天樂眼見天童捨此報身定生天界若人生柔軟心起福德心身

無病難憶念父母妻子於善於惡心不錯亂其心正直遺囑家財辭別而去定生人界若人於已眷屬惡眼瞻視舉手捫空便利不覺身常臭穢兩目紅赤仆面而卧踰身左脇百節酸疼或見惡相口不能言伸吟叫喚冤債

現前心識散亂狂惑顛倒徧體如冰手捻死拳身硬如石此人命終定入地獄若人好舐其唇身熱如火常患饑渴好說飲食張口不合貪戀財寶命卒難斷開眼而去此人定入餓鬼若人身染重病如在雲霧心神昏散怕

野九

二十一

聞佛名多愛食噉血肉之味不受勸化愛戀妻兒蹠手足指徧身流汗出衆澁聲口中咀沫此相現前定入畜生

臨終十事不尅念佛勸預修

凡夫業重處處貪生若不預辦工夫臨終不

尅念佛天台十疑論云臨終念佛名最後心其心猛利一念佛名即生淨土蓋垂死時其心猛健決定故勝百歲行力也或問曰臨終念佛即得往生何假預修勝業答曰人生壽夭難測短長或即病困昏迷或即非時奄逝

既闕生前之善難逃後世之殃須預作於善緣是恐防於斯咎十種命終不尅念佛一者善友未必相逢二者或疾苦纏身神昏性亂三者偏風失語不得稱名四者狂亂失心注想難尅五者或逢水火不暇志誠六者輒遇虎狼驚惶倉卒七者臨時惡友破壞道心八者飽食過多昏迷致命九者軍件鬪戰忽爾身亡十者或墜高岩傷中身命故知臨終難保吉凶須是預先脩習可謂閑時做下急時用免得臨期手脚忙

廬山蓮宗寶鑑念佛往生正訣卷第八

音釋

尅

休膏切
遠也

踉

具負切
踉不伸身

件

吳甘切
偶發也

野九

主二

廬山蓮宗寶鑑念佛正報卷第九

野十

東林禪寺蓮宗善法祖堂勸修淨業臣僧普度謹自編集

念佛正報說

因修白業果感淨方化佛引上金臺賢聖迎
歸樂國高超三界迥出四流業盡塵消亡情

野十

絕慮質托蓮苞之內神遊寶界之中面奉阿
彌陀佛爲本師得見觀音勢至爲親友清淨
海衆大會寶池九品勝流各說本行五香拂
體三德嚴身暫扇微風聆衆音之演法續紛
花雨靚談網之舒光綜縹雲霞近浮神足輕

盈衣穢盛接妙華晨謁慈顏得法印而還國
暮遊金刹聽王偈以逍遙瑞蓮初綻爲遺殘
映新學化生行成不退豈惟近忘塵苦抑亦
因果非遙戲翫瓊林灌沐德水百寶之樓閣
華麗七重之行樹森嚴景序長春地平如掌

衣食隨念而至天樂不鼓自鳴受用出於自
然快樂實非人世諸天萬億倍不可比論諸
佛恒河沙悉皆稱讚身具光明妙相跡踐聖
道香階壽命難量悲願無盡捨兩重生死既
非果趣之身獲本際常光離去來之相緣強
德勝皆由念佛心生福備壽長盡是淨因感
報故知佛有攝生之願生有感佛之因如是
勝緣起於信願以斯妙果成就正依或禪誦
七寶池邊或經行黃金地上飽禪悅法喜珍
味掛慈悲喜捨天衣功德資神增加悲智雍
容辦道長養聖胎入無生門便登菩薩之位
得阿跋致不退菩提之心住法王家盡授如
來之記聞大乘法同稱補處之尊念念虛玄
心心靜慮得三昧正定具六種神通獻供十
方往來無碍分身億刹不失定心淨法水於

三千出衆生於火宅自他兼利行願周圓可謂百千三昧盡唯心功德莊嚴歸自己

功德莊嚴

大彌陀經菩薩功德章云往生彼國者皆悉容貌柔和相好具足禪定智慧通達無礙神

野十

二

通威德無不圓滿深入法門具無生忍諸佛秘藏究竟明了調伏諸根身心柔軟安然寂靜盡般泥洹深入正慧無有餘習依佛所行七覺聖道修行五眼照真達俗辯才總持自在無礙善解世間無邊方便所言誠諦深入

義味敷演正法度諸有情等觀三界空無所有知一切法無相無爲無取無捨遠離顛倒堅固不動如須彌山智明如日廣大如海出功德寶熾盛如火燒煩惱薪忍辱如地一切平等清淨如水洗諸塵垢如虛空無邊不障

一切故如蓮花出水離一切染故如雷震響出法音故如雲發降法雨故如風動樹發菩提芽故如牛王聲異衆牛故如龍象威難可測故如良馬行乘無失故如獅子王無怖畏故如尼拘律樹覆蔭大故如優鉢羅華難

值遇故如金剛杵破邪山故如梵王身生梵衆故如金翅鳥勝毒龍故如空中禽無住跡故如雪山照功德淨故如慈氏觀法界等故專樂求法心無厭足常欲廣說志無疲倦擊法鼓建法幢曜慧日除癡冥修六和敬常爲

野十

三

師導爲世明燈最勝福田以安羣生功慧殊勝莫不尊重恭敬供養無量諸佛常爲諸佛所共讚嘆究竟菩薩諸波羅蜜遠離聲聞緣覺之地佛告阿難彼諸菩薩以念佛故成就如是無量功德我但爲汝舉要言之若廣說

者雖盡億劫不能窮盡

淨土增修聖果

大彌陀經云諸念佛人生淨土已即入七寶池中澡雪形體蕩滌情慮各坐一華上自然微風吹動諸寶行樹出微妙音散諸寶華異

香芬馥皆作佛事聞者喜悅無量自然心開各往修進有在地講經者有在地誦經者有在地說經者有在地口授經者有在地聽經者有在地念經者有在地思道者有在地坐禪一心者有在地經行者有在虛空中講經

者有在虛空中誦經者有在虛空中說經者有在虛空中口授經者有在虛空中聽經者有在虛空中念經者有在虛空中思道者有在虛空中坐禪一心者有在虛空中經行者其間聲聞弟子皆發大心有未得聖果者因

是而得聖果有未得不退轉地者因是而得不退轉地菩薩各隨其資而有所得莫不忻然適意而悅遊戲三昧利樂有情由念佛之堅心稱彌陀之本願往生佛子同列此班智慧辯才神通如意風帆勢順速證菩提超萬

劫之輪迴得諸天之仰重淨業勝善大果昭然寄語同流無忘此事喚動蛭飛猶有分大丈夫兒當勉旃

淨土三十益

天台智者大師淨土羣疑論云生西方者有

野

四

三十種益一往生佛土益二得大法樂益三親近諸佛益四遊歷十方供佛益五親聞佛說益六福慧資糧疾得圓滿益七速證菩提益八諸天人等同集一會益九無退轉益十無量行願增進益十一鸚鵡舍利宣揚法音

益十二風樹樂響益十三摩尼水漩演苦空
益十四諸樂奏妙音益十五四十八願益十
六真金色身益十七形無醜陋益十八具足
六通益十九常住定聚益二十無諸不善益
二十一壽命長遠益二十二衣食自然益二
十三唯受眾樂益二十四三十二相益二十
五實無女人益二十六無有小乘益二十七
離於八難益二十八得三法忍益二十九身
常有光益三十得那羅延身力益可謂處處
菩提道明明功德林

淨土成佛

金剛定後菩薩因圓解脫道中如來果滿具
四無量心得四無礙辯十八種法不共二乘
十力現前說法無畏塵沙惑盡萬行功成十
號俱彰三身圓顯具九十七種大人相放八

野十

五

萬四千大光明悲智俱融福慧雙足現居十
重報土能垂萬類化身布大慈雲雨大法雨
滂流法界潤澤群生咸悟本心同成正覺○
選佛若無如是眼宗風那得到如今
廬山蓮宗寶鑑念佛正報卷第九

廬山蓮宗寶鑑念佛正論卷第二十五章

念佛正論說

夫奉教念佛之士叨法王之遺蔭作如來之所使必以摧邪顯正激濁揚清爲後學著龜作生靈耳目爲已任也苟弗能而默默自守則尸祿備員於佛門矣雖講授亦奚以爲豈不聞因筌然後得魚體教然後修行名教未正行如之何哉故不得不論也是以仲尼爲政正其不正涅槃遺誠急在糾過余嘗觀吾佛世尊之王西竺也象無象之象言無言之

言以復羣生之性由是頓教漸教大乘小乘盈溢乎龍宮海藏無非摧邪顯正激濁揚清之旨而大地生民率其化而復其性者可勝計乎其間偏讚西方謂捷徑修行之道者蓋以阿彌陀佛有廣大願力攝娑婆衆生而歸

淨邦是令反妄而證真也所以諸佛共讚菩薩同遵晉社創修千古之高風不墜慈照集馘十方之正化流通大矣哉淨土之道其爲體也以彌陀即本性其爲宗也以淨國即唯心其爲用也以仁恕即滅惡生善此之三者

蓋顯三世報應制其事一心空寂窮其理俾達乎理者反其妄信其事者遷乎善以斯而利于上下實助於周孔之教贊翊皇化其亦至矣使一人能行是道以訓于家家以導於鄉鄉以達於邦以至於無窮則天下之民涵

野十

六

道泳德融神實相高步無何而極佛境界豈止以爲善人君子而已哉夫如是則何患乎忠孝不修禮讓不著歟以此觀之豈非能仁之道與仲尼之道共爲表裏以訓于民耶泊乎歷朝敬之廣其教像法事之非其人廣其

教則弊倖生非其人則淳朴泯而乃以佛堂
高大爲奢誇聲利溫飽爲能事徒以多爲貴
則壞其道者衆矣言以怪爲美則惑其聽者
庶矣迺相訟襲以成鄙各日復一日紅紫亂
朱使夫清靜仁恕之風消蕩矣於是蠶食蠹
耗之謗由茲而盛焉斯乃敬之事之者之失
非其教之咎也今之人多不察其所由視其
徒之不肖者而遷怒於善人教法焉亦何異
乎以丹朱而罪堯因商均而過舜服藥失度
歸咎於神農縱火致焚反怨於燧人也耶愚
乃不佞學佛之道有年矣既粗領其旨而頗
有扶傾之心非敢私於已而欲公於衆以救
其弊也嘗謂教門之利害有四一曰師授不
明邪法增熾而喪其真二曰戒法不行綱常
紊亂而犯其禁三曰教理未彰謬談非義而

野十

七

惑其衆四曰行願不修迷入邪岐而墮於魔
由是亂名改作聾瞽後學非止一端可傷乎
哉自是叨濫之徒一以傳十十以傳百以
千萬流毒於海內速若置郵何以知其然正
說難行邪風易染此必然之理也噫祖道之
不傳也久矣欲人之無惑者難矣吾雖不敏
而實悲焉思欲分條析理廣被前聞截僞續
真開茲後學恨無慧辯徒事管窺由是齋沐
一心投誠三寶詢求大教參考玄文楷定正
宗破諸異說總成念佛正論剖證佛祖格言
普告諸方咸躋覺路庶使聖教隱而復彰衆
生罪而還福有客至而問之曰修行了自己
生死何須論他人長短予應之曰理不然也
豈不聞如來出世無一法不是利生菩薩修
行肯纖毫而爲自己佛子示同外道方便轉

彼邪心楞嚴十種魔民皆因錯解華嚴十類
魔業示其正歸嗟惡慧之邪修自甘心於險
道遇斯境界豈可緘言念彼愚癡寧容坐視
况世尊悲心付囑留大願而普濟迷津菩薩
如教修行示同事而化令成佛是其本行夫
復何疑如其見迷路而不指正途慈悲安在
覩沉溺而不思拯接方便何存隨順正法而
破魔是無上大智之業調伏衆生而入道是
諸佛之所攝持誓當捨命而立真宗終不已
而忘佛囑衆生盡而悲心益固空界殞而我
願無窮倘逢有識之賢必能助弘斯道可謂
得此深心奉塵刹是則名爲報佛恩

西方彌陀說

佛說西方極樂世界其土有佛號阿彌陀如
經所載有理有迹論其理者西方即自性也

野十

八

此性無形無相不變不壞歷劫堅固譬彼精
金在易卦則曰兌爲寂靜故謂之西方也金
者其色明金體白淨舉之喻法性蓋世間之
人迷於塵境妄念不息紛然動作在易卦則
曰震故謂之東方也人能反妄歸真復其本
靜得見自性即名捨東方執着之穢土登西
域淨明之金地也在方無方以法喻表其理
體華嚴合論謂文殊自東方來者蓋文殊是
根本不動智也東是萬物發生震動之者初
明之地從此智則生信故華嚴以信位爲初
生佛家丑寅之間爲清朝智日初明像文殊
發起凡夫入信見道智門漸增故巽爲風爲
教化風能穢揀淨辰巳之間上應角宿爲僧
道爲齋戒爲衆善之門喻進修地位至午爲
中道易卦曰離爲南方爲正爲日爲明麗離

中虛故明像諸法空則智日當陽徧照天下
法華龍女南方成佛是其義也西南爲坤爲
地爲安靜爲柔順爲母爲生養正西爲兌金
旺之地日沒之所火死在酉爲肅寂爲收藏
西北爲乾爲天爲父爲金爲剛健北方爲坎

野

九

爲水爲君爲師利生濟物垂教正治以水制
火以君對臣臣明君正又水多則濫故東北
爲艮爲山爲止下方爲禪定爲謙下上方爲
觀照爲智慧爲空界如日月三光處空照臨
萬物也經中不舉餘方而單指西方者蓋取

淨對穢也以悟攝迷以靜對動也以果對因
也過十萬億國土者出四維上下十方之限
量也超乎四惡道之十惡業也越乎人天十
善之境界也不爲諸法之所拘也有世界者
真如實際理地即自性西方極樂者即言此

性無憂惱也何以知其然見性之人不爲塵
境惑了知諸法空心常坦然無念無爲無思
無慮安住大寂滅之地念念常生智慧法法
皆如我爲法王於法自在故名極樂也論其
迹則實有此箇世界也佛叮嚀詳復言之豈

虛哉有者非方域處所之有乃不有之有即
是真空妙有也真空者即是實相妙有者森
羅眩目法界交參豈有東西之辨哉圓覺經
云一切如來光嚴住持是諸衆生清淨覺地
平等本際圓滿十方不二隨順於不二境現

諸浮土阿彌陀是梵語此云無量壽也佛者
覺也即當人分上廣大圓覺之性清淨法身
之佛也此性不生不滅亘古亘今上至諸佛
菩薩下至六道衆生各各具此覺性所以稱
同名同號也噫世人昧之久矣妄取色相顛

倒馳求甘自沉淪我佛應世開方便門讚說
淨邦令其信慕苟能自肯自信方悟堅明爲
西方盡西矣惑火滅盡土皆淨焉則知十方
世界總是彌陀觸目遇緣無非極樂百千三
昧應念現前無量法門隨心顯發高超徹見

野十

十

是樓閣含育利生名宮殿防非護善名欄楯
清淨無染是蓮華徹底澄清謂之池隨方逐
圓謂之水仁慈濟利謂之寶戒定慧薰謂之
香七菩提樹覆蔭重重八聖道路遊行坦坦
衆善莊嚴花簇秀萬德成就果周圍化禽演

於法音風樹傳於道品到這般田地更要保
持涵養直至命終永無退失脫然而去方爲
了事其或未然切不可遺山認培弃寶捨薪
妄認色身便爲究竟信知生死事大莫作等
閑尋訪真知決擇心要確實念佛求悟大乘

了見本性彌陀直達唯心淨土可謂雖然舊
閣閑田地一度贏來方始休

真如本性說

真如本性者父母未生已前一真無妄之體
謂之本來面目禪定則曰正法眼藏蓮宗則

曰本性彌陀孔子則曰天理大易則曰太極
名雖有異其實同 真如本性也此性虛而
靈寂而妙與天地同根萬物一本歷塵劫而
不朽世界壞而不遷人不能任其自如之真
而梏於地水火風和合之質方其受形也已

野十

十一

爲陰血濁氣昏其本然清淨之體及其生也
六塵五欲之迷倒昧於本有之天真是故佛
說八萬四千法門皆是導人反妄而歸真也
其捷徑易行者惟念佛一門修之者心不散
亂三昧現前是復其本性也今有一等不究

佛理之人却將道門修養法冒濫蓮宗妄說
氣是主人教人般精運氣勞其筋骨枉用身
心甘受苦辛終無所濟嘗觀道門張紫陽說
精氣神者先天地之元精元氣元神也元精
非淫泆之精元氣非呼吸之氣元神非念慮
之神癡人不曉此意喚作鍾眼既不明理
亦不達矯誘他清信之士一向在臭皮袋上
造作昧却一真佛性妄言此是修行可悲也
我普告同修切宜仔細究心念佛啓悟真源
若也了了自見法法現前是名見性成佛一

念差錯天地懸殊

辨真妄身心

夫身者有法身有色身傳曰智明真境盡法
爲身故曰法身父母緣生虛幻不實故曰色
身心者有真心有妄心真淨明妙虛徹靈通

故曰真心隨境生滅忽有忽無故曰妄心祖
師勸修念佛三昧者於自己真心中流出一
句阿彌陀佛念念觀照法法圓通是謂都攝
六根淨念相繼於一念中普現色身三昧今
時有一等人不知真妄錯認色身爲我身以

妄念爲究竟多是吐納按摩做模打樣希望
成道不亦謬乎何謂弃却真金而拾瓦礫也
大凡學道要辨真偽故宗鏡云修道以心爲
宗理須仔細究竟約有情界真妄似分不可
雷同有濫圓覺金鑛共熱真偽纔分沙不同

野十

十二

炊生熟有異三乘慕道見有差殊錯指妄心
以爲真實認妄賊爲真子劫盡家珍收魚目
作驪珠空迷智眼遂使愚癡之子陷有鍊之
重關邪險之人溺見河之識浪戲熾焰於朽
宅忘苦忘疲卧大夢於長宵迷心迷性皆由

執斯緣慮作自己身遺此真心住他聲色斯則凡夫外道之失也或有法學禪宗執佛方便致使撒開八網乘對四機越一念而遠驟三祇功虛大劫離寶所而久淹化壘跡困長衢斯則迷循妄心不得真心之失也心賦云性非造作理實鎔融明之者即動而靜昧之者迷西作東任竭海移山未是無爲之力縱躡虛履水皆爲有漏之通辨玉須真探珠宜靜若向境外以求心焉知圓光而在肯順法界性合真如心此則頓入如來大慈悲海比之著相修皮袋者豈可同日而語矣

辯明三寶

教云十方薄伽梵圓滿修多羅大乘菩薩僧功德難思議三寶者有三種一曰同體三寶謂真如之理自性開覺名爲佛寶德用軌則

野十

十三

自性正真名爲法寶動無違諍自性清淨名爲僧寶二曰出世三寶謂法報化身隨類應現是爲佛寶六度詮旨四諦緣生名爲法寶十地菩薩四向五果名爲僧寶三曰世間住持三寶謂泥龕塑像名爲佛寶黃卷赤軸名爲法寶剃髮染衣名爲僧寶皈依者感諸天護持供養者獲福田無量今有邪愚不解僞撰真宗妙義經妄言精是佛寶氣是法寶神是僧寶遞相傳習致使入善門者信其邪說不敬三寶實可憐憫若夫不敬世間三寶則自昧其心自昧其心則迷失本性同體出世三寶何所得哉自賺猶可又賺他人可謂岐人天之正路瞎人天之正眼昧因果之真教洩定慧之淳風無甚於此也佛言一切衆生若不皈依三寶永劫墮三惡道況我慈照集

經成懺使學者依大乘經甚深妙義從今身
至佛身為法界衆生皈依常住佛皈依常住
法皈依常住僧正信善人既已得聞聞已誦
禮固當自敬自信即此敬信之心端可近於
佛道矣凡見一切佛像起如來想見一切聖
教生難遭想見一切比丘僧起祖師想禮拜
供養無得輕欺以佛莊嚴而自莊嚴如此則
一體三寶唯心備具矣若也執於鄙見昧其
根本妄信邪教疑誤後人自取沉淪永溺惡
趣是誰之咎歟

辨見聞覺知

古德云在胎爲身處世名人在眼曰見在耳
曰聞在鼻嗅香在舌談論在手執捉在足運
奔徧現俱該沙界收攝在一微塵識者知是
佛性不識喚作精魂比來有等愚人不知佛

野十

十四

理潛吾教中專以傳受爲宗妄說六門見性
指四大色身以爲佛體自立三十六關七十
二信捏合恠事誑惑善人妄謂這邊肉動某
人來那裏疼痛某事至吉凶禍福言是先知
愚者得聞將謂佛法靈感傾心諦信布施供

養傳此邪言切切記心未嘗暫捨殊不知一
真佛性清淨湛然爲有妄身乃有妄識蓋覆
本性不見光明一念心空名爲悟道故楞嚴
云知見立知即無明本知見無見斯則涅槃
是故祖師立教但以念佛三昧爲正宗未嘗
有毫髮許實法繫綴於人何期蚩蚩薄俗迷
宗昧旨棄忠孝而不履背仁義而不修假蓮
宗之名行差別之法貪求冥感以奇怪惑人
則有邪魔魍魎附人身體撓亂正信盡遭魔
攝可不悲哉大凡修淨業人善察邪正本分

究心確辦信誠憶佛念佛願生淨土慎勿他求智覺壽禪師云莫摘枝苗須搜祖禰豁爾而無明頓開湛然而情塵自洗可謂直截根源佛所印摘葉尋枝我不能

破妄說灾福

野十

十五

夫佛祖正法以本性彌陀爲體念佛信願爲宗自行化他爲用乃佛祖之格言後人之龜鑑凡曰音聲佛事點燭道場蓋是方便法門以之引權歸實耳比來學者迷失宗旨貪著事相不遵教典向外妄爲心眼不明競稱師長實法門中一弊事也或搜鬼竅有若師巫或稱彌勒下生或言諸天附體或向燭光上見神見鬼或在香烟上斷吉斷凶瞞昧三光欺賢罔聖誑諄閭閻邀求利養及乎問他平實行願杜口無言本性彌陀罔知下落熱亂

一生盡是虛誑誤人自誤實可悲哉故楞嚴經云善男子心愛懸應爾時天魔候得其便飛精附人口說經法訐露人事不避讎嫌口中好說未然禍福及至其時毫髮無失是人愚迷惑爲菩薩親近供養破佛律儀潛行貪欲此名歷劫精魅大力鬼神年老成魔惱亂是不覺魔著謂言證聖厭足心生去彼人體師及弟子俱陷王難汝當先覺不入輪迴迷惑不知墮無間獄嗟乎初心善人不知真偽信彼邪說不務存心積德妄想求福見之謬焉吾聞積善之家必有餘慶積不善之家必有餘殃故知吉凶禍福繫乎人心焉可諂求富貴而苟免禍害哉永明壽禪師云惡從心起如鍊孕垢而自毀鍊形善逐情生如珠現光而還照珠體故吾勸諸善人舉心用事

必擇道而行之擇禮而從之擇友而交之擇里而處之擇師而事之兢兢焉而存心戰戰焉而守節念念不昧無失於順天之道以奉西方之教而其觀燭談禍福不與焉

辯明空見

野十

十六

空者破諸有也大覺世尊開示正法欲令一切人識知世間萬法皆空自悟本性之真空也真空者是如來之法界衆生之本心空而不空有而非有悟之者於不有中運出自家寶藏探之無窮用之無盡謂之一乘妙道非

頑空之空也今有一等愚人一向說空撥無因果步步行有口口言無便道飲酒食肉不礙菩提行盜行姦無妨般若縱橫放曠馳逞顛狂謗佛謗經輕毀一切胡揮亂統以當宗乘欺侮聖賢自稱得道如此者滔滔皆是也

永嘉所謂豁達空撥因果莽莽蕩蕩招殃禍非斯類而何耶又楞嚴經云心若着空則有大力空魔入其心腑其人不知是其魔着口說經法潛行貪欲輕毀經像惑亂是人盡遭邪墜魔心生厭去彼人體師及弟子俱陷王

難命終自爲魔家眷屬受魔業盡墮無間獄嗟乎去聖遠微言絕異端起大義乖不着於有則蕩於空着於有則執名相滯有爲固物我泥怨親縛於近教喪於遠理蕩於空者則迷因果混善惡弃戒律背禮義蓋不知中道

野十

十七

之爲至善也或曰何謂中道曰有亦不着無亦不空空不離有有不離空怨親等焉物我齊焉因果明焉善惡分焉戒律用焉禮義修焉近教通焉遠理至焉入矣哉中道也妙萬物之名乎稱本性之謂乎苟達斯理則不墮

於偏是謂得正受念佛三昧者矣

辯一合相

金剛經云如來說一合相者即非一合相是名一合相良由世人一性昏迷與塵境相合即非一合相智者明見自己真心背塵合覺

一念覺心與十方諸佛真空法界相合即是一合相理也永嘉云我性同共如來合但凡夫不悟此理貪着事相妄自堅執情心意識與山河大地牆壁瓦礫相合昧却理性之真空即非也六祖云心有所得即非一合相心

無所得即是一合相是也今有愚人不識佛法坐吾教中妄說夫婦是一合相者誤矣蓋其情生智隔想變體殊業累殃深皆因昧果曲解聖典毀辱教門淨業正宗豈容是說真實修行之士切宜堅秉正信專念彌陀於一

念中不取於相內心外境了了一如自然冥符真理是也故佛果勤禪師示衆云汝等諸人但向十二時中上不見有諸佛下不見有衆生外不見有山河大地內不見有見聞覺知好惡長短打成一片一一拈出更無異見此則一合相理歷然明矣可謂日可冷月可熱衆魔不能壞真說實履道之通衢乃悟宗之正訣

辯明雙修

雙修者修福修慧也教云修福不修慧象身

野

六

掛纓絡修慧不修福羅漢應供薄福慧二莊嚴乃能成正覺古德云福不得不作慧不得不學龍舒云修淨土者雖專以念佛爲行門亦須福慧兼修庶得事理兩融也內則修慧究竟涵養深徹淵源使慧性增廣含虛空界

無所不知無不照了外則修福慈悲方便柔和善順利濟世間見一切人平等恭敬隨機說法教化衆生行一切善此是福慧雙修也今有一等愚人常行異教詐稱蓮宗弟子妄指雙修潛通媯穢造地獄業迷誤善人沈迷

欲樂甘墮險坑豈不謬乎是真狐魅妖精何異畜生類也楞嚴云若諸衆生其心不媯則不隨其生死汝修三昧本出塵勞媯心不除塵不可出縱有多智必落魔道上品魔王中品魔民下品魔女諸修行人先斷媯心是名如來先佛世尊第一決定清淨明誨若不斷媯修菩提者如蒸砂石欲其成飯經百千劫終不名飯汝以媯身求佛妙果縱得妙悟皆是媯根根本成媯輪轉三塗終不能出如來涅槃何路修證必使媯機身心俱斷斷性亦

野十

十九

無於佛菩提斯可希冀如我說者名爲佛說不如此說即波旬說今勸在家菩薩依戒修行勿犯邪非清心寡欲雙修福慧回向西方龍舒云修福又修慧深信念阿彌當生上上品決定更無疑其或不然欲飯蒸砂徒費力擔柴入火定殃身

辯明三車

法華經譬喻品云若有衆生從佛世尊聞法信受慇懃精進求一切智佛智自然智無師智如彼諸子爲求牛車出於火宅故知衆生喻諸子三界喻火宅三乘喻三車如來見衆生在三界中不得出離說三乘法引令離苦譬如諸子在火宅中嬉戲長者以三車引之令出也有等愚人假說文殊問佛妄稱性是牛車心是羊車意是鹿車又云牛車載妙法

羊車載蓮花鹿車載經所謂醍醐上味爲世所珍遇斯人等翻成毒藥夫法華經者諸法之王佛所護念其可妄議哉何期邪師認見以非爲是以是爲非法說非法非法說法誑於人謗於佛毀於法豈非負五逆之大罪乎

經云若有誹謗是經典者當知是人入阿鼻獄具足一切劫盡更生如是展轉至無數劫從地獄出當墮畜生謗斯經故獲罪如是細思此等哀哉切心敢以忠言痛告道友於自己心中開示悟入佛之知見則此心清淨如蓮華開是謂之法華三昧悟斯理者是乘白牛車出三界火宅也又不見法達禪師見六祖大師呈偈云誦經三千部曹溪一句亡未明出世肯寧歇累生狂羊鹿牛權設初中後善揚誰知火宅內元是法中王於是曹溪六

野十

千

祖大師乃說偈以證之云心迷法華轉心悟轉法華誦久不明已與義作讎家無念念即正有念念成邪若能如是解長駕白牛車是若有執迷不省自取沉淪者吾未如之何也已矣

辯明三關

三關者兜率悅禪師示衆語一云撥草叅玄只圖見性只今上人性在甚處二云識得本性要脫生死死到來作麼生脫三云脫得生死要知去處四大分離向甚處去是故透此關者則奚拘生死徹此道者豈礙去來自是天下叢林宿師大衲靡不洞究淵源故能脫白露淨其旨曉然決無異說今有愚人妄指人身三丹田作內三關教人般運氣血謂之透過三關又曰自足至腰三處疼痛爲外

三關妄以此處要定臨終時節世多傳習盡入邪路詳觀念佛之教乃簡徑法門祇令修行人於十二時中持一句阿彌陀佛思專想寂更能回光自看阿那箇是我本性彌陀四大分離向甚處去常有此疑驀然識得便知

野十

三

落處即此是直捷省力底修行正道捨此之外稍涉一毫異說即墮在邪見林矣嗚呼癡人背真向偽良可憫焉若也於斯信得截斷露布葛藤豁開透地通天眼觀破邪思妄想心

辨明大小二乘

原夫大法王之垂化也統攝群品各有司存小律比禮刑之權大乘類鈞衡之任營福如司於漕輓製撰若掌於王言在國家之百吏咸修類吾教之群宗競演果明此旨豈執異

端應須量已才能隨力演布達則兼濟爲善窮則專門是宜雖各播於宗猷而皆處於慈濟同歸和合之海共坐解脫之牀夫如是則迷途之司南教門之木鐸也柰何源遠流別大道澆漓好朱者憎其素愛甘者惡其辛未

契圓宗各權所據又豈知生佛本一凡聖性均而不能自復者由迷昧於身心致籠檻於生死是知身之過惡非戒律不能檢心之昏散非定慧不能融檢之融之尚慮乎道之不明性之不復况埋沒於邪岐而互相是非也

耶或云我學小乘却又不知戒施禮誦是漸修之法或言我學上乘却又不識本性彌陀唯心淨土之旨不着於事相又墮於頑空大似深村草裏生育之人坐在一隅不知東西南北妄生分別是是非非非是是所謂執

着死蛇頭錯路修行者在穢惡則無所間然
於行解不見可畏以至積習成性自滅其身
始學慕於上賢終見沉於下惡如斯之輩誠
可哀哉永明壽禪師云譬如庭雀馬攀鴻鵠
之心還似井蛙豈測滄溟之闊或徇他求如

野

三

鑽冰而覓火但歸已解猶向乳而生酥慎勿
立我慢幢張邪見網輕侮先覺熒惑後人至
哉斯言也昭昭乎天日在上蕩蕩乎佛祖有
靈奉教之者可不懼乎但能信念彌陀可以
免斯過咎矣

萬明不生不滅

般若心經云是諸法空相不生不滅不垢不
淨不增不減是故空中無色無受想行識等
又維摩經云不善不生善法不滅故知色相
有去有來佛性不生不滅今有愚人妄以不

產後嗣爲不生不斷欲心爲不滅駭世恠言
惑人妖祟密互邪淫作不淨行斷佛種性悖
亂人倫故楞嚴云善男子愛極發狂熾然貪
欲則有欲魔入其心腑一向說欲爲菩提道
化諸白衣平等行欲疑誤衆生入無間獄蓋

以愚迷不知觸淨不覺遭魔以致斯苦諦觀
天地肇分有陰陽而有男女有男女而有夫
婦有夫婦則有父子有父子則有君臣有君
臣則有三綱五常之道三綱統其人倫五常
正其教化此聖人立世間之法也吾祖遠公

野

三

有云在家者厚身存生我倒未忘以情欲爲
苑囿以聲色爲遊觀耽湎世樂不能特出吾
佛示化令反本以求宗在家奉法則是順化
之民不遺奉親敬君之禮是故先導之五戒
不殺存乎仁不盜存乎義不淫存乎禮不妄

存乎信不酒存乎智身心既律然後示之以出世之法令修念佛三昧以爲西方之歸達乎不生不滅之道是以王臣外護法流天下千載猶一日也其奈當斯之際薰蕕共囿菽麥同畦未易分也敢以衷赤之忱普告信士

但除却一心不亂繫念彌陀之外凡所有相皆是邪解切須子細真實修行善則從之惡則遠之邪則遣之正則守之若乃立身行道之事息心達本之旨前篇備述明則典刑不爲不多矣遵而行之則吾門眷屬違而作者魔之黨類所以生遭王法死墮阿鼻殃及累世莫言不道何故漸耳欲得不招無間業莫謗如來正法輪

辯明曹溪路

昔永嘉大師往曹溪禮拜六祖印證心地述

證道歌云自從認得曹溪路了知生死不相干是今天下禪宗出乎曹溪之源目曰曹溪路也何期愚人妄指人身有夾脊雙開作曹溪一派又妄說六祖云寧度白衣千千萬不度空門半箇僧如斯之輩非特惑於後人是

亦誣於先聖豈不聞永嘉云第一迦葉首傳燈二十八代西天記法東流入此土菩提達磨爲初祖六代傳衣天下聞後人得道無窮數又豈有度白衣而不度空門乎於戲邪妄之徒不知來歷竊祖師之名同魍魎妖孽見

野十

王西

解迷誤善人正是一盲引衆盲相牽入火坑也吾知祖宗實德是以稱而傳之吾知闡提薄福謗辱吾宗是以恐而懼之吾尚知而大懼汝謗聖師之道誑後學之人安得不益懼於吾乎汝速宜磨滅改而正之無貽我羞之

爲愈也

辨佛法隱藏

佛法者出世間之道無爲之法也涅槃經云
如來開發顯露清淨無翳迷者不解謂是秘
藏智者了達即不名藏有等愚人妄說官法
堂堂佛法隱藏僞撰一落索邪言閉門傳度
謂之生死與典幻惑後人至死不與人說逗
到臨時一場漏逗大似貪兒得錫喚作黃金
明眼人前如何拈出自不知非反誇能會正
是瞞人更自瞞也豈知佛說一切法爲度一
切心蓋以衆生心體本來是一用處不同故
說一切法也祖師云瓶盤釵釧本是一金名
相不同至體無二嗟乎末運法出奸生往往
失其本體者多是将新羅漆高麗鍮間貨錯
出巧言令色瞞昧出人一爲既行百真莫辨

野十

二十五

况愛小利者上人鋪席不揀好惡苟圖價廉
好看易得等閑被他將一團灰炭塞却眼孔
拖向黑地裏脫換去了及至眼開握着黃土
也認不得又何金鍮真僞之辨哉癡人但得
入手貴乎密密珍藏以爲奇貨生怕人知薦

然撞着識者爲伊點破始知分文不直以斯
之類比比皆是只爲愚暗福薄眼裏無觔籠
心鹵莽無以不遇真正師匠以致然也殊不
知繞指精金從本來有自非作家陶鎔痛下
鉗鎚煅煉一回轉見性柔金瑩燦然一塊觀
體全真然後隨意作用造成衆器飛光散彩
耀人心目永無變色者固知自餘皆不足言
矣可不至寶哉正信道流切宜着眼

辨明超日光

大彌陀經云阿彌陀佛光明極大而爲諸佛

光明之王故號無量光佛無邊光佛無礙光佛無對光佛炎王光佛清淨光佛歡喜光佛智慧光佛不斷光佛難思光佛無稱光佛超日月光佛其光明所以照無央數天下幽冥之處皆常大明諸天人民禽獸蜎飛蠕動

見此光明莫不喜悅而生慈心悉得解脫是故十方諸佛菩薩緣覺聲聞悉皆稱讚因名曰超月光佛蓋以日能照晝月能夜明其德不全佛之光明晝夜長照無虧無欠故名超月光也今有一等愚人妄指教人於日

月初出之時以口吸採其光吞嚥入腹欲其成寶以當修行秘法謂之超月光者其錯大矣譬如癡猿聯臂攀樹懸崖下捉水月勞心費力到底成空若是智人達觀速須捨離早求正法免墮迷津專念彌陀究明心地不

野十

十六

見祖師道從門入者不是家珍自己靈光照天燦地人人分上本自圓成一點靈源無內無外頭頭上顯物物上明若能悟此即如來一段光明超日月

辨明髻中珠

髻中珠者法華經云如轉輪王得法國土王於三界而諸小王不肯順伏時轉輪王起種種兵而往討伐戰有功者賞賜諸物獨王頂上有此一珠而不與之末後付與如來亦復如是見賢聖軍與五陰魔煩惱魔死魔共戰滅三毒出三界破魔網爾時如來亦大歡喜爲說諸法而不爲說是法華經今乃說之如轉輪王久護明珠末後賜與此蓋世尊最後說是大乘法寶超出諸聖之上以輪王髻珠爲喻此珠者即諸佛之圓智乃衆生之理性

悟之則三祇頓越迷之則六道沉淪今有一等愚人錯會經旨妄以運氣入頂作髻中珠謂之取上乘法密密相傳教人般精運氣衝入頭頂要學世尊頂上有肉髻珠何其愚哉殊不知世尊肉髻乃無見頂相表一乘大法

野十

二七

也無見者自不能見離自見故向上極則諸聖皆不得見離他見故壽禪師心賦云高高法座非聲聞陞短之能升赫赫日輪豈外道嬰兒之所見無偏無黨至極至尊嗟乎愚癡之人罔知正法顛倒錯亂嫁禍移殃於後人

賺他向善俗子墮落深坑可痛惜哉奉勸信士細參本教恪心念佛悔悟前非了知諸法本無髻珠自然顯現堂堂獨露豈假他求哉

辯明無漏果

法華經云諸漏已盡無復煩惱此乃羅漢聲

聞修行至習漏俱無也無漏者蓋人之六根常爲色聲香味觸法六塵所惑心隨境轉成有漏緣所以輪迴不息修行人六根自靜不被六塵所轉即無漏也今有一等愚人妄將眼眇鼻涕盡皆喫了謂之修無漏者何蠢乎

我予嘗憫而問之曰六根四大膿血之袋屎尿之囊眇淚涕唾皆屬不淨何得取而食之彼則曰人身之中有七寶不可弃之善收拾者結成舍利證無漏也苦哉苦哉如斯顛倒誠可忍耶更有一等衆生以秘精是無漏者

混吾教中遞相傳習潛饕貪欲壞亂正法此是妖精鬼恠夜聚曉散喫菜事魔之徒非是蓮宗之弟子比年以來多有此樣扇動人家清信男女不覺不知鼓入魔道故楞嚴經云善男子心愛根本窮覽物化天魔得便飛精

附人說佛涅槃即是現前肉身父子子遞代相生常住不絕無別淨居愚人信受亡失本心惑爲菩薩常說眼耳鼻舌皆爲淨土男女二根即是菩提或食屎尿廣行淫穢彼無知者信是穢言易入邪悟此名蠱毒惡鬼惱

野一

三六

亂是人師及弟子俱陷王難汝當先覺不入輪迴迷惑不知墮無間獄受得地獄業消復入畜生餓鬼今觀邪師妄作之徒假吾佛祖之教門造不淨之惡業逆二儀背三光謗佛祖亂人倫碌碌如蠅蛆之逐穢現受衆苦沒後沉淪是罪果何逃哉宜乎不足恠也非惟死後受報抑且官法不容語云道之以政齊之以刑民免而無耻道之以德齊之以禮有耻且格誠哉是言今勸善流諦觀聖訓宜自知耻勿憚改過捐情絕慮正已修行有能古

教照心則其心自明古鏡照精則其精自形若專於淨行趣於菩提決無誤矣其或不然三塗業海無邊際千佛出來難救伊

辯明趙州茶

昔趙州和尚見僧問曰汝曾到此不僧云曾

到州云喫茶去又問僧云曾到此不僧云不曾到州云喫茶去院主問曾到且從不曾到如何也喫茶去州乃喚院主主應諾州云喫茶去叢林因此有趙州茶話公案今愚人不明祖師大意妄自造作將口內津唾灌漱三

野十

三九

十六次嚥之謂之喫趙州茶或有臨終妄指教人用硃砂末茶點一盞喫了便能死去是會趙州機關更可憐憫者有等魔子以小便作趙州茶何愚惑哉非妖恠而何耶真正修心者但依本分念佛期生淨邦切不可妄將

祖師公案杜撰穿鑿是謗大般若之罪人也
不見道乍可粉身千萬劫莫將佛法亂傳揚

辯明教外別傳

園悟勤禪師云西方大聖人出迦維羅國作
無邊量妙用啓迪群靈其方便順逆開遮餘

言遺典盈溢寶藏以至下梢始露一機謂之
教外別傳迦葉破顏承當以來的的綿綿直
指人心見性成佛不立階梯不生知見利根
上智向無明窟子裏瞥地煩惱根株中活脫
應時超證得大解脫西天四七東土二三皆

龍象蹴踏師勝資強格外領畧當下業障冰
消直截承荷自能管帶打作一片頓契佛地
尚不肯向死水裏浸却唱出透玄妙句超哉
佛祖剗斷露布葛藤如按太阿凜凜神威阿
誰敢近作家漢確實論量纔有向上向下談

玄說妙作用纖毫即便叱之謂不是種草直
下十成煅煉得熟履踐得實始畧放過猶恐
他時異日落草累人瞎却正眼嗟見一等拍
盲野狐種族自不曾夢見祖師妄言達磨歸
空謂之傳法救迷情以至借他從上最大宗

師馬祖趙州名目脫賺後人及誇初祖隻履
西歸普化空棺皆謂此術有驗謂之形神俱
妙生死秘法遞相傳習而人皆厚愛此者生
怕膈月三十日悵惶競學歸程之法除夜拜
影喚主人公真是誑譎間閭捏偽造窠貽高

野

三十

人嗤鄙復有一種假托達磨胎息趙州十二
時別歌龐居士轉河車頌遞互指受密付傳
持希望生天更要預知死日殊不知此真妄
想邪心愛見本是善因反招惡果多見豪傑
之士高談闊論者不知宗因徃徃信之那知

失却故步畫虎成狸遭明眼人覷破默觀憐
憫豈諸佛與列祖體裁止如是耶曾不自回
照始末居然可知矣海內學此者如麻似粟
習以成風恬不知恠其高識遠見自不因循
恐乍發意未入閫奧立志雖專跋涉雖遠遇
增上慢導入邪見稠林末上一錯永沒回轉
其流浸廣莫之能遏因出此語以痛告之庶
有志願於大解脫大總持者可以辨之而同
入大薩婆若海汎慈舟接濟群品俾正真妙
道流於無窮豈不快哉

辨關閉諸惡趣門開示涅槃正路

諸惡趣門者乃身口意三業也所謂身殺盜
婬口妄言綺語惡口兩舌意貪瞋癡修淨業
人正心向道截斷已上十不善行則不入惡
道謂之關閉諸惡趣門也開示者指出也涅槃

野十

子

槃者不生不滅也正者不偏路即西方之道
也今有愚人指口爲諸惡門鼻爲涅槃路教
人臨終時緊閉其口令氣從鼻出謂之出門
一步又妄將因字以爲公案教人口裏着力
忍了氣透這一關或云因字四圍是酒色財

氣或言地水火風或言生老病死等皆是卜
度妄計曲說嗟乎這一箇因字瞞盡多少人
殊不知此字玉篇明載戶卧切即阿字去聲
呼也此箇因字一切世人口中未嘗不說喻
人失物人忽然尋見不覺發此一聲是因字
也宗門多言此字者蓋尋師訪道之人參究
三二十年忽然心花發現會得此事不覺因
地一聲如失物得見慶快平生是其字義也
如是則念佛之人但於念念中仔細究竟本
性彌陀忽然親悟親見真實到因地一聲處

自然明徹矣故智覺壽禪師云心外求法望石女而生兒意上起思邀空花而結果本非有作性自無爲智者莫能運其意象者何以狀其儀言語道亡是得路指歸之日心行處滅當放身捨命之時可謂唯此一事實餘二即非真

辯明四生

大珠慧海禪師云九類衆生一心具足隨造隨成無明暗蔽爲卵生煩惱包裏爲胎生愛水浸潤爲濕生歛起妄念爲化生悟即成佛迷號衆生菩薩只以念念心爲衆生若了心體空寂名爲度衆生也智者於自本際上度於未形未形既空即知實無衆生得滅度者有等愚人不識自心胡卜亂度妄說臨終之時眼見轎馬樓臺幡蓋饒鉞之類爲四生六

野十

三十二

道胎窠不隨他去者脫四生也殊不知臨終現境是你平時所作善惡業相神識自現即非外来故先德云作惡而惡境現前念佛而佛界自至若是時中把捉不住做不得主常被妄想顛倒所使臨當風火散壞之時如落湯螃蟹相似又焉能作主宰耶是以圭峰禪師云作有義事是惺悟心作無義事是狂亂心狂亂隨情念臨終被業牽惺悟不由情臨終能轉業今以此語直告諸人當自念言我今修行淨業本爲生死佛祖垂教豈欺我哉當依正法真實存心專念彌陀捨諸虛妄朝思夕想念念願生西方如此則塵勞業識當下瓦解冰消反觀自己生死尚不可得又喚甚麼作衆生乎故懺云於一念中得念佛三昧普度十方六道一切衆生各各出離苦輪

同生淨土者是也可謂妄心無處即菩提生死涅槃本平等

破妄立十號

西方文云念佛之人於相好光明之中得見阿彌陀佛則無明頓破煩惱永忘法界之門

野十

三十三

忽然通達一乘之路卓爾開明十號俱彰三

身圓顯此明修行人得證佛果十號俱彰也

十號者菩薩戒經云一曰如來妄虛二曰應

供良福三曰正徧知知法四曰明行足天眼

宿命智明漏盡五曰善逝還來六曰世間解

無上士知二世間故一國土七曰調御丈夫

能調伏衆八曰天人師眼爲衆生作九曰佛善知

生惡故十曰世尊無二佛故何期愚

人不知佛法妄立十號歸程稱爲達磨大師

傳來生死秘法却云鵲巢灌頂蘆芽穿膝玉

柱龕混蛇入袂襠波斯獻寶天鼓不鳴蓮花池乾二祖斷臂立雪齊腰神光不現以此十件謂之大事因緣徃徃蓮宗被此等盲師瞎漢遞相傳授賺人性命從冥入冥陷於非道何不思之甚也達磨大師初至此土不立文

字直指人心見性成佛又安得有一法傳授乎豈不聞五祖弘忍大師謂六祖曰佛即以心傳心法即以心印心佛佛惟傳本體師師密付本心是也莊子云使道之可傳人莫不傳之子孫道之可獻人莫不獻之君親其不

可傳獻者無他中無主而外無其證也又嘗聞我佛釋迦世尊千生煉行百劫修心迺從兜率降跡王宮弃萬乘榮貴向雪山修行食麻食麥苦行六年覩見明星悟道成佛人中聖中稱爲大覺十號具足作天人師至於鵲

巢頂上蘆芽穿膝之類皆當年實事初無表
法止是端坐不動定又忘形之意後之學者
不近智達不體我佛建立教門大不容易纔
得入他門戶行願不習識見俱無便要爲師
傳度弟子做大模樣逞我能會撞入邪魔黨

野十

二十四

類中學他許多邪法雜毒入心如落水鬼相
似黑地裏拖人入地獄去苦哉苦哉且如二
祖斷臂立雪齊腰的是當時爲法忘軀猛烈
之志本傳備載分明學者自當詳究豈可妄
爲甘受謗法之罪永沉苦海之誅永嘉云非
不非是不是差之毫釐失千里是則龍女頓
成佛非則善星生陷墜信麼盡情掃蕩開家
具鐵樹花開別有春

誓願流通

切惟衆初一念元從淨土中來泊沒多生未

脫娑婆世界幸逢蓮社得遇正宗仰藉三寶
餘麻感沐導師化育伏爲教門之下多有錯
路修行嗟信心盡作魔民致良善俱遭邪墜
正因泯絕慧命難存反招謗法深慙豈有誦
持功德觀斯境界以長吁痛切身心而不忍

是乃搜大藏之要旨用證本宗掃百家之是
非開明大道並是依經辨理顯正摧邪照了
無私故名寶鑑俾夫後學照心目而妍醜自
知導彼迷途達家鄉而免諸流浪是集克就
鄙志當陳百拜祖庭重申大誓告白十方諸

野十

三十五

佛諸大祖師望賜慈光證明祈禱普度敬自
發心立願照依所集蓮宗寶鑑篇字數一字
三禮每一禮念楞嚴呪心一遍三稱南無觀
世音菩薩尊號望悲心而憐憫賜法力以冥
加俾魔外以皈依真乘之流布與彼盲瞶

開眼目於諸痛苦作良醫昏衢黑暗之中爲
燈爲燭苦海洪波之內爲舟爲航危險處作
大橋梁迷路中示其正道普爲十方蓮社諸
上善人同期懺滌於身心各願消除於業障
非法說法之咎法說非法之憊一智能滅萬

年愚一燈能破千年暗妄意消而空花滅正
信生而淨行彰信禮彌陀普同回向與諸大
衆並從今日發菩提盡於未來永劫常行菩
薩道離非梵行遠邪見師願盡此報身同生
安養國常修六念及六波羅廣運四心與四

弘誓發四十八願如阿彌陀得念佛三昧如
大勢至修普賢之行願等觀音之慈悲學大
智慧如文殊次登補處如彌勒頓入法界圓
證上乘分身徧至於十方大悲普度於一切
建法幢立宗旨耀慧日除癡冥諸魔外道悉

歸降匝地普天皆嚮化辯才無礙廣利塵沙
威德無邊拯濟含識父母師長俱登解脫之
門累劫怨親盡出沉淪之海伏望觀是集者
起護法心蕩歷劫之迷情破千重之疑網頓
豁正眼明悟本心淨土道場不動足到西方

大聖如對目前萬法了然妙在茲也惟冀天
龍歡喜聞正法以護持凡聖皈依掃邪風而
絕迹弘揚祖道廣播宗風融大千同爲清泰
之邦俾四海共樂無爲之化正見邪見盡入
無生皇恩

野十

三十六

佛恩一時等報虛空界盡衆生界盡衆生業
盡衆生煩惱盡我願乃盡而虛空界乃至衆
生衆煩惱不可盡故我此願王無有窮盡念
念相續無有間斷身語意業無有疲厭普賢
菩薩發願如是諸大祖師發願亦如是我今

發願亦如是普爲蓮社大衆發願亦如是盡
未來際一切情與無情發願亦如是如是如
是無不如是願同如是恒沙衆盡入如來願
海中

西蜀楚山和尚示衆念佛警語

原夫佛不自佛因心而佛心不自心由佛而
心離心無佛離佛無心心佛殊名體無二致
是故念佛念心心念佛無念無心無心無
佛心佛兩忘念不可得只這不可得處脫體
分明纖塵不間是以真機觸目徧界難藏山
色溪聲頭頭顯露性相平等理事泯融箇裏
覓一毫自他淨穢之相了不可得何聖凡迷
悟之有耶於此果能豁開智眼頓悟其旨直
下知歸不妨慶快設或未能領契須假方便
而入所謂方便而入者何用別覓玄妙但只

野十

三七

要發起一箇勇猛堅固信心將一句阿彌陀
佛頓在心目之間不拘經行坐卧靜閑閑忙
默默提撕頻頻返照了知佛即是心未審心
是何物要看這一念從甚麼處起又復要看
破這看的人畢竟是誰如是觀照念念無間
久久自然煉成一片水泄不通忽於聞聲見
色應機接物處不覺驀然冷灰豆爆烈崩虛
空之時管取叅究事畢到此便見自性彌陀
頭頭顯現常光淨土觸處洞然始信吾言不
欺於汝而其平生修行之志亦乃驗於茲矣
恐猶未諭重說偈言

心佛由來強立名 都緣攝念遣迷情

根塵頓去心珠現 幻翳空來慧鏡明

一法不存猶是妄 全機撥碎未爲平

直須揣見虛空骨 看取優曇火内生

淮陽曉山和尚勸修淨業箴

三途罪報因業重六趣沉淪爲惡多若欲出
離生死海速須迴首念彌陀

一個彌陀佛人人本具足祇緣痴嗔愛生死
虛出沒苦海業因循萬劫受迷津不發迴頭
念轉入展轉深勸君須猛烈念佛宜超越西
方有世界名曰安養國九品妙蓮臺三空真
實際寶殿寶樓閣黃金以布地光明常照耀
無三惡道懼示汝諸有情可以整心趣棄却
貪嗔痴大家秉智慧冷眼掛眉間看破紅塵
事積金玉如山難買三寸氣眷屬與恩親暫
如傀儡戲生前一聚歡死後誰能替終有散
場時有甚風流譬靜裏細思量一場無滋味
何不早休心念佛修三昧挺箇古彌陀始終
莫令退猶如患目人投醫王所治遠近與高

野十

三十八

低拄杖爲憑據信手把堅持一念無有二步
步著脚牢點點知落處但無能所礙終有時
節至親叩得醫王示出真妙濟豁開正眼睛
點破虛幻翳光明照十方廓爾通三際來去
得自由一體無拘繫快樂任逍遙高唱哩囉

哩若能依此修至道無難易是人命終時蓮
池定有會只要辦肯心山僧無賺意各各早
迴光想念西方去九品悟真空一念超實地
生佛體元同了證無殊異

廬山蓮宗寶鑑念佛正論卷第十終

音釋

卽 音垂地名 因 戶則切
又音尤 牽 每聲